

### 三恪部汇考一

#### 上古

黄帝有熊氏封榆罔于路

按外纪榆罔帝里之曾孙也居于空桑为政束急乘人而斗其捷于是诸侯贰其臣蚩尤作乱帝逊居于涿鹿有熊国君曰公孙轩辕实懋圣德诸侯归之帝之立五十五年诸侯尊轩辕为天子封帝于路按路史炎帝参卢是曰榆罔居空桑黄帝时为有熊氏实懋圣德参卢于熊黄帝乃封参卢于路而崇炎帝之祀于陈

注

元和姓纂云黄帝封榆罔支子于路

#### 有虞氏

帝舜封帝尧子朱于房待以宾礼

按书经益稷夔曰戛击鸣球搏拊琴瑟以咏祖考来格虞宾在位

按竹书纪年帝子丹朱避舜于房陵舜让不克遂封朱于房为虞宾三年舜即天子之位

按通志帝舜践天子位即位之明年封丹朱于丹渊为诸侯以奉先祀服其服礼乐如之谓之虞宾示弗臣也

按路史帝尧初取富宜氏曰皇生朱翬佞媚克兄弟为阍鬻讼嫚游而朋淫帝悲之为制奕棋以闲其情使出就丹帝崩虞氏国之于房为房侯以奉其祀服其服礼乐如之谓之虞宾天子弗臣

注

竹书云放帝丹朱于丹水今朱虚县有丹山东

丹西丹二水水近有长口远峻谓之破军坡记为丹朱弄奕之所韵云舜封丹朱为房邑侯今荆河之吴房相图经引孟子注舜封丹朱于白水白水乃今清河盖夏封之在镇西南三里有丹朱陵南八里有帝子夜游台周二百步相台志云丹朱嫚游之地

#### 夏后氏

帝禹封帝尧子丹朱于唐帝舜子商均于虞

按史记五帝本纪禹践天子位尧子丹朱舜子商均皆有疆土以奉先祀服其服礼乐如之以客见天子天子弗臣示不敢专也

注

谯周曰以唐封尧之子以虞封舜之子索隐曰

汉书律历志云封尧子朱于丹渊为诸侯商均封虞在梁国今虞城县也正义曰括地志云定州唐县尧后所封宋州虞城县舜后所封也

按陈世家昔舜为庶人时尧妻之二女居于妫汭其后因为氏姓姓妫氏舜已崩传禹天下而舜子商均为封国夏后之时或失或续

注

索隐曰按商均所封虞即今之梁国虞城夏代

犹封虞思虞遂是也

按通鉴前编注帝舜有虞氏妃女瑩生义均及季厘均封商今商之商洛有尧女墓武关西北百二十里商城是也禹封其子于虞季厘封于缙其后为夏桀所克

按路史帝禹禘黄帝而封丹朱唐商均之子于虞作宾王家

注

天子弗臣谓不以臣礼责君臣之义固定故云

作宾者异于诸臣矣

帝少康元岁诸侯来朝宾虞公

按竹书纪年云云

帝少康二十二岁帝奔虞虞君思妻之二女

按左传哀公元年伍员曰少康为仍牧正憇浇能戒之浇使椒求之逃奔有虞为之庖正以除其害虞思于是妻之以二姚而邑诸纶有田一成有众一旅能布其德而兆其谋以收夏众抚其官职

按通鉴前编少康二十二岁自有仍奔虞虞君思妻之二女

商

汤有天下封虞之后于遂夏之后于夏亭

按左传昭公三年晏子曰箕伯直柄虞遂伯戏其相胡公大姬已在齐矣

注

四人皆舜后陈氏之先

昭公八年史赵对晋侯曰自幕至于瞽瞍无违命舜重之以明德置德于遂遂世守之及胡公不淫故周赐之姓使祀虞帝

注

遂舜后盖殷之兴存舜之后而封遂言舜德乃至于遂

疏

三年传云箕伯直柄虞遂伯戏则遂在

直柄之后故云盖殷兴存舜之后而封之也言舜有明圣之德其德流及于遂

按史记夏本纪夏桀召汤而囚之夏台已而释之汤谓人曰吾悔不遂杀汤于夏台使至此汤乃践天子

注

正义曰括地志云夏亭故城在汝州城县东

北五十四里盖夏后所封也

按路史遂舜裔也夏之世有箕伯直柄伯戏中衰成汤置之于遂遂世守之

注

庄公十二年齐桓灭之左氏正义及风俗通云

商封之于遂袁良碑云世本陈遂舜后虞思后箕伯直柄中衰汤封遂于陈以后舜

周

武王克殷有天下封虞后于陈夏后于杞殷纣子武庚于殷

按史记周本纪武王十一年伐纣封商纣子禄父殷之余民武王为殷初定未集乃使其弟管叔鲜蔡叔度相禄父治殷罢兵西归追思先圣王乃封帝舜之后于陈大禹之后于杞

注

正义曰括地志云陈州宛丘县在陈城中即古

陈国也帝舜后遏父为周武王陶正武王赖其器  
用封其子妘满于陈都宛丘之侧汴州雍丘县古  
杞国地理志云古杞国理此城周武王封禹后于  
杞号东楼公二十一代为楚所灭

按陈杞世家陈胡公满者虞帝舜之后也昔舜为庶  
人时尧妻之二女居于妘汭其后因为氏姓妘氏  
舜已崩传禹天下而舜子商均为封国夏后之世或  
失或续至于周武王克殷纣乃复求舜后得妘满封  
之于陈以奉舜祀是为胡公

注

索隐曰按左传虞遏父为周陶正以服事武王

杜注遏父舜之后陶正官名是生满者也左传又  
曰武王以元女太姬配虞胡公而封之陈以备三  
恪

杞东楼公者夏后禹之后苗裔也殷时或封或绝周  
武王克殷纣求禹后得东楼公封之于杞以奉夏后  
氏祀

注

索隐曰杞国名也东楼公谥号也不名者并史

先失耳宋忠曰今陈留雍丘县故地理志云雍丘  
县故杞国周武王封杞后为东楼公是也盖周封  
杞而居雍丘至春秋时杞已迁东国故左氏隐四  
年传云莒人伐杞取牟娄牟娄者东邑也僖十四  
年传云杞迁缘陵臣瓚云即春秋缘陵淳于公所  
都之邑又州国名杞后改国号曰州而称淳于公  
故春秋桓五年经云州公如曹传曰淳于公如曹  
是也然杞后代又称子者以微小又僻居东夷故  
襄二十九年经称杞子来盟传曰书曰子贱之也  
成王三年周公讨武庚诛之封微子启于宋以绍殷  
后

按书经微子之命王若曰猷殷王元子惟稽古崇德  
象贤统承先王修其礼物作宾于王家与国咸休永  
世无穷呜呼乃祖成汤克齐圣广渊皇天眷佑诞受

厥命抚民以宽除其邪虐功加于时德垂后裔尔惟  
践修厥猷旧有令闻恪慎克孝肃恭神人予嘉乃德  
曰笃不忘上帝时歆下民祇协庸建尔于上公尹兹  
东夏钦哉往敷乃训慎乃服命率由典常以蕃王室  
弘乃烈祖律乃有民永绥厥位毗予一人世世享德  
万邦作式俾我有周无斁呜呼往哉惟休无替朕命  
按史记周本纪武王崩太子诵代立是为成王成王  
少周公初定天下周公恐诸侯畔周公乃摄行政当  
国管叔蔡叔疑周公与武庚作乱畔周周公奉成王  
命伐诛武庚管叔放蔡叔以微子开代殷国于宋作  
微子之命

### 汉

武帝元鼎四年始封周子南君以奉周祀

按汉书武帝本纪元鼎四年冬十月幸行雍祠五畝  
赐民爵一级女子百户牛酒行自夏阳东幸汾阴十  
一月甲子立后土祠于汾阴脍上礼毕行幸荥阳还  
至洛阳诏曰祭地冀州瞻望河洛巡省豫州观于周  
室邈而无祀询问耆老乃得孽子嘉其封嘉为周子  
南君以奉周祀 按外戚恩泽侯表姬嘉以周后元  
鼎四年十一月封为周子南君邑三千户

元帝初元五年春正月以周子南君为周承休侯位  
次诸侯王

按汉书元帝本纪云云

### 注

文□曰姓姬名延年其祖父姬嘉本周后武帝

元鼎四年封为周子南君令奉周祀师古曰承休  
国在颍川

成帝绥和元年诏封孔吉为殷绍嘉公并进周承休  
侯为公

按汉书成帝本纪绥和元年春二月癸丑诏曰盖闻  
王者必存二王之后所以通三统也昔成汤受命列  
为三代而祭祀废绝考求其后莫正孔吉其封吉为  
殷绍嘉侯三月进爵为公及周承休侯皆为公地各  
百里 按梅福传时成帝久无继嗣福以为宜建三

统封孔子之世以为殷后复上书曰臣闻不在其位不谋其政政者职也位卑而言高者罪也越职触罪危言世患虽伏质横分臣之愿也守职不言没齿身全死之日尸未腐而名灭虽有景公之位伏历千驷臣不贪也故愿壹登文石之陛涉赤墀之涂当户牖之法坐尽平生之愚虑亡益于时有遗于世此臣寝所以不安食所以忘味也愿陛下深省臣言臣闻存人所以自立也壅人所以自塞也善恶之报各如其事昔者秦灭二周夷六国隐士不显佚民不举绝三统灭天道是以身危子杀厥孙不嗣所谓壅人以自塞者也故武王克殷未下车存五帝之后封殷于宋绍夏于杞明着三统示不独有也是以姬姓半天下迁庙之主流出于户所谓存人以自立者也今成汤不祀殷人亡后陛下继嗣久微殆为此也春秋经曰宋杀其大夫谷梁传曰其不称名姓以其在祖位尊之也此言孔子故殷后也虽不正统封其子孙以为殷后礼亦宜之何者诸侯夺宗圣庶夺适传曰贤者子孙宜有土而况圣人又殷之后哉昔成王以诸侯礼葬周公而皇天动威雷风着灾今仲尼之庙不出阙里孔氏子孙不免编户以圣人而歆匹夫之祀非皇天之意也今陛下诚能据仲尼之素功以封其子孙则国家必获其福又陛下之名与天亡极何者追圣人素功封其子孙未有法也后圣必以为则不灭之名可不勉哉福孤远又讥切王氏故终不见纳武帝时始封周后姬嘉为周子南君至元帝时尊周子南君为周承休侯位次诸侯王使诸大夫博士求殷后分散为十余姓郡国往往得其大家推求子孙绝不能纪时匡衡议以为王者存二王后所以尊先王而通三统也其犯诛绝之罪者绝而更封他亲为始封君上承其王者之始祖春秋之义诸侯不能守其社稷者绝今宋国已不守其统而失国矣则宜更立殷后为始封君而上承汤统非当继宋之绝侯也宜明得殷后而已今之故宋推求其嫡久远不可得虽得其嫡嫡之先已绝不当得立礼记孔子曰丘殷人



也先师所共传宜以孔子世为汤后上以其语不经  
遂见寝至成帝时梅福复言宜封孔子后以奉汤祀  
绥和元年立二王后推迹古文以左氏谷梁世本礼  
记相明遂下诏封孔子世为殷绍嘉公

哀帝建平二年益绍嘉公户九百三十二

按汉书哀帝本纪不载 按外戚恩泽侯表云云  
平帝元始四年春正月改殷绍嘉公曰宋公周承休  
公曰郑公

按汉书平帝本纪云云

后汉

世祖建武二年夏四月封周后姬常为周承休公

按后汉书世祖本纪云云

注

武帝封周后姬嘉为周子南君成帝封姬延为

周承休公常即延之后承休所封故城在今汝州  
东北

建武五年春二月壬申封殷后孔安为殷绍嘉公

按后汉书世祖本纪云云

注

武帝封孔吉为殷绍嘉公安即吉之裔也

建武十三年春二月庚午以殷绍嘉公孔安为宋公  
周承休公姬常为卫公

按后汉书世祖本纪云云 按百官志卫公宋公本  
注曰建武二年封周后姬常为周承休公五年封殷  
后孔安为殷绍嘉公十三年改常为卫公安为宋公  
以为汉宾在三公上

注

五经通义二王之后不考功有诛无绝郑元曰

王者存二代而封及五郊天用天子礼以祭其始  
祖行其正朔此谓通三统也三恪者敬其先圣封  
其后而已无殊异者也

魏

文帝黄初元年以汉帝为山阳公行汉正朔不称臣  
子皆为侯

按三国志魏文帝本纪黄初元年冬十一月癸酉以河内之山阳邑万户奉汉帝为山阳公行汉正朔以天子之礼郊祭上书不称臣京都有事于太庙致胙封公之四子为列侯

明帝青龙二年山阳公薨治丧追谥葬以汉礼

按三国志魏明帝本纪青龙二年春三月庚寅山阳公薨帝素服发哀遣使持节典护丧事夏四月丙寅诏有司以太牢告祠文帝庙追谥山阳公为汉孝献皇帝葬以汉礼

按注献帝传明帝变服率群臣哭之使使持节行司徒太常和洽吊祭又使持节行大司空大司农崔林监护丧事诏曰盖五帝之事尚矣仲尼盛称尧舜巍巍荡荡之功者以为禅代乃大圣之懿事也山阳公深识天禄永终之运禅位文皇帝以顺天命先帝命公行汉正朔郊天祀祖以天子之礼言事不称臣此舜事尧之义也昔放勋殂落四海如丧考妣遏密八音明丧葬之礼同于王者也今有司奏丧礼比诸侯王此岂古之遗制而先帝之至意哉今谥公汉孝献皇帝使太尉具以一太牢告祠文帝庙曰睿闻夫礼也者返本修古不忘厥初是以先代之君尊尊亲亲咸有尚焉今山阳公寝疾弃国有司建言丧纪之礼视诸侯王睿惟山阳公昔知天命永终于已深观历数允在圣躬传祚禅位尊我民主斯乃陶唐懿德之事也黄初受终命公于国行汉正朔郊天祀祖礼乐制度率仍汉旧斯亦舜禹明堂之义也上考遂初皇极攸建允熙克让莫朗于兹盖子以继志嗣训为孝臣以配命钦述为忠故诗称匪棘其犹聿追来孝书曰前人受命兹不忘大功睿敢不奉承徽典以昭皇考之神灵今追谥山阳公曰孝献皇帝册赠玺绶命司徒司空持节吊祭护丧光禄大鸿胪为副将作大匠复土将军营成陵墓及置百官群吏车旗服章丧葬礼仪一如汉氏故事丧葬所供群官之费皆仰大司农立其后嗣为山阳公以通三统永为魏宾于是赠册曰呜呼昔皇天降戾于汉俾逆臣董卓播厥凶



虐焚灭京都劫迁大驾于是六合云扰奸雄爍起帝自西京徂唯求定臻兹洛邑畴咨圣贤聿改乘辕又迁许昌武皇帝是依岁在元枵皇师肇征迄于鹑尾十有八载群寇歼殄九域咸乂惟帝念功祚兹魏国大启土宇爰及文皇帝齐圣广渊仁声旁流柔远能迓殊俗向义干精承祚坤灵吐曜稽极玉衡允膺历数度于轨仪克厌帝心乃仰钦七政俯察五典弗采四岳之谋不俟师锡之举幽赞神明承天禅位祚建朕躬统承洪业盖闻昔帝尧元愷既举凶族未流登舜百揆然后百揆时序内平外成授位明堂退终天禄故能冠德百王表功高岳自往迄今弥历七代岁暨三千而大运来复庸命底绩纂我民主作建皇极念重光绍咸池继韶夏超群后之遐踪邈商周之□德可谓高朗令终昭明洪烈之懿盛者矣非夫汉魏与天地合德与四时合信动和民神格于上下其孰能至于此乎朕惟孝献享年不永钦若顾命考之典谟恭述皇考先灵遗意阐崇弘溢奉成圣美以章希世同符之隆以传亿载不朽之荣魂而有灵嘉兹弘休呜呼哀哉八月壬申葬于山阳国陵曰禅陵置园邑葬之日帝制锡衰弁经哭之恻适孙桂氏乡侯康嗣立为山阳公 按王肃传青龙中山阳公薨汉主也肃上疏曰昔唐禅虞虞禅夏皆终三年之丧然后践天子之尊是以帝号无亏君礼犹存今山阳公承顺天命允答民望进禅大魏退处宾位公之奉魏不敢不尽节魏之待公优崇而不臣既至其薨椁敛之制輿徒之饰皆同之于王者是故远近归仁以为盛美且汉总帝皇之号号曰皇帝有别称帝无别称皇则皇是其差轻者也故当高祖之时土无二王其父见在而使称皇明非二王之嫌也况今以赠终可使称皇以配其溢明帝不从使称皇乃追溢曰汉孝献皇帝

陈留王景元元年故汉献帝夫人节薨追溢献穆皇后

按三国志魏陈留王本纪景元元年夏六月己未故

汉献帝夫人节薨帝临于华林园使使持节追谥夫人为献穆皇后及葬车服制度皆如汉氏故事

咸熙元年封汉帝禅为安乐公

按三国志魏陈留王本纪景元四年冬十一月蜀主刘禅诣邓艾降巴蜀皆平咸熙元年春三月丁亥封刘禅为安乐公 按蜀后主传炎兴元年冬邓艾破卫将军诸葛瞻于口竹用光禄大夫樵周策降于艾艾至城北后主舆榭自缚诣军垒门艾解缚焚榭延请相见因承制拜后主为骠骑将军诸围守悉被后主敕然后降下艾使后主止其故宫身往造焉明年春正月后主举家东迁既至洛阳策命之曰惟景元五年三月丁亥皇帝临轩使太常嘉命刘禅为安乐县公于戏其进听朕命盖统天载物以咸宁为大光宅天下以时雍为盛故孕育群生者君人之道也乃顺承天者坤元之义也上下交畅然后万物协和庶类获义乃者汉氏失统六合震扰我太祖承运龙兴弘济八极是用应天顺民抚有区夏于时乃考因群杰虎争九服不静乘间阻远保据庸蜀遂使西隅殊封方外壅隔自是已来干戈不戢元元之民不得保安其性几将五纪朕永惟祖考遗志思在绥辑四海率土同轨故爰整六师耀威梁益公恢崇德度深秉大正不惮屈身委质以爱民全国为贵降心回虑应机豹变履信思顺以享左右无疆之休岂不远软朕嘉与君公长飡显禄用考咨前训开国胙土率遵旧典锡兹元牡苴以白茅永为魏藩辅往钦哉公其祇服朕命克广德心以终乃显烈食邑万户赐绢万匹奴婢百人他物称是子孙为三都尉封侯者五十余人尚书令樊建侍中张绍光禄大夫樵周秘书令郗正殿中督张通口封列侯公太始七年薨于洛阳

注

汉晋春秋曰司马文王与禅宴为之作故蜀技

旁人皆为之感怆而禅嬉笑自若王谓贾充曰人之无情乃可至于是乎虽使诸葛亮在不能辅之久全而况姜维邪充曰不如是殿下何由并之他

日王问禅曰颇思蜀否禅曰此间乐不思蜀郗正闻之求见禅曰若王复问宜泣而答曰先人坟墓远在陇蜀乃心西悲无日不思因闭其目会王复问对如前王曰何乃似郗正语邪禅惊视曰诚如尊命左右皆笑蜀纪云谥曰思公子恂嗣

按通鉴纲目元帝咸熙元年禅举家迁洛阳大臣无从者惟秘书令郗正及殿中督张通舍妻子单身从行正相导宜适举动无阙禅乃慨然叹息恨知正之晚魏封禅为安乐公

### 晋

武帝泰始元年封魏帝为陈留王并赐山阳安乐二公子弟为驸马都尉

按晋书武帝本纪泰始元年冬十二月景寅设坛于南郊百僚在位及匈奴南单于四夷会者数万人升坛受禅礼毕即洛阳宫幸太极前殿丁卯封魏帝为陈留王邑万户居于邺宫魏氏诸王皆为县侯己巳诏陈留王载天子旌旗备五时副车行魏正朔郊祀天地礼乐制度皆如魏旧上书不称臣赐山阳公刘康安乐公刘禅子弟一人为驸马都尉

泰始二年诏陈留王非有大事王官表上之有司奏魏宜用前代正朔服色罢山阳公国督军

按晋书武帝本纪二年夏五月戊辰诏曰陈留王操尚谦冲每事辄表非所以优崇之也主者喻意非大事皆使王官表上之秋九月戊戌有司奏大晋继三王之踪蹈舜禹之迹应天顺时受禅有魏宜一用前代正朔服色皆如虞遵唐故事奏可冬十一月罢山阳公国督军除其禁制

泰始三年山阳公来朝有司奏以陈留王山阳公卫公备三恪之礼

按晋书武帝本纪三年冬十二月山阳公刘康来朝按杜佑通典泰始三年太常上言博士祭酒刘□等议汉魏为二王后夏殷周之后为三恪卫公署于前代为二王后于大晋在三恪之数应降称侯祭祀制度宜与五等公侯同有司奏陈留王山阳公为二代

之后卫公备三恪之礼易称有不速之客三人来此  
则以三为断不及五代也

泰始四年增置山阳公官属鼓吹车马

按晋书武帝本纪四年春二月庚子增置山阳公国  
相郎中令陵令杂工宰人鼓吹车马各有差

泰始七年安乐公刘禅卒

按晋书武帝本纪不载 按通鉴纲目七年冬十一  
月晋安乐公刘禅卒

明帝太宁三年秋七月诏详议三恪应立后者

按晋书明帝本纪太宁三年秋七月诏曰三恪二王  
世代之所重兴灭继绝政道之所先禋祀不传甚用  
怀伤主者其详议诸应立后者以闻

成帝咸康二年诏求卫公山阳公近属以承祀

按晋书成帝本纪咸康二年冬十月诏曰历观先代  
莫不崇明祀宾礼三恪故杞宋启土光于周典宗

姬侯卫垂美汉册自顷丧乱庶邦殄悴周汉之后绝  
而莫继其详求卫公山阳公近属有履行修明可以  
继承其祀者依旧典施行

穆帝升平元年陈留王表称疾废积年求立后廷议  
不依

按晋书穆帝本纪不载 按杜佑通典升平元年陈  
留王劬表称废疾积年不可以奉祭祀请依春秋之  
义求以立后太学博士曹耽议春秋之义后立子以  
贵不以长盖以为宗庙主故也晋公族穆子有废疾  
以让其弟卫襄公嗣子絜足不能行立其弟晋卫皆  
废嫡立庶者明臣之义终无执祭朝见之期以之居  
位违犯情礼故也礼有故使人摄祭非终身疾者劬  
为君王故事未有诸侯以疾去国成比胡讷议孟絜  
立弟异于陈留二王之后礼不宜废太常王彪之奏  
臣按讷耽二议为许其所陈也各无明文臣以为经  
史所记未有南面称孤而以疾病退为庶人者也劬  
篡封先代近四十年位在朝宾今以疾退既废之后  
若同庶人则名贱而役口处以朝官则职替而班下  
以旧礼则制重而无位量兹三义莫知其礼宗庙享

祭礼有假摄古今依礼行之有由来矣

升平二年冬十月乙丑陈留王曹励薨

按晋书穆帝本纪云云

哀帝兴宁元年冬十月甲申立陈留王世子恢为王

按晋书哀帝本纪云云

孝武帝太元三年夏五月庚午陈留王曹恢薨

按晋书孝武帝本纪云云

太元八年十一月壬子立陈留王世子灵诞为陈留王

按晋书孝武帝本纪云云

太元十二年依廷议皇太子班次宜在陈留王之下  
陈留王朝会应有常次

按晋书孝武帝本纪不载 按杜佑通典太元十二年博士庾弘之等议陈留王前代之后遇以上宾之礼皇太子虽国之储副在人臣之位今谓班次宜在王下又按仆射王彪之以为禅让之始王与继嗣之末孙降杀殊矣是以春秋之会杞不异列宋不殊位今陈留王朝会自任其来则无绳墨之准既以来朝则应有常次至于大会升殿虽在上位亦无殊别之座名同朝录将事有例且朝录盖是纪官名之简制曰可

注

时陈留嗣王薨王彪之议山阳公薨故事给绢

二百匹山阳公于今稍远可特给布绢二百匹钱

三十万宜小优于山阳也

宋

高祖永初元年封晋帝为零陵王

按宋书高祖本纪永初元年夏六月丁卯即皇帝位封晋帝为零陵王令食一郡载天子旌旗乘五时副车行晋正朔郊祀天地礼乐制度皆用晋典上书不为表答表不称诏

永初二年零陵王薨丧礼一依魏明帝服山阳公故事

按宋书高祖本纪二年秋九月己丑零陵王薨车驾



三朝率百僚举哀于朝堂一依魏明帝服山阳公故事太尉持节监护葬以晋礼 按褚叔度传叔度长兄秀之秀之妹恭帝后也高祖受命徙太常秀之弟淡之高祖受命为侍中兄弟口尽忠事高祖恭帝每生男辄令方便杀焉或诱赂内人或密加毒害前后非一及恭帝逊位居秣陵宫常惧见祸与褚后共止一室虑有鸩毒自煮食于口前高祖将杀不欲遣人入内令淡之兄弟视褚后褚后出别室相见兵人乃逾垣而入进药于恭帝不肯饮曰佛教自杀者不复得人身乃以被掩杀之

文帝元嘉 年荀伯子表零陵王位在陈留王上 按宋书文帝本纪不载 按荀伯子传伯子迁散骑常侍本邑大中正又上表曰伏见百官位次陈留王在零陵王上臣愚窃以为疑昔武王克殷封神农之后于焦黄帝之后于祝帝尧之后于蓊帝舜之后于陈夏后于杞殷后于宋杞陈口为列国而蓊祝焦无闻焉斯则褒崇所承优于远代之显验也是以春秋次序诸侯宋居杞陈之上考之近世事亦有征晋太始九年诏赐山阳公刘康子弟一人爵关内侯卫公姬署宋侯孔绍子一人驸马都尉又太始三年太常上博士刘口等议称卫公署于大晋在三恪之数应降称侯臣以零陵王位宜在陈留王之上上从之 元嘉十三年零陵王太妃薨追崇为皇后以晋礼葬之

按宋书文帝本纪元嘉十三年秋七月己未零陵王太妃薨追崇为晋皇后葬以晋礼

### 南齐

高帝建元元年封宋帝为汝阴王汝阴王薨以刘引嗣太妃薨追赠为后

按南齐书高帝本纪建元元年夏四月甲午即皇帝位封宋帝为汝阴王筑宫丹阳县故治行宋正朔车旗服色一如故事上书不为表答表不称诏庚子诏宋帝后蕃王诸陵宜有守卫有司奏帝陵各置长一人兵有差王陵五人嫔妃三人五月己未汝阴王薨



追谥为宋顺帝终礼依魏元晋恭帝故事冬十月丙子立彭城刘引为汝阴王奉宋帝后辛巳汝阴太妃王氏薨追赠为宋恭皇后

### 梁

武帝天监元年封萧宝义为巴陵王

按梁书武帝本纪天监元年夏四月丙寅即皇帝位封齐帝为巴陵王全食一郡载天子旌旗乘五时副车行齐正朔郊祀天地礼乐制度皆用齐典齐宣德皇后为齐文帝妃齐后王氏为巴陵王妃巴陵王薨于姑孰追谥为齐和帝终礼一依故事

按通鉴纲目梁主欲以南海郡为巴陵国徙王居之沈约曰不可慕虚名而受实祸梁主颔之乃使所亲郑伯禽诣姑孰以生金进王王曰我死不须金醇醪足矣乃饮沈醉伯禽就折杀之以萧宝义为巴陵王宝义幼有废疾不能言故独得全使奉齐祀

大同六年诏补□宋齐三代诸陵守视

按梁书武帝本纪大同六年夏四月癸未诏曰命世兴王嗣贤传业声称不朽人代徂迁二宾以位三恪义在时事浸远宿草榛芜望古兴怀言念怆然晋宋齐三代诸陵有职司者勤加守护勿令细民妄相侵毁作兵有少补使充足前无守视□可量给

### 陈

高祖永定元年奉梁王为江阴王

按陈书高祖本纪永定元年冬十月乙亥即皇帝位诏曰礼陈杞宋诗咏二客弗臣之重历代斯敦梁氏钦若人祇宪章在昔济河沈璧高谢万邦茅赋所加宜遵旧典其以江阴郡奉梁主为江阴王行梁正朔车旗服色一依前准宫馆资待务尽优隆又诏梁皇太后为江阴国太妃皇后为江阴国妃

### 北齐

孝昭帝皇建元年诏议三恪礼仪体式

按北齐书孝昭帝本纪皇建元年秋八月甲午诏曰昔武王克殷先封两代汉魏二□无废兹典及元氏统历不率旧章朕纂承大业思弘古典但二王三恪

旧说不同可议定是非列名条奏其礼仪体式亦仰议之

### 北周

孝闵帝元年春正月辛丑即天王位封魏帝为宋公  
按周书孝闵帝本纪云云

明帝元年诏元氏子女坐入为官口者悉放免

按周书明帝本纪元年冬十二月甲午诏曰善人之后犹累世获宥况魏氏以德让代终岂容不加隐恤元氏子女自坐赵贵等事以来所有没入为官口者悉宜放免

明帝二年秋九月甲辰封少师元罗为韩国公以绍魏后并录用元氏子孙

按周书明帝本纪云云 按元伟传太祖天纵宽仁性罕猜忌元氏戚属口保全之内任使布于列职孝闵践祚无替前绪明武纘业亦遵先志虽天厌魏德鼎命已迁枝叶荣茂足以逾于前代矣然简牍散亡事多湮落今录其名位可知者附于此云

柱国大将军太傅大司徒广陵王元欣

柱国大将军特进尚书令少师义阳王元子孝

尚书仆射冯翊王元季海

七兵尚书陈郡王元元

大将军淮安王元育

大将军梁王元俭

大将军尚书令少保小司徒广平郡公元赞

大将军纳言小司空荆州总管安昌郡公元则

侍中骠骑大将军开府仪同三司少师韩国公元罗

侍中骠骑大将军开府仪同三司吏部尚书鲁郡公元正

侍中骠骑大将军开府仪同三司中书监洵州刺史宜都郡公元颜子

侍中骠骑大将军开府仪同三司鄯州刺史安乐县公元寿

侍中骠骑大将军开府仪同三司武卫将军遂州刺史房陵县公元审

## 隋

文帝开皇元年以周帝为介国公

按隋书高祖本纪开皇元年春二月己巳以周帝为介国公邑五千户为隋室宾旌旗车服礼乐一如其旧上书不为表答表不称诏周氏诸王尽降为公

炀帝大业四年诏访周汉魏晋之后

按隋书炀帝本纪大业四年冬十月辛亥诏曰昔周王下车首封唐虞之裔汉帝承历亦命殷周之后皆所以立先代宪章在昔朕嗣膺景业旁求雅训有一弘益钦若令典以为周兼夏殷文质大备汉有天下车书混一魏晋沿袭风流未远口宜立后以存继绝之义有司可求其胄绪列闻

## 唐

高祖武德元年封隋帝为酈国公诏选用隋蔡王智积等子孙

按唐书高祖本纪武德元年六月乙酉奉隋帝为酈国公诏曰近世时运迁革前代亲族莫不夷绝历数有归实惟天命兴亡之效岂伊人力前隋蔡王智积等子孙皆选用之

按杜佑通典元年五月诏曰革命创制礼乐变于三王修废继绝德泽崇于二代其以莒之酈邑奉隋帝为酈公正朔服色一如旧章

太宗贞观二年诏立二王后庙置国官并给廩饩

按唐书太宗本纪贞观二年八月辛丑立二王后庙置国官

按杜佑通典二年秋八月制曰二王之后礼数宜崇寝庙不修廩饩多阙非所以追崇先代式敬国宾可令所司量置国官营立庙宇

中宗嗣圣十六年十一月制以周汉之后为二王仍封舜禹成汤之裔为三恪

即武后

永昌元年

按杜佑通典云云

神龙元年夏五月戊子复周隋二王后

按唐书中宗本纪云云

元宗天宝七载五月壬午以魏周隋为三恪

按唐书元宗本纪云云

天宝八载七月封后魏孝文十代孙元伯明为韩国公以备三恪

按唐书元宗本纪不载 按杜佑通典云云

天宝九载以商周汉为三恪废介鄴公

按唐书元宗本纪天宝九载九月辛卯以商周汉为三恪 按王勃传勃谓王者乘土王世五十数尽千年乘金王世四十九数九百年乘水王世二十数六百年乘木王世三十数八百年乘火王世二十数七百年天地之常也自黄帝至汉五运适周土复归唐唐应继周汉不可承周隋短祚乃斥晋魏以降非真主正统皆五行沴气遂作唐家千岁历武后时李嗣真请以周汉为二王后而废周隋中宗复用周隋天宝中太平久上言者多以诡异进有崔昌者采勃旧说上五行应运历请承周汉废周隋为闰右相李林甫亦赞佑之集公卿议可否集贤学士卫包起居舍人阎伯均上表曰都堂集议之夕四星聚于尾天意昭然矣于是元宗下诏以唐承汉黜隋以前帝王废介鄴公尊周汉为二王后以商为三恪京城起周武王汉高祖庙授崔昌太子赞善大夫卫包司虞员外郎

天宝十二载复魏周隋为三恪鄴介二公复旧封

按唐书元宗本纪十二载五月己酉复魏周隋为三恪 按王勃传杨国忠为右相自称隋宗建议复用魏为三恪周隋为二王后鄴介二公复旧封贬崔昌乌雷尉卫包夜郎尉阎伯均涪川尉

梁

太祖开平元年春正月戊辰封唐主为济阴王

按五代史梁太祖本纪云云

太祖开平二年以介国公为三恪鄴国公莱国公为二王后

按五代史梁太祖本纪开平二年春二月戊寅封鸿

胙卿李崧介国公为二王后冬十二月己亥以介国  
公为三恪鄗国公莱国公为二王后

### 晋

高祖天福二年春正月封唐宗室子为公及隋鄗公  
为二王后以周介公备三恪

按五代史晋高祖本纪云云

天福四年秋九月癸未封李从益为郇国公以奉唐  
后

按五代史晋高祖本纪云云

### 汉

高祖天福十二年夏五月甲午以郇国公李从益知  
南朝军国事

按五代史汉高祖本纪云云

### 宋

太祖建隆元年诏封周帝为郑王正朔服色一如旧  
制

按宋史太祖本纪显德七年太祖即皇帝位迁恭帝  
及符后于西宫易其帝号曰郑王尊符后为周太后  
正月乙巳大赦改元建隆 按礼志太祖建隆元年  
正月四日诏曰封二王之后备三恪之宾所以示子  
传孙兴灭继绝夏商之居杞宋周隋之启介鄗古先  
哲王实用兹道矧予凉德历试前朝虽周德下衰勉  
从于禅让而虞宾在位岂忘于烝尝其封周帝为郑  
王以奉周嗣正朔服色一如旧制又诏曰矧惟躬

逮事周室讴歌讼狱虽归新造之邦庙貌园陵岂忘  
旧君之礼其周朝嵩庆二陵及六庙宜令有司以时  
差官朝拜祭享永为定式仍命周宗正卿郭□行礼  
建隆三年冬十二月甲辰周郑王出居房州

按宋史太祖本纪云云

开宝元年诏周太祖世宗陵寝侧各设庙宇

按宋史太祖本纪不载 按礼志干德六年八月诏  
于周太祖世宗陵寝侧各设庙宇塑像命右赞善大  
夫王硕管勾修盖

开宝六年周郑王殂素服发哀辍朝

按宋史太祖本纪开宝六年三月乙卯朔周郑王殂于房州上素服发哀辍朝十日谥曰恭帝命还葬庆陵之侧陵曰顺陵 按礼志六年三月周郑王殂诏辍朝十日帝素服发哀于便殿十月四日葬周恭帝于顺陵诏特辍四日五日朝参

仁宗天圣六年录故虢州防御使柴贵子肃为三班奉职

按宋史仁宗本纪不载 按礼志云云

天圣七年录故太子少傅柴守礼孙咏为三班奉职并录柴氏后

按宋史仁宗本纪不载 按礼志七年录故太子少傅柴守礼孙咏为三班奉职其后又录柴氏之后曰熙曰愈曰若拙曰上善并为三班奉职曰余庆曰织为州长史助教曰贻廓等十一人复其身仍各赐钱一万又录世宗曾孙揆柔及贵曾孙日宣守礼曾孙若讷皆为三班奉职

嘉佑四年封柴咏为崇义公以奉周祀

按宋史仁宗本纪四年四月封柴氏后为崇义公给田四十顷以奉周室祀 按礼志嘉佑四年著作郎何鬲言昔舜受尧禹受舜之天下而封丹朱商均以为国宾周汉以降以及于唐莫不崇奉先代延及苗裔本朝受周天下而近代之盛莫如唐自梁以下皆不足以崇袭臣愿考求唐周之裔以备二王之后授以爵命封县立庙世世承袭永为国宾事下太常议曰古者立二王后不惟继绝兼取其明德可法五代草创载祀不永文章制度一无所考上取唐室世数已远于经不合惟周则我受禅之所自义不可废宜访求子孙如孔子后衍圣公授一京官爵以公号使专奉庙飨岁时存问赐之粟帛牲器祭服每遇时祀并从官给其庙宇亦加严饬如此则上不失继绝之义度之于今亦简而易行从之四月诏曰先王推绍天之序尚尊贤之义其后嗣宾以殊礼岂非圣人稽古报功之大典哉国家受命之元继周而王虽民灵欣戴历数允集而虞宾将逊德美丕显顷者推命



本始褒及支庶每遇南郊许奏白身一名充班行恩则厚矣而义未称将上采姚姒之旧略循周汉之典详其世嫡优以公爵异其仕进之路伸以土田之锡俾庙寝有奉飨祀不辍庶几乎春秋通三统厚先代之制矣宜令有司取柴氏谱系于诸房中推最长一人令岁时亲奉周室祀事如白身即与京主簿如为班行者即比类换文资仍封崇义公与河南府郑州合入差遣给公田十顷专管勾陵庙应缘祭飨礼料所须皆从官给如至知州资序即别与差遣却取以次近亲令袭爵授官永为定式八月太常礼院定到内殿崇班相州兵马都监柴咏于柴氏诸族最长诏换殿中丞封崇义公签书奉宁军节度判官事以奉周祀又以六庙在西京而岁时祭飨无器服之数令有司以三品服一四品服二及所当用祭器给之神宗熙宁三年春正月癸丑录唐李氏周柴氏后按宋史神宗本纪云云

熙宁四年御史台司马光请周后封郭氏不果

按宋史神宗本纪不载 按礼志熙宁四年西京留司御史台司马光言崇义公柴咏祭祀不以仪式周本郭姓世宗后侄为郭氏后今存周后则宜封郭氏子孙以奉周祀帝阅奏问王安石安石曰宋受天下于世宗柴氏也帝曰为人后者为之子安石曰为人后于异姓非礼也虽受天下于郭氏岂可以天下之故而易其姓氏所出帝然之

熙宁五年封柴若讷为崇义公

按宋史神宗本纪不载 按礼志五年正月柴咏致仕咏长子早亡嫡孙夷简当袭太常礼院言夷简有过合以次子西头供奉官若讷承袭诏以若讷为卫尉寺丞袭封崇义公签书河南府判官厅公事

徽宗重和元年诏立周恭帝后

按宋史徽宗本纪重和元年闰月丙子诏周柴氏后已封崇义公复立恭帝后以为宣义郎监周陵庙世世为国三恪 按礼志徽宗诏曰昔我艺祖受禅于周嘉佑中择柴氏旁支一名封崇义公议者谓不当

封周然禅国者周而三恪之封不及礼盖未尽除崇义公依旧外择柴氏最长见在者以其祖父为周恭帝后以其孙世世为宣义郎监周陵庙与知县请给以示继绝之仁为国三恪永为定制

高宗绍兴五年以柴叔夏袭封崇义公

按宋史高宗本纪绍兴五年夏四月壬子访得周后柴叔夏袭封崇义公

绍兴二十六年以柴国器袭封崇义公

按宋史高宗本纪不载 按礼志二十六年叔夏升知州资序别与差遣以子国器袭封令居衢州朝廷有大礼则入侍祠如故事其柴大有柴安宅亦各补官

理宗淳佑九年又以世宗八世孙柴彦□封崇义公诏求隋唐五代之后皆命官使守其祀

按宋史理宗本纪淳佑九年春正月庚申诏周世宗八世孙柴彦□补承务郎袭封崇义公 按礼志九年又以世宗八世孙柴彦□特补承务郎袭封崇义公时又求隋唐及朱氏李氏石氏刘氏郭氏之后及吴越荆南湖南蜀汉诸国之子孙皆命以官使守其祀

## 元

世祖至元十三年封宋主为瀛国公

按宋史瀛国公本纪德佑二年春正月辛未遣监察御史刘岳奉表称臣上大元皇帝尊号曰仁明神武皇帝甲申大元兵至□亭山遣监察御史杨应奎上传国玺降其表曰宋国主臣谨百拜奉表言臣眇

然幼冲遭家多难权奸似道背盟误国至勤兴师问罪臣非不能迁避以求苟全今天命有归臣将焉往谨奉太皇太后命削去帝号以两浙福建江东西湖南二广两淮四川见存州郡悉上圣朝为宗社生灵祈哀请命伏望圣慈垂念不忍臣三百余年宗社遽至陨绝曲赐存全则赵氏子孙世世有赖不敢弭亡二月辛丑率百官拜表祥曦殿诏谕郡县使降大元使者入临安府封府库收史馆礼寺图书及百司符

印告敕罢官府及侍卫军壬寅犹遣贾余庆吴坚谢堂刘岳家铉翁充祈请使是日大元军军钱塘江沙上潮三日不至三月丁丑入朝五月丙申朝于上都降封开府仪同三司瀛国公

按元史世祖本纪至元十三年春正月癸酉宋相陈宜中遣军器监刘庭瑞宋主称藩表诣军前稟议乙亥宋复遣监察御史刘岳宋主称藩表至军前为宗社生灵请命甲申军次高亭山宋主遣其保康军承宣使尹甫和州防御使吉甫等传国玉玺及降表诣军前其辞曰大宋国主谨百拜奉表于大元仁明神武皇帝陛下臣昨尝遣侍郎柳岳正言洪雷震捧表驰诣阙庭敬伸卑悃伏计已彻圣听臣焉幼冲遭家多难权奸似道背盟误国臣不及知至于兴师问罪宗社陆危生灵可念臣与太皇日夕忧惧非不欲迁辟以求两全实以百万生民之命寄臣之身今天命有归臣将焉往惟是世传之镇宝不敢爱惜谨奉太皇命戒痛自贬损削帝号以两浙福建江东西湖南北二广四川见在州郡谨悉奉上圣朝为宗社生灵祈哀请命欲望圣慈垂哀祖母太后耄及卧病数载臣茕茕在疚情有足矜不忍臣祖宗三百年宗社遽至殒绝曲赐裁处特与存全大元皇帝再生之德则赵氏子孙世世有赖不敢弭忘臣无任感天望圣激切屏营之至伯颜既受降表玉玺复遣囊加带以赵尹甫贾余庆等还临安召宰相出议降事乙酉师次临安北十五里遣宣抚程鹏飞计议孙鼎亨囊加带洪君祥入宫安谕太皇谢氏宋主祖母谢氏遣其丞相吴坚文天祥枢密谢堂安抚贾余庆中贵邓惟善来见伯颜于明因寺伯颜以其降表不称臣仍书宋号遣程鹏飞洪君祥偕来使贾余庆复往易之己丑军次湖州市遣千户囊加带省掾王佑赉传国玉玺赴阙辛卯张弘范孟祺程鹏飞赉所易宋主称臣降表至军前二月己亥克临江军庚子宋主率文武百僚诣祥曦殿望阙上表乞为藩辅遣右丞相兼枢密使贾余庆枢密使谢堂端明殿学士

签枢密院事家铉翁端明殿学士同签枢密院事刘岳奉表以闻宋主祖母太皇太后亦奉表及笺宋主遣其右丞相贾余庆等充祈请使诣阙请命右丞相命吴坚文天祥同行行中书省右丞相伯颜等以宋主举国内附具表称贺庚申召伯颜偕宋君臣入朝三月乙亥伯颜等发临安丁丑阿塔海阿剌罕董文炳诣宋主宫趣宋主同太后入覲郎中孟祺奉诏宣读至免系颈牵羊之语太后全氏闻之泣谓宋主曰荷天子圣慈活汝当望阙拜谢宋主拜毕子母皆肩舆出宫唯太皇太后谢氏以疾留庚辰囊加带以宋玉玺来上夏五月乙未朔伯颜以宋主至上都制授开府仪同三司检校大司徒封瀛国公

明

太祖洪武三年封元顺帝孙为崇礼侯

按元史顺帝本纪至正二十八年夏四月帝殁于应昌五月癸卯大明兵袭应昌府皇孙买的里八剌及后妃并宝玉皆被获皇太子爱猷识理达腊从十数骑遁大明皇帝以帝知顺天命退避而去特加其号曰顺帝而封买的里八剌为崇礼侯

按明大政纪洪武三年六月壬申左副将军李文忠遣人送俘获故元诸王买的里八剌等及其宝册至京城省臣杨宪等请以买的里八剌献俘于庙宝册令百官具朝服进上曰宝册贮之库不必进也古者虽有献俘之礼武王伐殷曾用之乎宪曰武王事殆不可知唐太宗尝行之上曰太宗是待王世充若遇隋之子孙恐不行此礼元入中国百年之内生齿甚繁家给人足朕之祖父亦预享其太平虽古有献俘之礼不忍加之只令服本俗衣以朝朝毕赐以中国衣冠就令谢恩复谓宪曰故国之妃朝于君者元有此礼不必效之亦令衣本俗衣于中宫朝见见毕赐中国之服亦令谢恩乙亥封买的里八剌为崇礼侯七月甲辰赐崇礼侯买的里八剌母妃以下镀金银首饰并纱罗布服十月辛巳遣使致书故元太子爱

猷识里达刺十二月癸亥故元主之子失笃儿国舅阿里麻思海牙驸马忙哥失等来降诏各赐第宅七年九月丁丑上谓廷臣曰草木无心遇春而茂遇秋而零落气之所感犹知荣悴况于人乎崇礼侯买的里八刺南来已五载今既长成岂无父母乡土之思宜遣之还于是厚礼而归之

三恪部汇考二

周一

陈

武王克商始封妫满于陈以备三恪

按左传襄公二十五年子产曰昔虞阼父为周陶正以服事我先王先王赖其利器用也与其神明之后也庸以元女太姬配胡公而封诸陈以备三恪

按史记周本纪武王十一年伐纣罢兵西归追思先圣王乃封帝舜之后于陈

注

正义曰括地志云陈州宛丘县在陈城中即古

陈国也帝舜后遏父为周武王陶正武王赖其器用封其子妫满于陈都宛丘之侧

按陈世家陈胡公满者虞帝舜之后也昔舜为庶人时尧妻之二女居于妫汭其后因为氏姓姓妫氏舜已崩传禹天下而舜子商均为封国夏后之时或失或续至于周武王克殷纣乃复求舜后得妫满封之于陈以奉帝舜祀是为胡公

注

索隐曰按左传虞遏父为周陶正以服事武王

杜注遏父舜之后陶正官名是生满者也

按路史胡舜裔也归姓胡公世不淫至虞阼父为周陶正武王配其子胡公满以太姬锡之妫姓与肃慎之瑶复之于陈以备三恪

厉王二十四年陈侯圉戎薨子宁立（

按世家自胡公至慎公无年可

考幽公以下始纪年数今按左传桓五年为陈桓公卒之年逆推至陈幽公宁则宁之立当在是年）



按史记陈世家胡公卒子申公犀侯立申公卒弟相公口羊立相公卒立申公子突是为孝公孝公卒子慎公圉戎立慎公当周厉王时慎公卒子幽公宁立幽公十二年周厉王奔于彘

按厉王三十七年流

于彘应为幽公十三年

厉王四十七年陈侯宁薨子孝立（

按宁自厉王二十五年纪元至此得二十三年）

按史记陈世家幽公宁二十三年卒子厘公孝立厘公六年周宣王即位

按此为初立之六

年实纪元之五年

宣王三十二年陈侯孝薨子灵立（

按孝自厉王四十八年纪元至此得三十六年）

按史记陈世家厘公孝三十六年卒子武公灵立

幽王元年陈侯灵薨子说立

按灵自宣王三十三

年纪元至此得十五年

按史记陈世家武公灵十五年卒子夷公说立是岁周幽王即位

幽王四年陈侯说薨弟燮立

按说自幽王二年

纪元至此得三年

按史记陈世家夷公说三年卒弟平公燮立平公七年周幽王为犬戎所杀周东徙秦始列为诸侯

平王十六年陈侯燮薨子圉立

按燮自幽王五年纪

元至此得二十三年

按史记陈世家平公燮二十三年卒子文公圉立

平王二十六年陈侯圉薨子鲍立（

按燮自平王十七年纪元至此得十年）



按史记陈世家文公元年取蔡女生子佗十年文公卒子桓公鲍立桓公二十三年鲁隐公初立

桓王元年夏宋陈蔡卫伐郑秋陈人执卫州吁

按春秋隐公四年 按左传四年春卫州吁□桓公而立宋殇公之即位也公子冯出奔郑郑人欲纳之及卫州吁立将修先君之怨于郑而求宠于诸侯以和其民使告于宋曰君若伐郑以除君害君为主敝邑以赋与陈蔡从则卫国之愿也宋人许之于是陈蔡方睦于卫故宋公陈侯蔡人卫人伐郑围其东门五日而还州吁未能和其民厚问定君于石子石子曰王觐为可曰何以得觐曰陈桓公方有宠于王陈卫方睦若朝陈使请必可得也厚从州吁如陈石碏使告于陈曰卫国褊小老夫耄矣无能为也此二人者实□寡君敢即图之陈人执之而请□于卫九月卫人使右宰丑□杀州吁于濮石碏使其宰獯羊肩□杀石厚于陈

桓王三年夏五月郑侵陈

按春秋不书 按左传隐公六年夏五月庚申郑伯侵陈大获往岁郑伯请成于陈陈侯不许五父谏曰亲仁善邻国之宝也君其许郑陈侯曰宋卫实难郑何能为遂不许

桓王四年冬十二月陈及郑平

按春秋不书 按左传隐公七年冬陈及郑平十二月陈五父如郑□盟壬申及郑伯盟敌如忘泄伯曰五父必不免不赖盟矣郑良佐如陈□盟辛巳及陈侯盟亦知陈之将乱也郑公子忽在王所故陈侯请妻之郑伯许之乃成□

桓王五年夏四月甲辰郑公子忽如陈逆妇妣

按春秋不书 按左传隐公八年夏四月甲辰郑公子忽如陈逆妇妣辛亥以妣氏归甲寅入于郑陈针子送女先配而后祖针子曰是不为夫妇诬其祖矣非礼也何以能育

桓王十年春三月齐侯鲁侯陈侯郑伯会于稷以成宋乱

按春秋桓公二年

桓王十三年春正月甲戌己丑陈侯鲍卒公子佗杀太子免而自立夏葬陈桓公秋蔡人卫人陈人从王伐郑

按春秋桓公五年 按左传五年春正月甲戌己丑陈侯鲍卒再赴也于是陈乱文公子佗杀太子免而代之公疾病而乱作国人分散故再赴夏王夺郑伯政郑伯不朝秋王以诸侯伐郑郑伯御之王为中军虢公林父将右军蔡人卫人属焉周公黑肩将左军陈人属焉郑子元请为左拒以当蔡人卫人为右拒以当陈人曰陈乱民莫有斗心若先犯之必奔王卒顾之必乱蔡卫不枝固将先奔既而萃于王卒可以集事从之曼伯为右拒祭仲足为左拒原繁高渠弥以中军奉公为鱼丽之陈先偏后伍伍承弥缝战于繻葛命二拒曰旂动而鼓蔡卫陈皆奔王卒乱郑师合以攻之王卒大败祝聃射王中肩王亦能军祝聃请从之公曰君子不欲多上人况敢陵天子乎苟自救也社稷无陨多矣夜郑伯使祭足劳王且问左右按史记陈世家桓公弟佗其母蔡女故蔡人为佗杀五父及桓公太子免而立佗是为厉公

桓王十四年秋蔡人杀陈佗而立桓公之子跃

按春秋桓公六年

注

佗立逾年不称爵者篡立未会诸侯也

按公羊传蔡人杀陈佗陈佗者何陈君也陈君则曷为谓之陈佗绝也曷为绝之贱也其贱奈何外淫也恶乎淫淫乎蔡蔡人杀之 按谷梁传蔡人杀陈佗陈佗者陈君也其曰陈佗何也匹夫行故匹夫称之也其匹夫行奈何陈侯口猎淫猎于蔡与蔡人争禽蔡人不知其是陈君也而杀之何以知其是陈君也两下相杀不道其不地于蔡也

按史记陈世家厉公取蔡女蔡女与蔡人乱厉公数如蔡淫七年厉公所杀桓公太子免之三弟长曰跃中曰林少曰杵臼共令蔡人诱厉公以好女与蔡女

共杀厉公而立跃是为利公利公者桓公子也  
桓王十九年秋九月宋公陈侯鲁公子柔蔡叔盟于折

按春秋桓公十一年

桓王二十年秋八月陈侯跃薨弟林立

按春秋桓公十二年

注

厉公也十一年与鲁大夫盟于折不书葬鲁不会也

按史记陈世家利公立五月卒中弟林立

桓王二十二年冬十二月宋人以齐人蔡人卫人陈人伐郑

按春秋桓公十四年

桓王二十三年冬十一月宋公卫侯陈侯鲁侯会于袤伐郑

按春秋桓公十五年 按左传十五年冬会于袤谋伐郑将纳厉公也弗克而还

庄王元年夏四月宋公鲁侯卫侯陈侯蔡侯伐郑

按春秋桓公十六年

庄王二年秋八月蔡季自陈归于蔡

按春秋桓公十七年 按左传十七年夏蔡桓侯卒蔡人召蔡季于陈秋蔡季自陈归于蔡蔡人嘉之也

注

季蔡侯弟也言归为陈所纳

庄王四年冬十月乙亥陈侯林薨弟杵臼立

按春秋庄公元年

庄王五年春二月葬陈庄公

按春秋庄公二年

庄王七年夏齐侯陈侯郑伯遇于垂

按春秋庄公四年

庄王八年冬鲁侯会齐人宋人陈人蔡人伐卫

按春秋庄公五年 按左传五年冬伐卫纳惠公也

庄王十一年春正月鲁师次于郎以俟陈人蔡人

按春秋庄公八年

庄王十五年冬十月宋万出奔陈

按春秋庄公十二年 按左传十二年秋宋万弑闵公于蒙泽冬南宫万奔陈宋人请于陈以赂陈人使妇人饮之酒而以犀革裹之比及宋手足皆见

僖王元年春齐侯宋人陈人蔡人邾人会于北杏

按春秋庄公十三年 按左传十三年春会于北杏以平宋乱

僖王二年春齐人陈人曹人伐宋

按春秋庄公十四年

僖王三年春齐侯宋公陈侯卫侯郑伯会于鄆

按春秋庄公十五年

僖王四年冬十二月齐侯宋公陈侯鲁侯卫侯郑伯许男滑伯滕子同盟于幽

按春秋庄公十六年 按左传十六年冬同盟于幽郑成也

注

陈国小每盟会皆在卫下齐桓始霸楚亦始强

陈侯介于二大国之间而为三恪之客故齐桓因而进之遂班在卫上终于春秋

惠王元年春逆王后于陈

按春秋不书 按左传庄公十八年春虢公晋侯郑伯使原庄公逆王后于陈陈妫归于京师实惠后

惠王二年秋鲁公子结媵陈人之妇于鄆遂及齐侯宋公盟冬齐人宋人陈人伐鲁西鄙

按春秋庄公十九年

惠王五年春陈人杀其公子御寇陈公子完与顓孙奔齐

按春秋庄公二十二年公子完顓孙奔齐不书 按左传二十二年春陈人杀其太子御寇陈公子完与顓孙奔齐顓孙自齐来奔齐侯使敬仲为卿辞曰羈旅之臣幸若获宥及于宽政赦其不闲于教训而免于罪戾弛于负担君之惠也所获多矣敢辱高位以速官谤请以死告诗云翘翘车乘招我以弓岂不欲往畏我友朋使为工正饮桓公酒乐公曰以火继之

辞曰臣卜其昼未卜其夜不敢君子曰酒以成礼不继以淫义也以君成礼弗纳于淫仁也初懿氏卜妻敬仲其妻占之曰吉是谓凤皇于飞和鸣锵锵有妣之后将育于姜五世其昌并于正卿八世之后莫之与京陈厉公蔡出也故蔡人杀五父而立之生敬仲其少也周史有以周易见陈侯者陈侯使筮之遇观之否曰是谓观国之光利用宾于王此其代陈有国乎不在此其在异国非此其身在其子孙光远而自他有耀者也坤土也巽风也干天也风为天于土上山也有山之材而照之以天光于是乎居土上故曰观国之光利用宾于王庭实旅百奉之以玉帛天地之美具焉故曰利用宾于王犹有观焉故曰其在后乎风行而着于土故曰其在异国乎若在异国必姜姓也姜大岳之后也山岳则配天物莫能两大陈衰此其昌乎及陈之初亡也陈桓子始大于齐其后亡也成子得政

惠王七年冬戎侵曹曹羈出奔陈

按春秋庄公二十四年

惠王八年春陈侯使女叔聘于鲁冬鲁公子友如陈

按春秋庄公二十五年 按左传二十五年春陈女叔来聘始结陈好也

注

季友相鲁原仲相陈二人有旧故女叔来聘季

友冬亦报聘嘉好接备卿以字为嘉则称名其常也

惠王十年夏六月齐侯宋公鲁侯陈侯郑伯同盟于幽秋鲁公子友如陈葬原仲

按春秋庄公二十七年 按左传二十七年夏同盟于幽陈郑服也秋公子友如陈葬原仲原仲季友之旧也

惠王十五年冬十月鲁子般卒成季奔陈

按春秋庄公三十二年 按左传三十二年冬十月己未共仲使圉人葷贼子般于党氏成季奔陈

惠王十六年秋八月鲁请复季友于陈

按春秋闵公元年 按左传元年秋八月公及齐侯盟于落姑请复季友也齐侯许之使召诸陈公次于郎以待之

惠王十七年冬十二月郑高克奔陈

按春秋不书 按左传闵公元年冬郑人恶高克使帅师次于河上久而弗召师溃而归高克奔陈郑人为之赋清人

惠王二十一年春正月齐侯宋公陈侯鲁侯卫侯郑伯许男曹伯侵蔡蔡溃遂伐楚次于陜夏楚屈完来盟于召陵齐人执陈轅涛涂秋鲁人江人黄人伐陈冬十二月鲁公孙兹齐人宋人卫人郑人许人曹人侵陈

按春秋僖公四年 按左传四年春齐侯以诸侯之师侵蔡蔡溃遂伐楚师进次于陜夏楚子使屈完如师师退次于召陵齐侯陈诸侯之师与屈完乘而观之屈完及诸侯盟陈轅涛涂谓郑申侯曰师出于陈郑之间国必甚病若出于东方观兵于东夷循海而归其可也申侯曰善涛涂以告齐侯许之申侯见曰师老矣若出于东方而遇敌惧不可用也若出于陈郑之间共其资粮靡屨其可也齐侯说与之虎牢执轅涛涂秋伐陈讨不忠也冬叔孙戴伯帅师会诸侯之师侵陈陈成归轅涛涂 按公羊传涛涂之罪何辟军之道也其辟军之道奈何涛涂谓桓公曰君既服南夷矣何不还师滨海而东服东夷且归桓公曰诺于是还师滨海而东大陷于沛泽之中顾而执涛涂执者曷为或称侯或称人称侯而执者伯讨也称人而执者非伯讨也此执有罪何以不得为伯讨古者周公东征则西国怨西征则东国怨桓公假道于陈而伐楚则陈人不欲其反由己者师不正故也不修其师而执涛涂古人之讨则不然也

惠王二十二年夏齐侯宋公陈侯鲁侯卫侯郑伯许男曹伯会王世子于首止秋八月诸侯盟于首止郑伯逃归不盟

按春秋僖公五年 按左传五年夏会于首止会王



太子郑谋宁周也

惠王二十三年夏齐侯宋公陈侯鲁侯卫侯曹伯伐郑围新城秋楚人围许诸侯遂救许

按春秋僖公六年 按左传六年夏诸侯伐郑以其逃首止之盟故也围新密郑所以不时城也秋楚子围许以救郑诸侯救许乃还

惠王二十四年秋七月齐侯宋公鲁侯陈世子款郑世子华盟于□母

按春秋僖公七年 按左传七年秋盟于□母谋郑故也

惠王二十五年春正月王人齐侯宋公鲁侯卫侯许男曹伯陈世子款盟于洮郑伯乞盟

按春秋僖公八年 按左传八年春盟于洮谋王室也郑伯乞盟请服也

襄王四年冬十二月陈侯杵臼薨子款立

按春秋僖公十二年

襄王五年夏四月葬陈宣公齐侯宋公陈侯鲁侯卫侯郑伯许男曹伯会于咸

按春秋僖公十三年 按左传十三年夏会于咸淮夷病杞故且谋王室也秋为戎难故诸侯戍周齐仲孙湫致之

襄王七年春三月齐侯宋公陈侯鲁侯卫侯郑伯许男曹伯盟于牡丘且救徐

按春秋僖公十五年 按左传十五年春楚人伐徐徐即诸夏故也三月盟于牡丘寻葵丘之盟且救徐也孟穆伯帅师及诸侯之师救徐诸侯次于匡以待之

襄王八年冬十二月齐侯宋公陈侯鲁侯卫侯郑伯许男邢侯曹伯会于淮

按春秋僖公十六年 按左传十六年冬十二月会于淮谋郟且东略也

襄王十一年冬鲁侯陈人蔡人楚人郑人盟于齐

按春秋僖公十九年 按左传十九年秋陈穆公请修好于诸侯以无忘齐桓之德冬盟于齐修桓公之

好也

襄王十三年秋宋公楚子陈侯蔡侯郑伯许男曹伯  
会于孟执宋公纽伐宋

按春秋僖公二十一年

襄王十五年秋楚人伐陈

按春秋僖公二十三年 按左传二十三年秋楚成  
得臣帅师伐陈讨其贰于楚也

襄王十七年秋楚人围陈纳顿子于顿

按春秋僖公二十五年 按左传二十五年秋秦晋  
伐郟楚斗克屈御寇以申息之师戍商密秦人过析  
隈入而系輿人以围商密昏而傅焉宵坎血加书伪  
与子仪子边盟者商密人惧曰秦取析矣戍人反矣  
乃降秦师秦师囚申公子仪息公子边以归楚令尹  
子玉追秦师弗及遂围陈纳顿子于顿

襄王十九年冬楚人陈侯蔡侯郑伯许男围宋十二  
月甲戌鲁侯会诸侯盟于宋

按春秋僖公二十七年 按左传二十七年冬楚子  
及诸侯围宋宋公孙固如晋告急

襄王二十年夏四月卫侯奔楚适陈五月晋侯齐侯  
宋公鲁侯蔡侯郑伯卫子莒子盟于践土陈侯如会  
六月陈侯款薨子朔立冬晋侯齐侯宋公鲁侯蔡侯  
郑伯陈子莒子邾人秦人会于温诸侯遂围许

按春秋僖公二十八年卫侯适陈不书 按左传二  
十八年夏四月卫侯闻楚师败惧出奔楚遂适陈冬  
会于温讨不服也丁丑诸侯围许遂会诸侯于许

襄王二十一年夏六月王子虎鲁侯晋人宋人齐人  
陈人蔡人秦人盟于翟泉

按春秋僖公二十九年 按左传二十九年夏公会  
王子虎晋狐偃宋公孙固齐国归父陈辕涛涂秦小  
子憖盟于翟泉寻践土之盟且谋伐郑也

襄王二十五年冬十二月晋人陈人郑人伐许

按春秋僖公三十三年 按左传三十三年冬晋陈  
郑伐许讨其贰于楚也楚令尹子上侵陈蔡陈蔡成  
遂伐郑将纳公子瑕门于桔柣之门瑕覆于周氏之

汪外仆髡屯禽之以献文夫人敛而葬之郟城之下  
襄王二十七年夏六月宋公陈侯郑伯晋士穀鲁公  
孙敖盟于垂陇冬晋人宋人陈人郑人伐秦

按春秋文公二年 按左传二年春公如晋未至夏  
六月穆伯会诸侯及晋司空士穀盟于垂陇晋讨卫  
故也书士穀堪其事也陈侯为卫请成于晋执孔达  
以说冬晋先且居宋公子成陈辕选郑公子归生伐  
秦取汪及彭衙而还以报彭衙之役卿不书为穆公  
故尊秦也谓之崇德

襄王二十八年春正月鲁叔孙得臣晋人宋人陈人  
卫人郑人伐沉沉溃卫侯如陈

按春秋文公三年卫侯如陈不书 按左传三年春  
庄叔会诸侯之师伐沈以其服于楚也卫侯如陈拜  
晋成也

襄王三十一年夏季孙行父如陈

按春秋文公六年 按左传六年臧文仲以陈卫之  
睦也欲求好于陈夏季文子聘于陈且娶焉

襄王三十二年秋八月诸侯晋大夫盟于扈

按春秋文公七年 按左传七年秋八月齐侯宋公  
卫侯陈侯郑伯许男曹伯会晋赵盾盟于扈晋侯立  
故也公后至

顷王元年夏楚侵陈陈及楚平

按春秋不书 按左传文公九年夏楚侵陈克壶丘  
以其服于晋也秋楚公子朱自东夷伐陈陈人败之  
获公子蔑陈惧乃及楚平

顷王二年秋七月陈郑会楚于息

按春秋不书 按左传文公十年秋七月陈侯郑伯  
会楚于息冬遂及蔡侯次于厥貉将以伐宋

顷王五年夏陈侯朔薨子平国立

按春秋文公十三年

顷王六年夏六月癸酉宋公陈侯鲁侯卫侯郑伯许  
男曹伯晋赵盾同盟于新城

按春秋文公十四年 按左传十四年夏六月同盟  
于新城从于楚者服且谋邾也

注

从楚者陈郑宋

匡王三年春晋人卫人陈人郑人伐宋

按春秋文公十七年 按左传十七年春晋荀林父卫孔达陈公孙宁郑石楚伐宋讨曰何故□君犹立文公而还

匡王五年秋楚子郑人侵陈遂侵宋晋赵盾帅师救陈宋公陈侯卫侯曹伯会晋师于棐林伐郑冬晋人宋人伐郑

按春秋宣公元年 按左传元年陈共公之卒楚人不礼焉陈灵公受盟于晋秋楚子侵陈遂侵宋晋赵盾帅师救陈宋会于棐林以伐郑也

匡王六年夏晋人宋人卫人陈人侵郑

按春秋宣公二年 按左传二年夏晋赵盾救焦遂自阴地及诸侯之师侵郑以报

定王三年冬陈及楚平晋伐陈

按春秋不书 按左传宣公五年冬楚子伐郑陈及楚平晋荀林父救郑伐陈

定王四年春晋赵盾卫孙免侵陈

按春秋宣公六年 按左传六年春晋卫侵陈陈即楚故也

定王六年冬楚师伐陈

按春秋宣公八年 按左传八年冬陈及晋平楚师伐陈取成而还

定王七年秋九月晋荀林父帅师伐陈冬陈杀其大夫泄冶

按春秋宣公九年 按左传九年秋会于扈讨不睦也陈侯不会晋荀林父以诸侯之师伐陈晋侯卒于扈乃还冬陈灵公与孔宁仪行父通于夏姬皆衷其衽服以戏于朝泄冶谏曰公卿宣淫民无效焉且闻不令君其纳之公曰吾能改矣公告二子二子请杀之公弗禁遂杀泄冶孔子曰诗云民之多辟无自立辟其泄冶之谓乎

定王八年夏四月陈夏征舒□其君平国子午立

按春秋宣公十年 按左传十年夏陈灵公与孔宁仪行父饮酒于夏氏公谓行父曰征舒似女对曰亦似君征舒病之公出自其口射而杀之二子奔楚定王九年夏楚子陈侯郑伯盟于辰陵冬十月楚人杀陈夏征舒丁亥楚子入陈纳公孙宁仪行父于陈按春秋宣公十一年 按左传十一年春楚子伐郑及栎子良曰晋楚不务德而兵争与其来者可也晋楚无信我焉得有信乃从楚夏楚盟于辰陵陈郑服也冬楚子为陈夏氏乱故伐陈谓陈人无动将讨于少西氏遂入陈杀夏征舒轘诸栗门因县陈陈侯在晋申叔时使于齐反复命而退王使让之曰夏征舒为不道口其君寡人以诸侯讨而戮之诸侯县公皆庆寡人女独不庆寡人何故对曰犹可辞乎王曰可哉曰夏征舒口其君其罪大矣讨而戮之君之义也抑人亦有言曰牵牛以蹊人之田而夺之牛牵牛以蹊者信有罪矣而夺之牛罚已重矣诸侯之从也曰讨有罪也今县陈贪其富也以讨召诸侯而以贪归之无乃不可乎王曰善哉吾未之闻也反之可乎对曰可哉吾侪小人所谓取诸其怀而与之也乃复封陈乡取一人焉以归谓之夏州

按国语定王使单襄公聘于宋遂假道于陈以聘于楚火朝觐矣道弗可行也侯不在疆司空不视涂泽不陂川不梁野有庾积场功未毕道无列树垦田若蓺膳宰不致飴司里不授馆国无寄寓县无施舍民将筑台于夏氏及陈陈灵公与孔宁仪行父南冠以如夏氏留宾弗见单子归告王曰陈侯不有大咎国必亡王曰何故对曰夫辰角见而雨毕天根见而水涸木见而草木节解驷见而陨霜火见而清风戒寒故先王之教曰雨毕而除道水涸而成梁草木节解而备藏陨霜而冬裘具清风至而修城郭宫室故夏令曰九月除道十月成梁其时傲曰收而场功恃而畚揭营室之中土功其始火之初见期于司里此先王之所以不用财贿而广施德于天下者也今陈国火朝觐矣而道路若塞野场若弃泽不陂障川无

舟梁是废先王之教也周制有之曰列树以表道立鄙食以守路国有郊牧□有寓望藪有圃草囿有林池所以御灾也其余无非穀土民无县耜野无奥草不夺民时不蔑民功有优无匮有逸无罢国有班事县有序民今陈国道路不可知田在草间功成而不收民罢于逸乐是弃先王之法制者也周之秩官有之曰敌国宾至关尹以告行理以节逆之候人为导卿出郊劳门尹除门宗祝执祀司里授馆司徒具徒司空视涂司寇诘奸虞人入村甸人积薪火师监燎水师监濯膳宰致餐廩人献饩司马陈刍工人展车百官各以物至宾入如归是故小大莫不怀爱其贵国之宾至则以班加一等益虔至于王使则皆官正□事上卿监之若王巡守则君亲监之今虽朝也不才有分族于周承王命以为过宾于陈而司事莫至是蔑先王之官也先王之令有之曰天道赏善而罚淫故凡我造国无从非彝无即慝淫各守尔典以承天休今陈侯不念嗣续之常弃其伉俪妃嫔而帅其卿佐以淫于夏氏不亦渎姓矣乎陈我大姬之后也弃衮冕而南冠以出不亦简彝乎是又犯先王之令也昔先王之教茂帅其德也犹恐陨越若废其教而弃其制蔑其官而犯其令将何以守国居大国之间而无此四者其能久乎六年单子如楚八年陈侯杀于夏氏九年楚子入陈

按史记陈世家楚庄王善申叔时之言乃迎陈灵公太子午于晋而立之复君陈如故是为成公孔子读史记至楚复陈曰贤哉楚庄王轻千乘之国而重一言

定王十年春葬陈灵公冬十二月宋师伐陈卫人救陈

按春秋宣公十二年 按左传十二年冬晋原穀宋华椒卫孔达曹人同盟于清丘曰恤病讨贰宋为盟故伐陈卫人救之孔达曰先君有约言焉若大国讨我则死之

定王十八年冬十一月鲁侯楚人秦人宋人陈人卫



人郑人齐人曹人邾人薛人鄆人盟于蜀

按春秋成公二年

简王四年秋楚侵陈

按春秋不书 按左传成公九年秋郑伯如晋晋人讨其贰于楚也执诸铜鞮栾书伐郑郑人使伯蠲行成晋人杀之楚子重侵陈以救郑

简王十一年晋荀罃以诸侯之师侵陈

按春秋不书 按左传成公十六年秋七月诸侯迁于制田知武子佐下军以诸侯之师侵陈至于鸣鹿

简王十四年夏五月晋人以诸侯之师侵陈

按春秋不书 按左传襄公元年夏五月晋韩厥荀偃帅诸侯之师伐郑入其郛败其徒兵于洧上于是东诸侯之师次于鄆以待晋师晋师自郑以鄆之师侵楚焦夷及陈晋侯卫侯次于戚以为之援

灵王二年夏六月陈侯使袁侨如会诸侯之大夫及陈袁侨盟楚何忌侵陈

按春秋襄公三年楚侵陈不书 按左传三年夏六月楚子辛为令尹侵欲于小国陈成公使袁侨如会求成晋侯使和鉏父告于诸侯秋叔孙豹及诸侯之大夫及陈袁侨盟陈请服也楚司马公子何忌侵陈陈叛故也

灵王三年春三月己酉陈侯午薨子弱立秋七月葬陈成公冬陈人围顿

按春秋襄公四年 按左传四年春楚师为陈叛故犹在繁阳韩献子患之言于朝曰文王帅殷之叛国以事纣唯知时也今我易之难哉三月陈成公卒楚人将伐陈闻丧乃止陈人不听命臧武仲闻之曰陈不服于楚必亡大国行礼焉而不服在大犹有咎而况小乎夏楚彭名侵陈陈无礼故也冬楚人使顿间陈而侵伐之故陈人围顿

灵王四年秋晋侯宋公陈侯鲁侯卫侯郑伯曹伯莒子邾子滕子薛伯齐世子光吴人鄆人会于戚冬戍陈楚公子贞帅师伐陈晋侯宋公鲁侯卫侯郑伯曹伯齐世子光救陈

按春秋襄公五年 按左传五年秋楚人讨陈叛故曰由令尹子辛实侵欲焉乃杀之九月丙午盟于戚会吴且命戍陈也穆叔以属鄙为不利使鄙大夫听命于会楚子囊为令尹范宣子曰我丧陈矣楚人讨贰而立子囊必改行而疾讨陈陈近于楚民朝夕急能无往乎有陈非吾事也无之而后可冬诸侯戍陈子囊伐陈十一月甲午会于城棣以救之

灵王六年冬十月楚公子贞帅师围陈十二月晋侯宋公陈侯鲁侯卫侯曹伯莒子邾子会于鄆

按春秋襄公七年 按左传七年冬楚子囊围陈会于鄆以救之陈人患楚庆虎庆寅谓楚人曰吾使公子黄往而执之楚人从之二庆使告陈侯于会曰楚人执公子黄矣君若不来群臣不忍社稷宗庙惧有二图陈侯逃归

灵王十六年春宋人伐陈秋九月宋华臣出奔陈

按春秋襄公十七年 按左传十七年春宋庄朝伐陈获司徒印卑宋也

灵王十九年秋陈侯之弟黄出奔楚

按春秋襄公二十年 按左传二十年秋陈庆虎庆寅畏公子黄之逼诉诸楚曰与蔡司马同谋楚人以为讨公子黄出奔楚初蔡文侯欲事晋曰先君与于践土之盟晋不可弃且兄弟也畏楚不能行而卒楚人使蔡无常公子燮求从先君以利蔡不能而死书曰蔡杀其大夫公子燮言不与民同欲也陈侯之弟黄出奔楚言非其罪也公子黄将出奔呼于国曰庆氏无道求专陈国暴蔑其君而去其亲五年不灭是无天也

灵王二十二年夏陈杀其大夫庆虎及庆寅陈侯之弟黄自楚归于陈

按春秋襄公二十三年 按左传二十三年春陈侯如楚公子黄诉二庆于楚楚人召之使庆乐往杀之庆氏以陈叛夏屈建从陈侯围陈陈人城板队而杀人役人相命各杀其长遂杀庆虎庆寅楚人纳公子黄

灵王二十三年冬楚子蔡侯陈侯许男伐郑陈针宜咎出奔楚

按春秋襄公二十四年 按左传二十四年冬陈人复讨庆氏之党针宜咎出奔楚

灵王二十四年夏六月壬子郑公孙舍之帅师入陈冬郑公孙夏帅师伐陈

按春秋襄公二十五年 按左传初陈侯会楚子伐郑当陈隧者井堙木刊郑人怨之六月郑子展子产帅车七百乘伐陈宵突陈城遂入之陈侯扶其太子偃师奔墓遇司马桓子曰载余曰将巡城遇贾获载其母妻下之而授公车公曰舍而母辞曰不祥与其妻扶其母以奔墓亦免子展命师无入公宫与子产亲御诸门陈侯使司马桓子赂以宗器陈侯免拥社使其众男女别而累以待于朝子展执紼而见再拜稽首承饮而进献子口入数俘而出祝祓社司徒致民司马致节司空致地乃还秋郑子产献捷于晋戎服将事晋人问陈之罪对曰昔虞阍父为周陶正以服事我先王我先王赖其利器用也与其神明之后也庸以元女大姬配胡公而封诸陈以备三恪则我周之自出至于今是赖桓公之乱蔡人欲立其出我先君庄公奉五父而立之蔡人杀之我又与蔡人奉戴厉公至于庄宣皆我之自立夏氏之乱成公播荡又我之自入君所知也今陈忘周之大德蔑我大惠弃我姻亲介恃楚众以冯陵我敝邑不可亿逞我是以有往年之告未获成命则有我东门之役当陈隧者井堙木刊敝邑大惧不竞而耻大姬天诱其衷启敝邑心陈知其罪授手于我用敢献功晋人曰何故侵小对曰先王之命唯罪所在各致其辟且夫天子之地一圻列国一同自是以衰今大国多数圻矣若无侵小何以至焉晋人曰何故戎服对曰我先君武庄为平桓卿士城濮之役文公布命曰各复旧职命我文公戎服辅王以授楚捷不敢废王命故也士庄伯不能诘复于赵文子文子曰其辞顺犯顺不祥乃受之冬十月子展相郑伯如晋拜陈之功子西复伐

陈陈及郑平仲尼曰志有之言以足志文以足言不言谁知其志言之无文行而不远晋为伯郑入陈非文辞不为功慎辞哉

灵王二十五年冬楚子蔡侯陈侯伐郑

按春秋襄公二十六年

灵王二十六年夏晋赵武楚屈建鲁叔孙豹蔡公孙归生卫石恶陈孔奂郑良霄许人曹人会于宋秋七月诸侯之大夫盟于宋

按春秋襄公二十七年

灵王二十七年夏齐侯陈侯蔡侯北燕伯杞伯胡子沈子白狄朝于晋

按春秋不书 按左传襄公二十八年夏齐侯陈侯蔡侯北燕伯杞伯胡子沈子白狄朝于晋宋之盟故也

景王元年夏四月陈侯鲁侯郑伯许男如楚送葬

按春秋不书 按左传襄公二十九年夏四月葬楚康王公及陈侯郑伯许男送葬至于西门之外诸侯之大夫皆至于墓楚邾敖即位

景王二年夏六月郑子产如陈

按春秋不书 按左传襄公三十年夏六月郑子产如陈口盟归复命告大夫曰陈亡国也不可与之聚禾粟缮城郭恃此二者而不抚其民其君弱植公子侈太子卑大夫敖政多门以介于大国能无亡乎不过十年矣

景王四年春正月晋赵武楚公子围齐国弱宋向戌鲁叔孙豹卫齐恶陈公子招蔡公孙归生郑罕虎许人曹人会于虢

按春秋昭公元年 按左传元年春正月乙未会于虢寻宋之盟也

景王七年夏楚子蔡侯陈侯郑伯许男徐子滕子顿子胡子沈子小邾子宋世子佐淮夷会于申秋七月楚子蔡侯陈侯许男顿子胡子沈子淮夷伐吴执齐庆封杀之遂灭赖

按春秋昭公四年

景王八年冬楚子蔡侯陈侯许男顿子沈子徐人越人伐吴

按春秋昭公五年

景王十一年春陈侯之弟招杀陈世子偃师夏四月辛丑陈侯溺薨楚人执陈行人干征师杀之陈公子留奔郑秋陈人杀其大夫公子过冬十月壬午楚师灭陈执陈公子招放之于越杀陈孔奂葬陈哀公按春秋昭公八年 按左传八年陈哀公元妃郑姬生悼太子偃师二妃生公子留下妃生公子胜二妃嬖留有宠属诸司徒招与公子过哀公有废疾春三月甲申公子招公子过杀悼太子偃师而立公子留夏四月辛亥哀公缙干征师赴于楚且告有立君公子胜诉之于楚楚人执而杀之公子留奔郑书曰陈侯之弟招杀陈世子偃师罪在招也楚子执陈行人于征师杀之罪不在行人也陈公子招归罪于公子过而杀之秋九月楚公子弃疾帅师奉孙吴围陈宋戴恶会之冬十一月壬午灭陈舆嬖袁克杀马毁玉以葬楚人将杀之请置之既又请私私于幄加经于颡而逃使穿封戌为陈公曰城麋之役不谄侍饮酒于王王曰城麋之役女知寡人之及此女其辟寡人乎对曰若知君之及此臣必致死礼以息楚国晋侯问于史赵曰陈其遂亡乎对曰未也公曰何故对曰陈顛頊之族也岁在鹑火是以卒灭陈将如之今在析木之津犹将复由且陈氏得政于齐而后陈卒亡自幕至于瞽瞍无违命舜重之以明德置德于遂遂世守之及胡公不淫故周赐之姓使祀虞帝臣闻盛德必百世祀虞之世又未也继守将在齐其兆既存矣

景王十二年春鲁叔弓会楚子于陈夏四月陈灾按春秋昭公九年 按左传九年春叔弓宋华亥郑游吉卫赵廛会楚子于陈夏四月陈灾郑裨曰五年陈将复封封五十二年而遂亡子产问其故对曰陈水属也火水妃也而楚所相也今火出而火陈逐楚而建陈也妃以五成故曰五年岁五及鹑火而后

陈卒亡楚克有之天之道也故曰五十二年

景王十四年冬十二月楚城陈

按春秋不书 按左传昭公十一年冬十二月楚子城陈蔡不羹

景王十五年秋八月陈侯吴归于陈

按春秋昭公十三年 按左传十三年楚之灭蔡也灵王迁许胡沈道房申于荆焉平王即位既封陈蔡而皆复之礼也隐太子之子庐归于蔡礼也悼太子之子吴归于陈礼也

按史记陈世家楚灵王灭陈五岁楚公子弃疾口灵王代立是为平王平王初立欲得和诸侯乃求故陈悼太子偃师之子吴立为陈侯是为惠公惠公立探续哀公卒时年而为元空藉五岁矣

景王二十一年夏五月宋卫陈郑灾

按春秋昭公十八年 按左传十七年冬有星孛于大辰西及汉申须曰彗所以除旧布新也天事恒象今除于火火出必布焉诸侯其有火灾乎梓慎曰往年吾见之是其征也火出而见今兹火出而章必火入而伏其居火也久矣其与不然乎火出于夏为三月于商为四月于周为五月夏数得天若火作其四国当之在宋卫陈郑乎宋大辰之虚也陈太皞之虚也郑祝融之虚也皆火房也星孛天汉汉水祥也卫顛頊之虚也故为帝丘其星为大水水火之牡也其以丙子若壬午作乎水火所以合也若火入而伏必以壬午不过其见之月郑裨言于子产曰宋卫陈郑将同日火若我用瓘斝玉瓚郑必不火子产弗与十八年夏五月火始昏见丙子风梓慎曰是谓融风火之始也七日其火作乎戊寅风甚壬午大甚宋卫陈郑皆火梓慎登大庭氏之库以望之曰宋卫陈郑也数日皆来告火

景王二十三年冬十月宋华亥向宁华定出奔陈

按春秋昭公二十年 按左传二十年冬十月公杀华向之质而攻之戊辰华向奔陈

景王二十四年夏宋华亥向宁华定自陈入于宋南



里以叛

按春秋昭公二十一年

敬王元年秋七月戊辰吴败顿胡沈蔡陈许之师于鸡父胡子髡沈子逞灭获陈夏啮

按春秋昭公二十三年 按左传二十三年秋吴人伐州来楚薳越帅师及诸侯之师奔命救州来吴人御诸锺离子瑕卒楚师燿吴公子光曰诸侯从于楚者众而皆小国也畏楚而不获已是以来吾闻之曰作事威克其爱虽小必济胡沈之君幼而狂陈大夫啮壮而顽顿与许蔡疾楚政楚令尹死其师燿帅贱多宠政令不一七国同役而不同心帅贱而不能整无大威命楚可败也若分师先以犯胡沈与陈必先奔三国败诸侯之师乃摇心矣诸侯乖乱楚必大奔请先者去备薄威后者敦陈整旅吴子从之戊辰晦战于鸡父吴子以罪人三千先犯胡沈与陈三国争之吴为三军以系于后中军从王光帅右掩余帅左吴之罪人或奔或止三国乱吴师击之三国败获胡沈之君及陈大夫舍胡沈之囚使奔许与蔡顿曰吾君死矣师噪而从之三国奔楚师大奔书曰胡子髡沈子逞灭获陈夏啮君臣之辞也不言战楚未陈也敬王十四年春二月陈侯吴薨子柳立三月刘子晋侯宋公鲁侯蔡侯卫侯陈子郑伯许男曹伯莒子邾子顿子胡子滕子薛伯杞伯小邾子齐国夏会于召陵侵楚夏六月葬陈惠公

按春秋定公四年

敬王十八年秋七月陈侯柳卒子越立九月葬陈怀公

按春秋定公八年

按史记陈世家怀公元年吴破楚在郢召陈侯陈侯欲往大夫曰吴新得意楚王虽亡与陈有故不可倍怀公乃以疾谢吴四年吴复召怀公怀公恐如吴吴怒其前不往留之因卒吴陈乃立怀公之子越是为愍公

按左传

愨公名周

敬王二十年秋宋公子地出奔陈冬宋公之弟辰暨仲佗石彊出奔陈

按春秋定公十年

敬王二十一年春宋公之弟辰及仲佗石彊公子地自陈入于萧以叛

按春秋定公十一年

敬王二十四年春二月楚公子结陈公孙佗人帅师灭顿以顿子牂归孔子适陈吴伐陈

按春秋定公十四年孔子适陈吴伐陈不书 按左传十四年春二月楚灭顿顿子牂欲事晋背楚而绝陈好

按史记陈世家愨公六年孔子适陈吴王夫差伐陈取三邑而去

敬王二十六年春正月楚子陈侯随侯许男围蔡秋八月吴侵陈

按春秋哀公元年吴侵陈不书 按左传元年春楚子围蔡报柏举也吴之入楚也使召陈怀公怀公朝国人而问焉曰欲与楚者右欲与吴者左陈人从田无田从党逢滑当公而进曰臣闻国之兴也以福其亡也以祸今吴未有福楚未有祸楚未可弃吴未可从而晋盟主也若以晋辞吴若何公曰国胜君亡非祸而何对曰国之有是多矣何必不复小国犹复况大国乎臣闻国之兴也视民如伤是其福也其亡也以民为土芥是其祸也楚虽无德亦不艾杀其民吴日敝于兵暴骨如莽而未见德焉天其或者正训楚也祸之适吴其何日之有陈侯从之及夫差克越乃修先君之怨秋八月吴侵陈修旧怨也

敬王三十一年春吴伐陈

按春秋哀公六年 按左传六年春吴伐陈复修旧怨也楚子曰吾先君与陈有盟不可以不救乃救陈师于城父

敬王三十四年陈侯如吴楚伐陈

按春秋不书

按史记陈世家愨公十六年吴王夫差伐齐败之艾陵使人召陈侯陈侯恐如吴楚伐陈

敬王三十五年冬楚公子结帅师伐陈吴救陈

按春秋哀公十年 按左传十年冬楚子期伐陈吴延州来季子救陈谓子期曰二君不务德而力争诸侯民何罪焉我请退以为子名务德而安民乃还

敬王三十六年夏陈轅颇出奔郑

按春秋哀公十一年 按左传十一年夏陈轅颇出奔郑初轅颇为司徒赋封田以嫁公女有余以为己大器国人逐之故出道渴其族轅啍进稻醴梁糗脯脯焉喜曰何其给也对曰器成而具曰何不吾谏对曰惧先行

敬王三十八年夏楚公子申帅师伐陈冬十一月盗杀陈夏区夫

按春秋哀公十三年

敬王三十九年夏五月陈宗竖出奔楚冬陈宗竖自楚复入于陈陈人杀之陈轅买出奔楚

按春秋哀公十四年

敬王四十年夏楚伐吴陈使公孙贞子吊吴

按春秋不书 按左传哀公十五年夏楚子西子期伐吴及桐汭陈侯使公孙贞子吊焉及良而卒将以尸入吴子使太宰嚭劳且辞曰以水潦之不时无乃廩然陨大夫之尸以重寡君之忧寡君敢辞上介芋尹盖对曰寡君闻楚为不道荐伐吴国灭厥民人寡君使盖备使吊君之下吏无禄使人逢天之威大命陨坠绝世于良废日共积一日迁次今君命逆使人曰无以尸造于门是我寡君之命委于草莽也且臣闻之曰事死如事生礼也于是乎有朝聘而终以尸将事之礼又有朝聘而遭丧之礼若不以尸将命是遭丧而还也无乃不可乎以礼防民犹或逾之今大夫曰死而弃之是弃礼也其何以为诸侯主先民有言曰无秽虐士备使奉尸将命苟我寡君之命达于君所虽陨于深渊则天命也非君与涉人之过也吴人内之

敬王四十二年楚灭陈

按春秋不书

按史记陈世家愨公二十四年楚惠王复国以兵北伐杀陈愨公遂灭陈而有之 按楚世家惠王复位灭陈而县之

三恪部汇考三

周二

杞

武王克商求禹后得东楼公封之于杞

按史记杞世家杞东楼公者夏后禹之后苗裔也殷时或封或绝周武王克殷纣求禹之后得东楼公封之于杞以奉夏后氏祀

注

索隐曰杞国名也东楼公谥号也不名者并史

先失耳宋忠曰杞今陈留雍丘县故地理志云雍丘县故杞国周武王封禹后为东楼公是也盖周封杞而居雍丘至春秋时杞已迁东国故左氏隐四年传云莒人伐杞取牟娄牟娄者东邑也僖公十四年传云杞迁缘陵地理云北海有营陵淳于公之县臣瓚云即春秋缘陵淳于公所都之邑又州国名杞后改国号曰州而称淳于公故春秋桓五年经云州公如曹传曰淳于公如曹是也然杞后代又称子者以微小又僻居东夷故襄二十九年经称杞子来盟传曰书曰子贱之也

平王二十年杞谋娶公薨子武公立（

按世家自东楼公至谋娶公无

年可考自武公至德公始纪年数德公下注补成公十八年再按左传僖二十二年为成公卒之年

逆推至武公立当在是年）

按史记杞世家东楼公生西楼公西楼公生题公题公生谋娶公

注

谋一作谟索隐曰娶子舆反

谋娶公当周厉王时谋娶公生武公武公立四十七

卒

桓王元年春二月莒人伐杞取牟娄

按春秋隐公四年

注

杞国本都陈留雍丘县推寻事迹桓六年淳于

公亡国杞始并之迁都淳于僖十四年又迁缘陵

襄二十九年晋人城杞之淳于杞又迁都牟娄杞

邑城阳诸县东北有娄乡

桓王十年秋七月杞侯朝于鲁九月鲁入杞

按春秋桓公二年 按左传二年秋七月杞侯来朝

不敬杞侯归乃谋伐之九月入杞讨不敬也

桓王十一年夏六月鲁侯杞侯会于郕

按春秋桓王三年 按左传三年夏公会杞侯于郕

杞求成也

桓王十六年杞武公薨子靖公立（

按武公自平王元年纪元至此年得

四十七年）

按春秋不书

按史记杞世家武公立四十七年卒子靖公立

桓王二十一年夏六月壬寅鲁侯杞侯莒子盟于曲

池

按春秋桓公十二年 按左传十二年夏盟于曲池

平杞莒也

僖王元年纪靖公薨子共公立（

按靖公自桓王十七年纪元至此年得二

十三年）

按春秋不书

按史记杞世家靖公二十三年卒子共公立

惠王四年杞共公薨子惠公立

按共公自僖王二年

纪元至此年得八年

按春秋不书

按史记杞世家共公八年卒子德公立

注

徐广曰世本曰惠公索隐曰系本譙周并作惠

公又云惠公生成公及桓公是此系家脱成公一代下云弟桓公姑容立非也且成公又见春秋经传故左氏庄二十五年云杞成公娶鲁女有婚姻之好至僖二十二年卒始赴而书左传云成公也未同盟故不书名是杞有成公当如譙周所说也

惠王八年夏六月鲁伯姬归于杞

按春秋庄公二十五年

惠王十年春鲁侯会杞伯姬于洮冬杞伯姬归宁于鲁杞伯朝于鲁

按春秋庄公二十七年 按左传二十七年春公会杞伯姬于洮非事也天子非展义不巡守诸侯非民事不举卿非君命不越竟冬杞伯姬来归宁也

注

杞称伯者盖为时王所黜

惠王二十二年杞伯姬归宁于鲁朝其子杞惠公薨子成公立

按惠公自惠王二年

纪元至此年得十八年

按春秋僖公五年

注

伯姬来宁宁成风也朝其子者时子年在十岁

左右因有诸侯子得行朝义而卒不成朝礼故系于母而曰朝其子

按史记杞世家德公十八年卒弟桓公姑容立

注

徐广曰世本曰惠公立十八年生成公及桓公

成公立十八年桓公立十七年（

按德公宜作惠公姑容立在僖二十

二年桓公前尚有成公十八年注详惠王四年）

襄王五年夏四月齐侯宋公陈侯鲁侯卫侯郑伯许男曹伯会于咸

按春秋僖公十三年 按左传十三年夏会于咸淮夷病杞故且谋王室也



襄王六年春诸侯城杞缘陵

按春秋僖公十四年 按左传十四年春诸侯城缘陵而迁杞焉不书其人有阙也

注

缘陵邑辟淮夷迁都于缘陵阙谓器用不具

城池未固而去为惠不终也澶渊之会既而无归

大夫不书而国别称人今此总曰诸侯君臣之辞

不言城杞杞未迁也

按公羊传十有四年春诸侯城缘陵孰城之城杞也

曷为城杞灭也孰灭之盖徐莒胁之曷为不言徐莒

胁之为桓公讳也曷为为桓公讳上无天子下无方

伯天下诸侯有相灭亡者桓公不能救则桓公耻之

也然则孰城之桓公城之曷为不言桓公城之不与

诸侯专封也曷为不与实与而文不与文曷为不与

诸侯之义不得专封也诸侯之义不得专封则其曰

实与之何上无天子下无方伯天下诸侯有相灭亡

者力能救之则救之可也

襄王十五年冬十一月杞子薨弟姑容立

按春秋僖公二十三年 按左传二十三年冬十一月

杞成公卒书曰子杞夷也不书名未同盟也凡诸侯

同盟死则赴以名礼也赴以名则亦书之不然则

否辟不敏也

襄王十九年春杞子朝于鲁秋八月鲁公子遂帅师

入杞

按春秋僖公二十七年 按左传二十七年春杞桓

公来朝用夷礼故曰子公卑杞杞不共也秋入杞责

无礼也

襄王二十年秋杞伯姬归宁于鲁

按春秋僖公二十八年

襄王二十三年冬杞伯姬求妇于鲁

按春秋僖公三十一年

顷王四年春杞伯朝于鲁

按春秋文公十二年 按左传十二年春杞桓公来

朝始朝公也且请绝叔姬而无绝昏公许之二月叔

姬卒

定王十六年春鲁伐杞

按春秋宣公十八年

定王二十年春三月杞伯朝于鲁

按春秋成公四年 按左传四年春三月杞伯来朝  
归叔姬故也

定王二十一年春正月杞叔姬归于鲁冬十二月己  
丑晋侯齐侯宋公鲁侯卫侯郑伯曹伯邾子杞伯同  
盟于虫牢

按春秋成公五年

简王二年秋楚伐郑晋侯齐侯宋公鲁侯卫侯曹伯  
莒子邾子杞伯救郑八月同盟于马陵

按春秋成公七年 按左传七年秋楚子重伐郑师  
于泛诸侯救郑郑共仲侯羽军楚师囚郟公钟仪献  
诸晋八月同盟于马陵寻虫牢之盟且莒服故也

简王四年春正月杞伯逆叔姬之丧于鲁晋侯齐侯  
宋公鲁侯卫侯郑伯曹伯莒子杞伯同盟于蒲

按春秋成公九年 按左传九年春杞桓公来逆叔  
姬之丧请之也杞叔姬卒为杞故也逆叔姬为我也

简王十三年秋杞伯朝于鲁

按春秋成公十八年 按左传十八年秋杞桓公来  
朝劳公且问晋故公以晋君语之杞伯于是骤朝于  
晋而请为□

简王十四年夏齐崔杼鲁仲孙蔑曹人邾人杞人次  
于鄆

按春秋襄公元年 按左传元年夏五月晋韩厥荀  
偃帅诸侯之师伐郑入其郛败其徒兵于洧上于是  
东诸侯之师次于鄆以待晋师晋师自郑以鄆之师  
侵楚焦夷及陈晋侯卫侯次于戚以为之援

灵王五年春三月壬午杞伯姑容薨子□立秋葬杞  
桓公

按世家桓公立十七

年春秋桓公立七十年

按春秋襄公六年 按左传六年春杞桓公卒始赴

以名同盟故也

灵王八年冬晋侯宋公鲁侯卫侯曹伯莒子邾子滕子薛伯杞伯小邾子齐世子光伐郑十二月己亥同盟于戏

按春秋襄公九年 按左传九年冬十月诸侯伐郑庚午季武子齐崔杼宋皇郕从荀罃士匄门于鄆门卫北宫括曹人邾人从荀偃韩起门于师之梁滕人薛人从栾黶士魋门于北门杞人邾人从赵武魏绛斩行栗甲戌师于泛令于诸侯曰修器备盛口粮归老幼居疾于虎牢肆眚围郑郑人恐乃行成十一月己亥同盟于戏郑服也

灵王九年春晋侯宋公鲁侯卫侯曹伯莒子邾子滕子薛伯杞伯小邾子齐世子光会吴于柤秋晋侯宋公鲁侯卫侯曹伯莒子邾子齐世子光滕子薛伯杞伯小邾子伐郑冬戍郑虎牢

按春秋襄公十年 按左传十年春会于柤会吴子寿梦也

灵王十年夏四月郑公孙舍之帅师侵宋晋侯宋公鲁侯卫侯曹伯齐世子光莒子邾子滕子薛伯杞伯小邾子伐郑秋七月己未同盟于亳城北楚子郑伯伐宋晋侯宋公鲁侯卫侯曹伯齐世子光莒子邾子滕子薛伯杞伯小邾子伐郑会于萧鱼

按春秋襄公十一年

灵王十三年春正月晋士匄齐崔杼宋华阅鲁季孙宿叔老卫北宫括郑公孙虿曹人莒人邾人滕人薛人杞人小邾人会吴于向夏四月晋荀偃齐崔杼宋华阅仲江鲁叔孙豹卫北宫括郑公孙虿曹人莒人邾人滕人薛人杞人小邾人伐秦

按春秋襄公十四年 按左传十四年春吴告败于晋会于向为吴谋楚故也夏诸侯之大夫从晋侯伐秦以报栎之役也

灵王十五年春三月晋侯宋公鲁侯卫侯郑伯曹伯莒子邾子薛伯杞伯小邾子会于溴梁

按春秋襄公十六年

灵王十七年冬十月晋侯宋公鲁侯卫侯郑伯曹伯  
莒子邾子滕子薛伯杞伯小邾子同围齐

按春秋襄公十八年 按左传十八年冬十月会于  
鲁济寻溴梁之言同伐齐齐侯御诸平阴塹防门而  
守之广里诸侯之士门焉齐人多死丙寅晦齐师夜  
遁十一月丁卯朔入平阴

灵王十九年夏六月庚申晋侯齐侯宋公鲁侯卫侯  
郑伯曹伯莒子邾子滕子薛伯杞伯小邾子盟于澶  
渊

按春秋襄公二十年 按左传二十年夏盟于澶渊  
齐成故也

灵王二十一年冬晋侯齐侯宋公鲁侯卫侯郑伯曹  
伯莒子邾子薛伯杞伯小邾子会于沙随

按春秋襄公二十二年 按左传二十二年冬会于  
沙随复鞬栾氏也

灵王二十二年春三月己巳杞伯口薨弟益姑立夏  
葬杞孝公

按春秋襄公二十三年 按左传二十三年春杞孝  
公卒晋悼夫人丧之平公不彻乐非礼也礼为邻国  
阙

灵王二十三年秋八月癸巳晋侯宋公鲁侯卫侯郑  
伯曹伯莒子邾子滕子薛伯杞伯小邾子会于夷仪

按春秋襄公二十四年 按左传二十四年秋会于  
夷仪将以伐齐水不克

灵王二十四年夏五月晋侯宋公鲁侯卫侯郑伯曹  
伯莒子邾子滕子薛伯杞伯小邾子会于夷仪秋七  
月己巳同盟于重丘

按春秋襄公二十五年 按左传二十五年夏会于  
夷仪伐齐以报朝歌之役秋七月己巳同盟于重丘  
齐成故也

灵王二十七年夏杞与诸侯白狄朝于晋

按春秋不书 按左传襄公二十八年夏齐侯陈侯  
蔡侯北燕伯杞伯胡子沈子白狄朝于晋宋之盟故  
也

景王元年夏晋荀盈齐高止宋华定鲁仲孙羯卫世叔仪郑公孙段曹人莒人滕人薛人小邾人城杞晋使鲁归杞田杞子盟于鲁

按春秋襄公二十九年归杞田不书 按左传二十九年晋平公杞出也故治杞夏六月知悼子合诸侯之大夫以城杞孟孝伯会之郑子太叔与伯石往子太叔见太叔文子与之语文子曰甚乎其城杞也子太叔曰若之何哉晋国不恤周宗之阙而夏肆是屏其弃诸姬亦可知也已诸姬是弃其谁归之吉也闻之弃同即异是谓离德诗曰协比其邻昏姻孔云晋不邻矣其谁云之晋侯使司马女叔侯来治杞田弗尽归也晋悼夫人愠曰齐也取货先君若有知也不尚取之公告叔侯叔侯曰虞虢焦滑霍扬韩魏皆姬姓也晋是以大若非侵小将何所取武献以下兼国多矣谁得治之杞夏余也而即东夷鲁周公之后也而睦于晋以杞封鲁犹可而何有焉鲁之于晋也职贡不乏玩好时至公卿大夫相继于朝史不绝书府无虚月如是可矣何必瘠鲁以肥杞且先君而有知也毋宁夫人而焉用老臣杞文公来盟书曰子贱之也

景王二年冬十月晋人齐人宋人卫人郑人曹人莒人邾人滕人薛人杞人小邾人会于澶渊宋灾故

按春秋襄公三十年 按左传三十年为宋灾故诸侯之大夫会以谋归宋财冬十月叔孙豹会晋赵武齐公孙蚤宋向戌卫北宫佗郑罕虎及小邾之大夫会于澶渊既而无归于宋

景王九年春正月杞伯益姑薨弟郁立夏葬杞文公按春秋昭公六年 按左传六年春正月杞文公卒吊如同盟礼也

景王十年夏四月晋人至鲁治杞田

按春秋不书 按左传昭公七年夏四月晋人来治杞田季孙将以成与之谢息为孟孙守不可曰人有言曰虽有挈瓶之知守不假器礼也夫子从君而守臣丧邑虽吾子亦有猜焉季孙曰君之在楚于晋罪

也又不听晋鲁罪重矣晋师必至吾无以待之不如与之间习而取诸杞吾与子桃成反谁敢有之是得二成也鲁无忧而孟孙益邑子何病焉辞以无山与之莱柞乃迁于桃晋人为杞取成

景王十四年秋晋韩起齐国弱宋华亥鲁季孙意如卫北宫佗郑罕虎曹人杞人会于厥憇

按春秋昭公十一年 按左传十一年秋会于厥憇谋救蔡也

景王十六年秋刘子晋侯齐侯宋公鲁侯卫侯郑伯曹伯莒子邾子滕子薛伯杞伯小邾子会于平丘八月甲戌同盟于平丘

按春秋昭公十三年

敬王二年秋八月丁酉杞伯郁厘薨子成立冬葬杞平公

按春秋昭公二十四年

敬王四年秋齐侯鲁侯莒子邾子杞伯盟于鄆陵

按春秋昭公二十六年 按左传二十六年秋盟于鄆陵谋纳公也

敬王十年冬晋韩不信齐高张宋仲几鲁仲孙何忌卫世叔申郑国参曹人莒人薛人杞人小邾人会城成周

按春秋昭公三十二年

敬王十四年春三月刘子晋侯宋公鲁侯蔡侯卫侯陈子郑伯许男曹伯莒子邾子顿子胡子滕子薛伯杞伯小邾子齐国夏会于召陵侵楚夏五月杞伯成梦于会子乞立秋七月葬杞悼公杞子乞之弟弑乞而自立

按春秋定公四年弑隐公不书 按左传四年春三月刘文公合诸侯于召陵谋伐楚也

按史记杞世家悼公十二年卒子隐公乞立七月隐公弟遂弑隐公自立是为厘公

敬王三十三年杞厘公薨子维立

按春秋不书

按史记杞世家厘公十九年卒子愨公维立



元王五年杞伯之弟闾路弑其君而自立

按史记杞世家愨公十六年愨公弟闾路弑愨公代  
立是为哀公

贞定王七年杞伯闾路薨子敫立

按史记杞世家哀公十年卒愨公子敫立是为出公

贞定王十九年杞伯敫薨子春立

按史记杞世家出公十二年卒子简公春立

贞定王二十四年楚灭杞杞亡

按史记杞世家简公立一年楚惠王之四十四年灭

杞杞后陈亡三十四年杞小微其事不足称述（

按简公立

共四年云一年疑误）

三恪部汇考四

周三

宋一

成王三年周公讨武庚诛之封微子启于宋以绍殷  
后

按书经微子微子若曰父师少师殷其弗或乱正四  
方我祖底遂陈于上我用沈酗于酒用乱败厥德于  
下殷罔不小大好草窃奸宄卿士师师非度凡有辜  
罪乃罔恒获小民方兴相为敌讎今殷其沦丧若涉  
大水其无津涯殷遂丧越至于今日父师少师我其  
发出狂吾家毫逊于荒今尔无指告予颠隲若之何  
其父师若曰王子天毒降灾荒殷邦方兴沈酗于酒  
乃罔畏畏拂其长旧有位人今殷民乃攘窃神祇  
之牺牲用以容将食无灾降监殷民用乂讎斂召  
敌讎不怠罪合于一多瘠罔诏商今其有灾我兴受  
其败商其沦丧我罔为臣仆诏王子出迪我旧云刻  
子王子弗出我乃颠隲自靖人自献于先王我不顾  
行遯 D%L子之命王若曰猷殷王元子惟稽古崇  
德象贤统承先王修其礼物作宾于王家与国咸休  
永世无穷呜呼乃祖成汤克齐圣广渊皇天眷佑诞  
厥受命抚民以宽除其邪虐功加于时德垂后裔尔  
惟践修厥猷旧有令闻恪慎克孝肃恭神人予嘉乃

德曰笃不忘上帝时歆下民祇协庸建尔于上公尹兹东夏钦哉往敷乃训慎乃服命率由典常以蕃王室弘乃烈祖律乃有民永绥厥位毗予一人世世享德万邦作式俾我有周无斁呜呼往哉惟休无替朕命

按史记周本纪武王封商纣子禄父殷之余民武王为殷初定未集乃使其弟管叔鲜蔡叔度相禄父治殷武王崩成王少周公乃行政当国管叔蔡叔群弟疑周公与武庚作乱畔周周公奉成王命伐诛武庚管叔放蔡叔以微子开代殷后国于宋 按宋微子世家微子开者殷帝乙之首子而纣之庶兄也纣既立不明淫乱于政微子数谏纣不听及祖伊以周西伯昌之修德灭国惧祸至以告纣纣曰我生不有命在天乎是何能为于是微子度纣终不可谏欲死之及去未能自决乃问于太师少师太师少师乃劝微子去遂行周武王伐纣克殷微子乃持其祭器造于军门肉袒面缚左牵羊右把茅膝行而前以告于是武王乃释微子复其位如故武王封纣子武庚禄父以续殷祀使管叔蔡叔傅相之武王崩成王少周公旦代行政当国管蔡疑之乃与武庚作乱欲袭成王周公周公既承成王命诛武庚杀管叔放蔡叔乃命微子开代殷后奉其先祀作微子之命以申之国于宋微子故能仁贤乃代武庚故殷之余民甚戴爱之微子开卒立其弟衍是为微仲

注

礼记曰微子舍其孙腓而立衍也郑元曰微子

适子死立其弟衍殷礼也索隐曰家语微子弟仲思名衍一名泄嗣微子为宋公虽迁爵易位而班级不过其故故以旧官为称故二子虽为宋公犹微至子稽乃称宋公也

厉王二十年宋公鮒祀薨子举立（

按宋自微仲至厉公皆无年可考自

厘公以后始纪年数今历叙诸君而以厘公为编年之始）

按史记宋微子世家微仲卒子宋公稽立宋公稽卒

子丁公申立丁公申卒子愨公共立愨公共卒弟炆公熙立口公即位愨公子鮒祀弑炆公而自立曰我当立是为厉公厉公卒子厘公举立厘公十七年周厉王出奔彘

厉王四十八年宋公举薨子立

按史记宋微子世家厘公卒子惠公立惠公四年周宣王即位

宣王二十七年宋公薨子哀公立

按史记宋微子世家惠公三十年卒子哀公立

宣王二十八年宋公薨子戴公立

按史记宋微子世家哀公元年卒子戴公立

平王五年宋公薨子司空立

按史记微子世家戴公二十九年周幽王为犬戎所杀秦始列为诸侯三十四年戴公卒子武公司空立

平王二十三年宋公司空薨子力立

按史记宋微子世家武公十八年卒子宣公力立

平王四十一年宋公力薨弟和立

按史记宋微子世家宣公有太子与夷十九年宣公病让其弟和曰父死子继兄死弟及天下通义也我其立和和亦三让而受之宣公卒弟和立

平王四十九年秋九月鲁及宋盟于宿

按春秋隐公元年 按左传惠公之季年败宋师于黄公立而求成焉元年秋九月及宋人盟于宿始通也

平王五十一年秋八月庚辰宋公和卒立宣公之子与夷冬十二月癸未葬宋穆公

按春秋隐公三年 按左传三年秋宋穆公疾召大司马孔父而属殇公焉曰先君舍与夷而立寡人寡人弗敢忘若以大夫之灵得保首领以没先君若问与夷其将何辞以对请子奉之以主社稷寡人虽死亦无悔焉对曰群臣愿奉冯也公曰不可先君以寡人为贤使主社稷若弃德不让是废先君之举也岂曰能贤光昭先君之令德可不务乎吾子其无废先君之功使公子冯出居于郑八月庚辰宋穆公卒殇

公即位 按公羊传葬者曷为或日或不日不及时而日渴葬也不及时而不日慢葬也过时而日隐之也过时而日谓不能葬也当时而不日正也当时而日危不得葬也此当时何危尔宣公谓缪公曰以吾爱与夷则不若爱女以为社稷宗庙主则与夷不若女盍终为君矣宣公死缪公立缪公逐其二子庄公冯与左师勃曰尔为吾子生毋相见死毋相哭与夷复曰先君之所为不与臣国而纳国乎君者以君可以为社稷宗庙主也今君逐君之二子而将致国乎与夷此非先君之意也且使子而可逐则先君其逐臣矣缪公曰先君之不尔逐可知矣吾立乎此摄也终致国乎与夷庄公冯杀与夷故君子大居正宋之祸宣公为之也

桓王元年夏宋公鲁侯遇于清宋公陈侯蔡人卫人伐郑秋宋公陈侯鲁公子翬蔡人卫人伐郑

按春秋隐公四年 按左传四年春公与宋公为会将寻宿之盟未及期卫人来告乱夏公及宋公遇于清宋殇公之即位也公子冯出奔郑郑人欲纳之及卫州吁立将修先君之怨于郑而求宠于诸侯以和其民使告于宋曰君若伐郑以除君害君为主敝邑以赋与陈蔡从则卫国之愿也宋人许之于是陈蔡方睦于卫故宋公陈侯蔡人卫人伐郑围其东门五日而还秋诸侯复伐郑宋公使来乞师公辞之羽父请以师会之公弗许固请而行

桓王二年秋九月邾人郑人伐宋冬十二月宋人伐郑围长葛

按春秋隐公五年 按左传五年秋九月宋人取邾田邾人告于郑曰请君释憾于宋敝邑为道郑人以王师会之伐宋入其郛以报东门之役宋人使来告命公闻其入郛也将救之问于使者曰师何及对曰未及国公怒乃止辞使者曰君命寡人同恤社稷之难今问诸使者曰师未及国非寡人之所敢知也冬十二月宋人伐郑围长葛以报入郛之役也

桓公三年冬宋人取长葛鲁侯为周请余于宋

按春秋隐公六年 按左传六年秋宋人取长葛冬  
京师来告饥公为之请余于宋卫齐郑

桓王四年秋七月宋及郑平庚申盟于宿鲁侯为宋  
伐邾

按春秋不书 按左传隐公七年秋宋及郑平七月  
庚申盟于宿公伐邾为宋讨也

注

公距宋更与郑平欲以郑为援今郑复与宋盟

故惧而伐邾欲以求宋故曰为宋讨

桓王五年春宋公卫侯遇于垂秋七月庚午宋公齐  
侯卫侯盟于瓦屋

按春秋隐公八年 按左传八年春齐侯将平宋卫  
有会期宋公以币请于卫请先相见卫侯许之故遇  
于犬丘齐人卒平宋卫于郑秋会于温盟于瓦屋以  
释东门之役冬齐侯使来告成三国公使众仲对曰  
君释三国之图以鳩其民君之惠也寡君闻命矣敢  
不承受君之明德

桓王六年宋公不王郑以王命讨之

按春秋不书 按左传隐公九年宋公不王郑伯为  
王左卿士以王命讨之伐宋宋以入郟之役怨公不  
告命公怒绝宋使秋郑人以王命来告伐宋冬公会  
齐侯于防谋伐宋也

桓王七年夏齐人鲁人郑人伐宋六月鲁侯败宋师  
于菅辛未取郟辛巳取防

按春秋隐公十年 按左传十年春王正月公会齐  
侯郑伯于中丘癸丑盟于邓为师期夏五月羽父先  
会齐侯郑伯伐宋六月戊申公会齐侯郑伯于老桃  
壬戌公败宋师于菅庚午郑师入郟辛未归于我庚  
辰郑师入防辛巳归于我蔡人卫人邾人不会王命  
秋七月庚寅郑师入郊犹在郊宋人卫人入郑蔡人  
从之伐戴八月壬戌郑伯围戴癸亥克之取三师焉  
宋卫既入郑而以伐戴召蔡人蔡人怒故不和而败  
九月戊寅郑伯入宋

桓王八年冬十月郑伯伐宋败之

按春秋不书 按左传隐公十一年冬十月郑伯以虢师伐宋壬戌大败宋师以报其入郑也

桓王十年春正月戊申宋督弑其君与夷及其大夫孔父三月齐侯鲁侯陈侯郑伯会于稷以成宋乱

按春秋桓公二年 按左传元年宋华父督见孔父之妻于路目逆而送之曰美而艳二年春宋督攻孔氏杀孔父而取其妻公怒督惧遂弑殇公会于稷以成宋乱为赂故立华氏也宋殇公立十年十一战民不堪命孔父嘉为司马督为太宰故因民之不堪命先宣言曰司马则然已杀孔父而弑殇公召庄公于郑而立之以亲郑以郕大鼎赂公齐陈郑皆有赂故遂相宋公 按公羊传宋督曰其君与夷及其大夫孔父及者何累也弑君多矣舍此无累者乎曰有仇牧荀息皆累也舍仇牧荀息无累者乎曰有有则此何以书贤也何贤乎孔父孔父可谓义形于色矣其义形于色奈何督将弑殇公孔父生而存则殇公不可得而弑也故于是先攻孔父之家殇公知孔父死已必死趋而救之皆死焉孔父正色而立于朝则人莫敢过而致难于其君者孔父可谓义形于色矣

桓王十九年春正月齐人卫人郑人宋人盟于恶曹秋九月宋人执郑祭仲宋公陈侯蔡叔鲁公子柔盟于折宋公鲁侯会于夫鍾冬十二月宋公鲁侯会于阚

按春秋桓公十一年 按左传郑昭公之败北戎也齐人将妻之昭公辞祭仲曰必取之君多内宠子无大援将不立三公子皆君也弗从十年夏郑庄公卒初祭封人仲足有宠于庄公庄公使为卿为公娶邓曼生昭公故祭仲立之宋雍氏女于郑庄公曰雍姑生厉公雍氏宗有宠于宋庄公故诱祭仲而执之曰不立突将死亦执厉公而求赂焉祭仲与宋人盟以厉公归而立之 按公羊传祭仲者何郑相也何以不名贤也何贤乎祭仲以为知权也其为知权奈何古者郑国处于留先郑伯有善于郕公者通乎夫人以取其国而迁郑焉而野留庄公死已葬祭仲将往



省于留涂出于宋宋人执之谓之曰为我出忽而立突祭仲不从其言则君必死国必亡从其言则君可以生易死国可以存易亡少辽缓之则突可故出而忽可故反是不可得则病然后有郑国古人之有权者祭仲之权是也权者何权者反于经然后有善者也权之所设舍死亡无所设行权有道自贬损以行权不害人以行权杀人以自生亡人以自存君子不为也

桓王二十年秋七月丁亥宋公鲁侯燕人盟于谷丘八月宋公鲁侯会于虚冬十一月宋公鲁侯会于龟十二月鲁师郑师伐宋丁未战于宋

按春秋桓公十二年 按左传十二年夏公欲平宋郑秋公及宋公盟于句瀆之丘宋成未可知也故又会于虚冬会于龟宋公辞平故与郑伯盟于武父遂帅师而伐宋战焉宋无信也

桓王二十一年春二月己巳鲁侯纪侯郑伯及齐侯宋公卫侯燕人战齐师宋师卫师燕师败绩

按春秋桓公十三年 按左传十三年春宋多赂于郑郑不堪命故以纪鲁及齐与宋卫燕战不书所战后也

桓王二十二年冬十二月宋人齐人蔡人卫人陈人伐郑

按春秋桓公十四年 按左传十四年冬宋人以诸侯伐郑报宋之战也焚渠门入及大逵伐东郊取牛首以大宫之椽归为卢门之椽

桓王二十三年冬十一月宋公鲁侯卫侯陈侯会于袤伐郑

按春秋桓公十五年 按左传十五年冬会于袤谋伐郑将纳厉公也弗克而还

庄王元年春正月宋公鲁侯蔡侯卫侯会于曹夏四月宋公鲁侯卫侯陈侯蔡侯伐郑

按春秋桓公十六年 按左传十六年春正月会于曹谋伐郑也夏伐郑

庄王二年秋鲁人宋人卫人伐郑

按春秋桓公十七年 按左传十七年秋伐邾宋志也

庄王五年冬十有二月乙酉宋公冯薨子捷立

按春秋庄公二年

庄王六年夏四月葬宋庄公

按春秋庄公三年

庄王八年冬鲁侯齐人宋人陈人蔡人伐卫

按春秋庄公五年 按左传五年冬伐卫纳惠公也

庄王十三年春二月鲁侯侵宋三月宋人迁宿夏六月齐师宋师次于郎鲁侯败宋师于乘丘

按春秋庄公十年 按左传十年夏六月齐师宋师次于郎公子偃曰宋师不整可败也宋败齐必还请击之公弗许自雩门窃出蒙皋比而先犯之公从之大败宋师于乘丘齐师乃还

庄王十四年夏五月戊寅鲁侯败宋师于鄆秋宋大水鲁使人往吊

按春秋庄公十一年 按左传十一年夏宋为乘丘之役故侵我公御之宋师未陈而薄之败诸鄆凡师敌未陈曰败某师皆陈曰战大崩曰败绩得□曰克覆而败之曰取某师京师败曰王师败绩于某秋宋大水公使吊焉曰天作淫雨害于粢盛若之何不吊对曰孤实不敬天降之灾又以为君忧拜命之辱臧文仲曰宋其兴乎禹汤罪己其兴也悖焉桀纣罪人其亡也忽焉且列国有凶称孤礼也言惧而名礼其庶乎既而闻之曰公子御说之辞也臧孙达曰是宜为君有恤民之心乘丘之役公以金仆姑射南宫长万公右欻孙生搏之宋人请之宋公靳之曰始吾敬子今子鲁囚也吾弗敬子矣病之

庄王十五年秋八月甲午宋万弑其君捷及其大夫仇牧冬十月宋万出奔陈

按春秋庄公十二年 按左传十二年秋宋万弑闵公于蒙泽遇仇牧于门批而杀之遇太宰督于东宫之西又杀之立子游群公子奔萧公子御说奔亳南宫牛猛获帅师围亳冬十月萧叔大心及戴武宣穆

庄之族以曹师伐之杀南宫牛于师杀子游于宋立桓公猛获奔卫南宫万奔陈以乘车犇其母一日而至宋人请猛获于卫卫人欲勿与石祁子曰不可天下之恶一也恶于宋而保于我保之何补得一夫而失一国与恶而弃好非谋也卫人归之亦请南宫万于陈以赂陈人使妇人饮之酒而以犀革裹之比及宋手足皆见宋人皆醢之 按公羊传及者何累也弑君多矣舍此无累者乎孔父荀息皆累也舍孔父荀息无累者乎曰有有则此何以书贤也何贤乎仇牧仇牧可谓不畏强御矣其不畏强御奈何万尝与庄公战获乎庄公庄公归散舍诸宫中数月然后归之归反为大夫于宋与闵公博妇人皆在侧万曰甚矣鲁侯之淑鲁侯之美也天下诸侯宜为君者唯鲁侯尔闵公矜此妇人口其言顾曰此虜也尔虜焉故鲁侯之美恶乎至万怒搏闵公绝其脰仇牧闻君弑趋而至遇之于门手剑而叱之万臂掇仇牧碎其首齿着乎门阖仇牧可谓不畏强御矣

僖王元年春齐侯宋人陈人蔡人邾人会于北杏  
按春秋庄公十三年 按左传十三年春会于北杏以平宋乱冬宋人背北杏之会

僖王二年春齐人陈人曹人伐宋夏单伯会伐宋冬单伯会齐侯宋公卫侯郑伯于鄆

按春秋庄公十四年 按左传十四年春诸侯伐宋齐请师于周夏单伯会之取成于宋而还冬会于鄆宋服故也

僖王三年春齐侯%陈侯卫侯郑伯会于鄆秋宋人齐人邾人伐邾邾人侵宋

按春秋庄公十五年 按左传十五年春复会焉齐始霸也秋诸侯为宋伐邾邾人侵之而侵宋

僖王四年夏宋人齐人卫人伐郑冬十二月齐侯宋公陈侯鲁侯卫侯郑伯许男滑伯滕子同盟于幽

按春秋庄公十六年 按左传十六年夏诸侯伐郑宋故也冬同盟于幽郑成也

惠王二年秋鲁公子结媵陈人之妇于鄆遂及齐侯

宋公盟冬齐人宋人陈人伐鲁西鄙

按春秋庄公十九年

惠王九年秋鲁侯宋人齐人伐徐

按春秋庄公二十六年

惠王十年夏六月鲁侯齐侯宋公陈侯郑伯同盟于幽

按春秋庄公二十七年 按左传二十七年夏同盟于幽陈郑服也

惠王十一年秋荆伐郑鲁侯齐人宋人救郑

按春秋庄公二十八年

惠王十五年夏宋公齐侯遇于梁丘

按春秋庄公三十二年 按左传三十二年春齐侯为楚伐郑之故请会于诸侯宋公请先见于齐侯夏遇于梁丘

惠王十八年春正月齐师宋师曹伯次于聂北救邢

夏六月齐师宋师曹师城邢秋八月齐侯宋公鲁侯郑伯曹伯邾人会于柎

按春秋僖公元年 按左传元年春诸侯救邢邢人溃出奔师师遂逐狄人具邢器用而迁之师无私焉夏邢迁于夷仪诸侯城之救患也

惠王十九年秋九月齐侯宋公江人黄人盟于贯

按春秋僖公二年 按左传二年秋盟于贯服江黄也

惠王二十年秋齐侯宋公江人黄人会于阳谷

按春秋僖公三年 按左传三年秋会于阳谷谋伐楚也

惠王二十一年春正月齐侯宋公陈侯鲁侯卫侯郑伯许男曹伯侵蔡蔡溃遂伐楚次于陔冬十二月鲁公孙兹帅师会齐人宋人卫人郑人许人曹人侵陈

按春秋僖公四年

惠王二十二年夏齐侯宋公陈侯鲁侯卫侯郑伯许男曹伯会王世子于首止秋八月诸侯盟于首止郑伯逃归不盟

按春秋僖公五年 按左传五年夏会于首止会王

太子郑谋宁周也

惠王二十三年夏齐侯宋公陈侯鲁侯卫侯曹伯伐郑围新城秋楚子围许诸侯遂救许

按春秋僖公六年 按左传六年夏诸侯伐郑以其逃首止之盟故也秋楚子围许以救郑诸侯救许乃还

惠王二十四年秋七月齐侯宋公鲁侯陈世子款郑世子华盟于□母

按春秋僖公七年 按左传七年秋盟于□母谋郑故也

惠王二十五年春正月王人齐侯宋公鲁侯卫侯许男曹伯陈世子款盟于洮郑伯乞盟

按春秋僖公八年 按左传八年春盟于洮谋王室也郑伯乞盟请服也

襄王元年春三月宋公御说薨子兹父立夏宰周公齐侯宋子鲁侯卫侯郑伯许男曹伯会于葵丘

按春秋僖公九年 按左传初宋公疾太子兹父固请曰目夷长且仁君其立之公命子鱼子鱼辞曰能以国让仁孰大焉臣不及也且又不顺遂走而退九年春宋桓公卒未葬而襄公会诸侯故曰子凡在丧王曰小童公侯曰子宋襄公即位以公子目夷为仁使为左师以听政于是宋治故鱼氏世为左师

襄王五年夏齐侯宋公陈侯鲁侯卫侯郑伯许男曹伯会于咸

按春秋僖公十三年 按左传十三年夏会于咸淮夷病杞故且谋王室也

襄王七年春三月齐侯宋公陈侯鲁侯卫侯郑伯许男曹伯盟于牡丘遂次于匡诸侯之大夫救徐冬宋人伐曹楚人败徐于娄林

按春秋僖公十五年 按左传十五年春楚人伐徐徐即诸夏故也三月盟于牡丘寻葵丘之盟且救徐也孟穆伯帅师及诸侯之师救徐诸侯次于匡以待之冬宋人伐曹讨旧怨也

襄王八年春正月戊申陨石于宋五六鹳退飞过宋

都冬十二月齐侯宋公陈侯鲁侯卫侯郑伯许男邢侯曹伯会于淮

按春秋僖公十六年 按左传十六年春陨石于宋五陨星也六鹢退飞过宋都风也周内史叔兴聘于宋宋襄公问焉曰是何祥也吉凶焉在对曰今兹鲁多大丧明年齐有乱君将得诸侯而不终退而告人曰君失问是阴阳之事非吉凶所生也吉凶由人吾不敢逆君故也冬十二月会于淮谋鄆且东略也城鄆役人病有夜登丘而呼曰齐有乱不果城刳十

襄王九年冬十二月齐公子昭奔宋

按春秋僖公十七年 按左传十七年冬十月乙亥齐桓公卒易牙入与寺人貂因内宠以杀群吏而立公子无亏孝公奔宋十二月乙亥赴辛巳夜殡

襄王十年春正月宋公曹伯卫人邾人伐齐夏五月戊寅宋师及齐师战于甗齐师败绩

按春秋僖公十八年 按左传十八年春宋襄公以诸侯伐齐三月齐人杀无亏齐人将立孝公不胜四公子之徒遂与宋人战夏五月宋败齐师于甗立孝公而还

襄王十一年春三月宋人执滕子婴齐夏六月宋公曹人邾人盟于曹南鄆子会盟于邾己酉邾人执鄆子用之秋宋人围曹

按春秋僖公十九年 按左传十九年春宋人执滕宣公夏宋公使邾文公用鄆子于次睢之社欲以属东夷司马子鱼曰古者六畜不相为用小事不用大牲而况敢用人乎祭祀以为人也民神之主也用人其谁飨之齐桓公存三亡国以属诸侯义士犹曰薄德今一会而虐二国之君又用诸淫昏之鬼将以求霸不亦难乎得死为幸秋宋人围曹讨不服也子鱼言于宋公曰文王闻崇德乱而伐之军三旬而不降退修教而复伐之因垒而降诗云刑于寡妻至于兄弟以御于家邦今君德无乃犹有所阙而以伐人若之何盍姑内省德乎无阙而后动

襄王十三年春宋人齐人楚人盟于鹿上秋宋公楚



子陈侯蔡侯郑伯许男曹伯会于孟执宋公以伐宋  
冬十二月鲁侯会诸侯盟于薄释宋公

按春秋僖公二十一年 按左传二十年秋宋襄公欲合诸侯臧文仲闻之曰以欲从人则可以人从欲鲜济二十一年春宋人为鹿上之盟以求诸侯于楚楚人许之公子目夷曰小国争盟祸也宋其亡乎幸而后败秋诸侯会宋公于孟子鱼曰祸其在此乎君欲已甚其何以堪之于是楚执宋公以伐宋冬会于薄以释之子鱼曰祸犹未也未足以惩君 按公羊传冬楚人使宜申来献捷此楚子也其称人何贬曷为贬为执宋公贬曷为为执宋公贬宋公与楚子期以乘车之会公子目夷谏曰楚强而无义请君以兵车之会往宋公曰不可吾与之约以乘车之会自我为之自我堕之曰不可终以乘车之会往楚人果伏兵车执宋公以伐宋宋公谓公子目夷曰子归守国矣国子之国也吾不从子之言以至此乎公子目夷复曰君虽不言国固臣之国也于是归设守械而守国楚人谓宋人曰子不与我国吾将杀子君矣宋人应之曰吾赖社稷之神灵吾国已有君矣楚人知虽杀宋公犹不得宋国于是释宋公宋公释乎执走之卫公子目夷复曰国为君守之君曷为不入然后逆襄公归恶乎捷捷乎宋曷为不言捷乎宋为襄公讳也此围辞也曷为不言其围为公子目夷讳也十有二月癸丑公会诸侯盟于薄释宋公执未有言释之者此其言释之何公与为尔也公与为尔奈何公与议尔也

襄王十四年夏宋公卫侯许男滕子伐郑冬十一月宋公及楚人战于泓宋师败绩

按春秋僖公二十二年 按左传二十二年夏宋公伐郑子鱼曰所谓祸在此矣秋楚人伐宋以救郑宋公将战大司马固谏曰天之弃商久矣君将兴之弗可赦也已弗听冬十一月己巳朔宋公及楚人战于泓宋人既成列楚人未既济司马曰彼众我寡及其未既济也请击之公曰不可既济而未成列又以告

公曰未可既陈而后击之宋师败绩公伤股门官歼焉国人皆咎公公曰君子不重伤不禽二毛古之为军也不以i也寡人虽亡国之余不鼓不成列子鱼曰君未知战勅敌之人隘而不列天赞我也阻而鼓之不亦可乎犹有惧焉且今之勅者皆吾敌也虽及胡获则取之何有于二毛明耻教战求杀敌也伤未及死如何勿重若爱重伤则如勿伤爱其二毛则如服焉三军以利用也金鼓以声气也利而用之阻隘可也声盛致志鼓儻可也 按公羊传偏战者日尔此其言朔何春秋辞繁而不杀者正也何正尔宋公与楚人期战于泓之阳楚人济泓而来有司复曰请迨其未毕济而击之宋公曰不可吾闻之也君子不厄人吾虽丧国之余寡人不忍行也既济未毕陈有司复曰请迨其未毕陈而击之宋公曰不可吾闻之也君子不鼓不成列已陈然后襄公鼓之宋师大败故君子大其不鼓不成列临大事而不忘大礼有君而无臣以为虽文王之战亦不过此也 按谷梁传日事遇朔曰朔春秋三十有四战未有以尊败乎卑以师败乎人者也以尊败乎卑以师败乎人则骄其敌襄公以师败乎人而不骄其敌何也责之也泓之战以为复雩之耻也雩之耻宋襄公有以自取之伐齐之丧执滕子围曹为雩之会不顾其力之不足而致楚成王成王怒而执之故曰礼人而不答则反其敬爱人而不亲则反其仁治人而不治则反其知过而不改文之是谓之过襄公之谓也古者被甲婴胄非以兴国也则以征无道也岂曰以报其耻哉宋公与楚人战于泓水之上司马子反曰楚众我少鼓险而击之胜无幸焉襄公曰君子不推人危不攻人厄须其出既出旌乱于上陈乱于下子反曰楚众我少击之胜无幸焉襄公曰不鼓不成列须其成列而后击之则众败而身伤焉七月而死倍则攻敌则战少则守人之所以为人者言也人而不能言何以为人言之所以为言者信也言而不信何以为言信之所以为信者道也信而不道何以为道道之贵者

时其行势也

襄王十五年春齐侯伐宋围缙夏五月庚寅宋公兹父薨子王臣立

按春秋僖公二十三年 按左传二十三年春齐侯伐宋围缙以讨其不与盟于齐也夏五月宋襄公卒伤于泓故也

襄王十六年秋宋及楚平

按春秋不书 按左传僖公二十四年秋宋及楚平宋成公如楚还入于郑郑伯将享之问礼于皇武子对曰宋先代之后也于周为客天子有事膳焉有丧拜焉丰厚可也郑伯从之享宋公有加礼焉

襄王十七年夏宋荡伯姬逆妇于鲁宋杀其大夫

按春秋僖公二十五年 按公羊传二十五年夏宋荡伯姬来逆妇宋荡伯姬者何荡氏之母也其言来逆妇何兄弟辞也其称妇何有姑之辞也宋杀其大夫何以不名宋三世无大夫三世内娶也

注

三世谓慈父王臣处白也内娶大夫女也言无

大夫者礼不臣妻之父母国内皆臣无娶道故绝去大夫名正其义也外小恶正之者宋以内娶故公族以弱妃党益强威权下流政分三门卒生篡弑亲亲出奔疾其末故正其本

襄王十八年冬楚人伐宋围缙

按春秋僖公二十六年 按左传二十六年宋以其善于晋侯也叛楚即晋冬楚令尹子玉司马子西帅师伐宋围缙

注

重耳之出也宋襄公赠马二十乘

襄王十九年冬楚人陈侯蔡侯郑伯许男围宋十二月甲戌鲁侯会诸侯盟于宋

按春秋僖公二十七年 按左传二十七年冬楚子及诸侯围宋宋公孙固如晋告急

襄王二十年夏四月己巳晋侯齐师宋师秦师及楚人战于城濮楚师败绩五月癸丑晋侯齐侯宋公鲁

侯蔡侯郑伯卫子莒子盟于践土冬晋侯齐侯宋公  
鲁侯蔡侯郑伯陈子莒子邾人秦人会于温

按春秋僖公二十八年 按左传二十八年春三月  
宋人使门尹般如晋师告急公曰宋人告急舍之则  
绝告楚不许我欲战矣齐秦未可若之何先轸曰使  
宋舍我而赂齐秦藉之告楚我执曹君而分曹卫之  
田以赐宋人楚爱曹卫必不许也喜赂怒顽能无战  
乎公说执曹伯分曹卫之田以畀宋人楚子入居于  
申使申叔去谷使子玉去宋曰无从晋师晋侯在外  
十九年矣而果得晋国险阻艰难备尝之矣民之情  
伤尽知之矣天假之年而除其害天之所置其可废  
乎军志曰允当则归又曰知难而退又曰有德不可  
敌此三志者晋之谓矣子玉使伯请战曰非敢必  
有功也愿以间执谗慝之口王怒少与之师战于城  
濮楚师败绩

襄王二十一年夏六月王子虎鲁侯晋人宋人齐人  
陈人蔡人秦人盟于翟泉

按春秋僖公二十九年 按左传二十九年夏公会  
王子虎晋狐偃宋公孙固齐国归父陈辕涛涂秦小  
子憖盟于翟泉寻践土之盟且谋伐郑也

襄王二十七年夏六月宋公陈侯郑伯晋士穀鲁公  
孙敖盟于垂陇冬晋人宋人陈人郑人伐秦

按春秋文公二年 按左传二年夏六月穆伯会诸  
侯及晋司空士穀盟于垂陇晋讨卫故也冬晋先且  
居宋公子成陈辕选郑公子归生伐秦取汪及彭衙  
而还以报彭衙之役

襄王二十八年春正月鲁叔孙得臣晋人宋人陈人  
卫人郑人伐沉沉溃雨螽于宋

按春秋文公三年 按左传三年春庄叔会诸侯之  
师伐沈以其服于楚也沈溃凡民逃其上曰溃在上  
曰逃秋雨螽于宋队而死也 按公羊传雨螽者何  
死而坠也何以书记异也外异不书此何以书为王  
者之后记异也

襄王三十二年夏四月宋公王臣薨子杵臼立宋人

杀其大夫秋八月齐侯宋公鲁侯卫侯陈侯郑伯许男曹伯晋赵盾盟于扈

按春秋文公七年 按左传七年夏四月宋成公卒于是公子成为右师公孙友为左师乐豫为司马鳞矐为司徒公子荡为司城华御事为司寇昭公将去群公子乐豫曰不可公族公室之枝叶也若去之则本根无所庇荫矣葛藟犹能庇其本根故君子以为比况国君乎此谚所谓庇焉而纵寻斧焉者也必不可君其图之亲之以德皆股肱也谁敢携贰若之何去之不听穆襄之族率国人以攻公杀公孙固公孙郑于公宫六卿和公室乐豫舍司马以让公子印昭公即位而葬书曰宋人杀其大夫不称名众也且言非其罪也秋八月齐侯宋公卫侯陈侯郑伯许男曹伯会晋赵盾盟于扈晋侯立故也

襄王三十三年冬宋杀其大夫司马宋司城奔于鲁按春秋文公八年 按左传八年冬宋襄夫人襄王之姊也昭公不礼焉夫人因戴氏之族以杀襄公之孙孔叔公孙锤离及大司马公子印皆昭公之党也司马握节以死故书以官司城荡意诸来奔效节于府人而出公以其官逆之皆复之亦书以官皆贵之也

顷王元年春楚人伐郑晋赵盾宋华耦鲁公子遂卫孔达许人救郑

按春秋文公九年 按左传九年春范山言于楚子曰晋君少不在诸侯北方可图也楚子师于狼渊以伐郑囚公子坚公子龙及乐耳郑及楚平公子遂会晋赵盾宋华耦卫孔达许大夫救郑不及楚师

顷王二年冬狄侵宋宋公逆楚子田于孟诸

按春秋文公十年田孟诸不书 按左传十年秋陈侯郑伯会楚子于息冬遂及蔡侯次于厥貉将以伐宋宋华御事曰楚欲弱我也先为之弱乎何必使诱我我实不能民何罪乃逆楚子劳且听命遂道以田孟诸宋公为右孟郑伯为左孟期思公复遂为右司马子朱及文之无畏为左司马命夙驾载燧宋公违



命无畏扶其仆以徇或谓子舟曰国君不可戮也子舟曰当官而行何强之有诗曰刚亦不吐柔亦不茹毋纵诡随以谨罔极是亦非辟强也敢爱死以乱官乎

顷王三年秋鲁公子遂如宋

按春秋文公十一年 按左传十一年秋襄仲聘于宋且言司城荡意诸而复之因贺楚师之不害也

顷王六年夏六月鲁侯宋公陈侯卫侯郑伯许男曹伯晋赵盾同盟于新城秋九月宋子哀奔于鲁

按春秋文公十四年 按左传十四年夏六月同盟于新城从于楚者服且谋邾也秋有星孛入于北斗周内史叔服曰不出七年宋齐晋之君皆将死乱九月宋高哀为萧封人以为卿不义宋公而出遂来奔匡王元年春三月宋司马华孙盟于鲁冬十一月诸侯盟于扈

按春秋文公十五年 按左传十五年三月宋华耦来盟其官皆从之公与之宴辞曰君之先臣督得罪于宋殇公名在诸侯之策臣承其祀其敢辱君请承命于亚旅鲁人以为敏冬十一月晋侯宋公卫侯蔡侯郑伯许男曹伯盟于扈寻新城之盟且谋伐齐也齐人赂晋侯故不克而还于是有齐难是以公不会匡王二年冬十一月宋人弑其君杵臼弟鲍立

按春秋文公十六年 按左传十六年宋公子鲍礼于国人宋饥竭其粟而贷之年自七十以上无不馈谄也时加羞珍异无日不数于六卿之门国之材人无不事也亲自桓以下无不恤也公子鲍美而艳襄夫人欲通之而不可夫人助之施昭公无道国人奉公子鲍以因夫人于是华元为右师公孙友为左师华耦为司马鳞矐为司徒荡意诸为司城公子朝为司寇初司城荡卒公孙寿辞司城请使意诸为之既而告人曰君无道吾官近惧及焉弃官则族无所庇子身之贰也姑纾死焉虽亡子犹不亡族既夫人将使公田孟诸而杀之公知之尽以宝行荡意诸曰盍适诸侯公曰不能其大夫至于君祖母以及国人诸



侯谁纳我且既为人君而又为人臣不如死尽以其宝赐左右以使行夫人使谓司城去公对曰臣之而逃其难若后君何冬十一月甲寅宋昭公将田孟诸未至夫人王姬使帅甸攻而杀之荡意诸死之文公即位使母弟须为司城华耦卒而使荡虺为司马

匡王三年春晋荀林父卫孔达陈公孙宁郑石楚伐宋夏四月复合诸侯于扈

按春秋文公十七年复合不书 按左传十七年春晋荀林父卫孔达陈公孙宁郑石楚伐宋讨曰何故弑君犹立文公而还夏四月晋侯搜于黄父遂复合诸侯于扈平宋也

匡王四年冬十二月宋公杀其母弟须及昭公子出武穆之族

按春秋不书 按左传文公十八年冬宋武氏之族道昭公子将奉司城须以作乱十二月宋公杀母弟须及昭公子使戴庄桓之族攻武氏于司马子伯之馆遂出武穆之族使公孙师为司城公子朝卒使乐吕为司寇以靖国人

匡王五年秋楚子郑人侵陈遂侵宋晋赵盾帅师救陈宋公陈侯卫侯曹伯会晋师于棐林伐郑冬晋人宋人伐郑

按春秋宣公元年 按左传元年宋人之弑昭公也晋荀林父以诸侯之师伐宋宋及晋平宋文公受盟于晋又会诸侯于扈将为鲁讨齐皆取赂而还郑穆公曰晋不足与也遂受盟于楚陈共公之卒楚人不礼焉陈灵公受盟于晋秋楚子侵陈遂侵宋晋赵盾帅师救陈宋会于棐林以伐郑也楚蒍贾救郑遇于北林囚晋解扬晋人乃还

匡王六年春二月壬子宋华元帅师及郑公子归生帅师战于大棘宋师败绩获宋华元夏晋人宋人卫人陈人侵郑

按春秋宣公二年 按左传二年春郑公子归生受命于楚伐宋宋华元乐吕御之二月壬子战于大棘宋师败绩囚华元获乐吕及甲车四百六十乘俘二

百五十人馘百人狂狡辂郑人郑人入于井倒戟而出之获狂狡君子曰失礼违命宜其为禽也戎昭果毅以听之之谓礼杀敌为果致果为毅易之戮也将战华元杀羊食士其御羊斟不与及战曰畴昔之羊子为政今日之事我为政与入郑师故败君子谓羊斟非人也以其私憾败国殄民于是刑孰大焉诗所谓人之无良者其羊斟之谓乎残民以逞宋人以兵车百乘文马百驷以赎华元于郑半入华元逃归立于门外告而入见叔牂曰子之马然也对曰非马也其人也既合而来奔宋城华元为植巡功城者讴曰睥其目皤其腹弃甲而复于思于思弃甲复来使其驂乘谓之曰牛则有皮犀兕尚多弃甲则那役人曰从其有皮丹漆若何华元曰去之夫其口众我寡

定王元年秋宋师围曹

按春秋宣公三年 按左传三年宋文公即位杀母弟须及昭公子武氏之谋也使戴桓之族攻武氏于司马子伯之馆尽逐武穆之族武穆之族以曹师伐宋三年秋宋师围曹报武氏之乱也

定王五年冬晋侯宋公鲁侯卫侯郑伯曹伯盟于黑壤

按春秋宣公七年

定王七年秋九月晋侯宋公卫侯郑伯曹伯会于扈冬十月宋人围滕

按春秋宣公九年 按左传九年秋会于扈讨不睦也冬宋人围滕因其丧也

定王八年夏六月宋师伐滕晋人宋人卫人曹人伐郑

按春秋宣公十年 按左传十年滕人恃晋而不事宋夏六月宋师伐滕郑及楚平诸侯之师伐郑取成而还

定王九年春楚人侵宋

按春秋不书 按左传宣公十一年春楚左尹子重侵宋王待诸郟

定王十年冬十二月戊寅楚子灭萧宋华椒蔡人救

萧晋原穀宋华椒卫孔达曹人同盟于清丘宋师伐陈卫人救陈

按春秋宣公十二年宋蔡救萧不书 按左传十二年冬楚子伐萧宋华椒以蔡人救萧

萧宋

附庸国

晋原穀

宋华椒卫孔达曹人同盟于清丘曰恤病讨贰宋为盟故伐陈卫人救之孔达曰先君有约言焉若大国讨我则死之

定王十一年夏楚子伐宋

按春秋宣公十三年 按左传十三年夏楚子伐宋以其救萧也君子曰清丘之盟唯宋可以免焉

定王十二年秋九月楚子围宋

按春秋宣公十四年 按左传十四年夏楚子使申舟聘于齐曰无假道于宋亦使公子冯聘于晋不假道于郑申舟以孟诸之役恶宋曰郑昭宋聋晋使不害我则必死王曰杀女我伐之见犀而行及宋宋人止之华元曰过我而不假道鄙我也鄙我亡也杀其使者必伐我伐我亦亡也亡一也乃杀之楚子闻之投袂而起屣及于室皇剑及于寝门之外车及于蒲胥之市秋九月楚子围宋

定王十三年春鲁公孙归父会楚子于宋夏五月宋及楚平

按春秋宣公十五年 按左传十五年春公孙归父会楚子于宋未人使乐婴齐告急于晋晋侯欲救之伯宗曰不可古人有言曰虽鞭之长不及马腹天方授楚未可与争虽晋之强能违天乎谚曰高下在心川泽纳污山藪藏疾瑾瑜匿瑕国君含垢天之道也君其待之乃止使解扬如宋使无降楚曰晋师悉起将至矣郑人囚而献诸楚楚子厚赂之使反其言不许三而许之登诸楼车使呼宋人而告之遂致其君命楚子将杀之使与之言曰尔既许不谷而反之何故非我无信女则弃之速即尔刑对曰臣闻之君能

制命为义臣能承命为信信载义而行之为利谋不失利以卫社稷民之主也义无二信信无二命君之赂臣不知命也受命以出有死无贲又可赂乎臣之许君以成命也死而成命臣之禄也寡君有信臣下臣获考死又何求楚子舍之以归夏五月楚师将去宋申犀稽首于王之马前曰毋畏知死而不敢废王命王弃言焉王不能答申叔时仆曰筑室反耕者宋必听命从之宋人惧使华元夜入楚师登子反之口起之曰寡君使元以病告曰敝邑易子而食析骸以爨虽然城下之盟有以国毙不能从也去我三十里唯命是听子反惧与之盟而告王退三十里宋及楚平华元为质盟曰我无尔诈尔无我虞 按公羊传夏五月宋人及楚人平外平不书此何以书大其平乎已也何大乎其平乎已庄王围宋军有七日之粮尔尽此不胜将去而归尔于是使司马子反乘堙而窥宋城宋华元亦乘堙而出见之司马子反曰子之国何如华元曰惫矣曰何如曰易子而食之析骸而炊之司马子反曰嘻甚矣惫虽然吾闻之也围者柑马而秣之使肥者应客是何子之情也华元曰吾闻之君子见人之厄则矜之小人见人之厄则幸之吾见子之君子也是以告情于子也司马子反曰诺勉之矣吾军亦有七日之粮尔尽此不胜将去而归尔揖而去之反于庄王庄王曰何如司马子反曰惫矣曰何如曰易子而食之析骸而炊之庄王曰嘻甚矣惫虽然吾今取此然后而归尔司马子反曰不可臣已告之矣军有七日之粮尔庄王怒曰吾使子往视之则曷为告之司马子反曰以区区之宋犹有不欺人之臣可以楚而无乎是以告之也庄王曰诺舍而止虽然吾犹取此然后归尔司马子反曰然则君请处于此臣请归尔庄王曰子去我而归吾孰与处于此吾亦从子而归尔引师而去之故君子大其平乎已也此其大夫也皆称人何贬曷为贬平者在下也定王十八年秋八月壬午宋公鲍薨子瑕立冬十一月鲁侯蔡侯许男楚公子婴齐秦右大夫说宋华元

陈公孙宁卫孙良夫郑公子去疾齐人曹人邾人薛人鄆人盟于蜀

按春秋成公二年蔡侯许男不书 按左传二年秋八月宋文公卒始厚葬用蜃炭益车马始用殉重器备口有四阿棺有翰桼君子谓华元乐举于是乎不臣臣治烦去惑者也是以伏死而争今二子者君生则纵其惑死又益其侈是弃君于恶也何臣之为宣公使求好于楚庄王卒宣公薨不克作好公即位受盟于晋会晋伐齐卫人不行使于楚而亦受盟于晋从于伐齐故楚令尹子重为阳桥之役以救齐将起师子重曰君弱群臣不如先大夫师众而后可诗曰济济多士文王以宁夫文王犹用众况吾侪乎且先君庄王属之曰无德以及远方莫如惠恤其民而善其用之乃大夫已责逮鰥救乏赦罪悉师王卒尽行彭名御戎蔡景公为左许灵公为右二君弱皆强冠之冬楚师侵卫遂侵我师于蜀使臧孙往辞曰楚远而久固将退矣无功而受名臣不敢楚侵及阳桥孟孙请往赂之以执斫执针织纆皆百人公衡为质以请盟楚人许平十一月公及楚公子婴齐蔡侯许男秦右大夫说宋华元陈公孙宁卫孙良夫郑公子去疾及齐国之大夫盟于蜀

定王十九年春正月晋侯宋公鲁侯卫侯曹伯伐郑二月葬宋文公

按春秋成公三年

定王二十年春宋公使华元来聘

按春秋成公四年 按左传四年春宋华元来聘通嗣君也

定王二十一年春正月鲁仲孙蔑如宋秋八月宋公杀围龟冬十二月晋侯齐侯宋公鲁侯卫侯郑伯曹伯邾子杞伯同盟于虫牢

按春秋成公五年杀围龟事不书 按左传五年春孟献子如宋报华元也秋八月宋公子围龟为质于楚而归华元享之请鼓噪以出鼓噪以复入曰习攻华氏宋公杀之冬同盟于虫牢郑服也诸侯谋复会

宋公使向为人辞以子灵之难

简王元年春二月卫孙良夫帅师侵宋秋鲁仲孙蔑叔孙侨如帅师侵宋

按春秋成公六年 按左传六年春三月晋伯宗夏阳说卫孙良夫相郑人伊雒之戎陆浑蛮氏侵宋以其辞会也夏子叔声伯如晋命伐宋秋孟献子叔孙宣伯侵宋晋命也

简王二年秋晋侯齐侯宋公鲁侯卫侯曹伯莒子邾子杞伯救郑八月同盟于马陵

按春秋成公七年 按左传七年秋楚子重伐郑师于泛诸侯救郑郑共仲侯羽军楚师囚郟公钟仪献诸晋八月同盟于马陵寻虫牢之盟且莒服故也

简王三年春宋公使华元聘于鲁夏宋公使公孙寿纳币于鲁

按春秋成公八年 按左传八年春宋华元来聘聘共姬也夏宋公使公孙寿来纳弊礼也

简王四年春正月晋侯齐侯宋公鲁侯卫侯郑伯曹伯莒子杞伯同盟于蒲二月鲁伯姬归于宋夏季孙行父如宋致女

按春秋成公九年 按左传九年春二月伯姬归于宋夏季文子如宋致女复命公享之赋韩奕之五章穆姜出于房再拜曰大夫勤辱不忘先君以及嗣君施及未亡人先君犹有望也敢拜大夫之重勤又赋绿衣之卒章而入

简王五年夏五月晋侯齐侯宋公鲁侯卫侯曹伯伐郑

按春秋成公十年

简王六年秋宋华元合晋楚之成

按春秋不书 按左传成公十一年秋宋华元善于令尹子重又善于栾武子闻楚人既许晋余茂成而使归复命矣冬华元如楚遂如晋合晋楚之成

简王七年春华元克合晋楚之成

按春秋不书 按左传成公十二年春宋华元克合晋楚之成夏五月晋士会楚公子罢许偃癸亥盟



于宋西门之外曰凡晋楚无相加戎好恶同之同恤灾危备救凶患若有害楚则晋伐之在晋楚亦如之交赞往来道路无壅谋其不协而讨不庭有渝此盟明神殛之俾队其师无克胙国郑伯如晋听成会于琐泽成故也

简王八年夏五月晋侯齐侯宋公鲁侯卫侯郑伯曹伯邾人滕人伐秦

按春秋成公十三年

简王十年春三月癸丑晋侯鲁侯卫侯郑伯曹伯宋世子成齐国佐邾人同盟于戚夏六月宋公固薨子成立秋八月庚辰葬宋共公宋华元出奔晋自晋归于宋宋杀其大夫山宋鱼石出奔楚冬十一月晋士齐高无咎宋华元鲁叔孙侨如卫孙林父郑公子邾人会吴于锺离

按春秋成公十五年 按左传十五年春公会于戚讨曹成公也执而归诸京师诸侯将见子臧于王而立之子臧辞曰前志有之曰圣达节次守节下失节为君非吾节也虽不能圣敢失守乎遂逃奔宋夏六月宋共公卒秋八月葬宋共公于是华元为右师鱼石为左师荡泽为司马华喜为司徒公孙师为司城向为人为大司寇鳞朱为少司寇向带为太宰鱼府为少宰荡泽弱公室杀公子肥华元曰我为右师君臣之训师所司也今公室卑而不能正吾罪大矣不能治官敢赖宠乎乃出奔晋二华戴族也司城庄族也六官者皆桓族也鱼石将止华元鱼府曰右师反必讨是无桓氏也鱼石曰右师苟获反虽许之讨必不敢且多大功国人与之不反惧桓氏之无祀于宋也右师讨犹有戍在桓氏虽亡必偏鱼石自止华元于河上请讨许之乃反使华喜公孙师帅国人攻荡氏杀子山鱼石向为人鳞朱向带鱼府出舍于睢上华元使止之不可冬十月华元自止之不可乃反鱼府曰今不从不得入矣右师视速而言疾有异志焉若不我纳今将驰矣登丘而望之则驰骋而从之则决睢滋闭门登陴矣左师二司寇二宰遂出奔楚华

元使向戌为左师老佐为司马乐裔为司寇以靖国人

简王十一年夏四月郑公子喜帅师侵宋秋晋侯齐侯鲁侯卫侯宋华元邾人会于沙随

按春秋成公十六年 按左传十六年夏四月郑子罕伐宋宋将鉏乐惧败诸洧陂退舍于夫渠不傲郑人覆之败诸洧陵获将鉏乐惧宋恃胜也秋会于沙随谋伐郑也

简王十二年夏尹子单子晋侯齐侯宋公鲁侯卫侯曹伯邾人伐郑六月乙酉同盟于柯陵冬单子晋侯宋公鲁侯卫侯曹伯齐人邾人伐郑

按春秋成公十七年

简王十三年夏楚子郑伯伐宋宋鱼石复入于彭城冬楚人邾人侵宋十二月晋侯宋公卫侯邾子齐崔杼鲁仲孙蔑同盟于虚朮

按春秋成公十八年 按左传十八年夏六月郑伯侵宋及曹门外遂会楚子伐宋取朝郟楚子辛郑皇辰侵城郟取幽丘同伐彭城纳宋鱼石向为人鳞朱向带鱼府焉以三百乘戍之而还宋人患之西鉏吾曰何也若楚人与吾同恶以德于我吾固事之也不敢贰矣大国无厌鄙我犹憾不然而收吾憎使赞其政以间吾衅亦吾患也今将崇诸侯之奸而披其地以塞夷庚逞奸而携服毒诸侯而惧吴晋吾庸多矣非吾忧也且事晋何为晋必恤之秋七月宋老佐华喜围彭城老佐卒焉冬十一月楚子重救彭城伐宋宋华元如晋告急韩献子为政曰欲求得人必先勤之成霸安疆自宋始矣晋侯师于台谷以救宋遇楚师于靡角之谷楚师还十二月孟献子会于虚朮谋救宋也宋人辞诸侯而请师以围彭城孟献子请于诸侯而先归会葬

简王十四年春正月晋栾黶宋华元鲁仲孙蔑卫□殖曹人莒人邾人滕人薛人围宋彭城秋楚公子壬夫帅师侵宋

按春秋襄公元年 按左传元年春己亥围宋彭城

非宋地追书也于是为宋讨鱼石故称宋且不登叛人也谓之宋志彭城降晋晋人以宋五大夫在彭城者归置诸瓠丘齐人不会彭城晋人以为讨二月齐太子光为质于晋秋楚子辛救郑侵宋吕留郑子然侵宋取犬丘

三恪部汇考五

周四

宋二

灵王元年春正月郑师伐宋夏六月晋师宋师卫口殖侵郑秋七月晋荀罃宋华元鲁仲孙蔑卫孙林父曹人邾人会于戚鲁叔孙豹如宋冬晋荀罃齐崔杼宋华元鲁仲孙蔑卫孙林父曹人邾人滕人薛人小邾人会于戚遂城虎牢

按春秋襄公二年 按左传二年春郑伯侵宋楚令也秋穆叔聘于宋通嗣君也

灵王二年夏六月单子晋侯宋公鲁侯卫侯郑伯莒子邾子齐世子光同盟于鸡泽

按春秋襄公三年

灵王四年秋晋侯宋公鲁侯陈侯卫侯郑伯曹伯莒子邾子滕子薛伯齐世子光吴人郈人会于戚冬楚公子贞帅师伐陈晋侯宋公鲁侯卫侯郑伯曹伯齐世子光救陈

按春秋襄公五年

灵王五年夏宋华弱来奔

按春秋襄公六年 按左传六年宋华弱与乐轡少相狎长相优又相谤也子荡怒以弓楛华弱于朝平公见之曰司武而楛于朝难以胜矣遂逐之夏宋华弱来奔司城子罕曰同罪异罚非刑也专戮于朝罪孰大焉亦逐子荡子荡射子罕之门曰几日而不我从子罕善之如初

灵王六年冬十二月晋侯宋公鲁侯陈侯卫侯曹伯莒子邾子会于鄆

按春秋襄公七年

灵王七年夏晋侯郑伯鲁季孙宿齐人宋人卫人邾

人会于邢丘

按春秋襄公八年 按左传八年夏五月甲辰会于邢丘以命朝聘之数使诸侯之大夫听命季孙宿齐高厚宋向戌卫宁殖邾大夫会之郑伯献捷于会故亲听命大夫不书尊晋侯也

灵王八年春宋灾冬晋侯宋公鲁侯卫侯曹伯莒子邾子滕子薛伯杞伯小邾子齐世子光伐郑十二月盟于戏

按春秋襄公九年 按左传九年春宋灾乐喜为司城以为政使伯氏司里火所未至彻小屋涂大屋陈畚揭具缦缶备水器量轻重蓄水潦积土涂巡丈城缮守备表火道使华臣具正徒令隧正纳郊保奔火所使华阅讨右官官庀其司向戌讨左亦如之使乐遄庀刑器亦如之使皇郟命校正出马工正出车备甲兵庀武守使西鉏吾庀府守令司宫巷伯傲宫二师令四乡正敬享祝宗用马于四墉祀盘庚于西门之外晋侯问于士弱曰吾闻之宋灾于是乎知有天道何故对曰古之火正或食于心或食于味以出内火是故味为鹑火心为大火陶唐氏之火正阙伯居商丘祀大火而火纪时焉相土因之故商主大火商人阅其祸败之衅必始于火是以日知其有天道也公曰可必乎对曰在道国乱无象不可知也

灵王九年春晋侯宋公鲁侯卫侯曹伯莒子邾子滕子薛伯杞伯小邾子齐世子光会吴于柤夏五月楚公子贞郑公孙辄帅师伐宋秋晋侯宋公鲁侯卫侯曹伯莒子邾子齐世子光滕子薛伯杞伯小邾子伐郑冬戍郑虎牢

按春秋襄公十年 按左传十年春会于柤会吴子寿梦也夏四月戊午会于柤晋荀偃士匄请伐逼阳而封宋向戌焉荀罃曰城小而固胜之不武弗胜为笑固请丙寅围之弗克孟氏之臣秦董父犇重如役逼阳人启门诸侯之士门焉县门发聊人纆抉之以出门者狄虺弥建大车之轮而蒙之以甲以为櫓左执之右拔戟以成一队孟献子曰诗所谓有力如虎

者也主人县布堇父登之及堞而绝之队则又县之苏而复上者三主人辞焉乃退带其断以徇于军三日诸侯之师久于逼阳荀偃士□请于荀罃曰水潦将降惧不能归请班师知伯怒投之以机出于其间曰女成二事而后告余余恐乱命以不女违女既勤君而兴诸侯牵帅老夫以至于此既无武守而又欲易余罪曰是实班师不然克矣余羸老也可重任乎七日不克必尔乎取之五月庚寅荀偃士□帅卒攻逼阳亲受矢石甲午灭之书曰遂灭逼阳言自会也以与向戌向戌辞曰君若犹辱镇抚宋国而以逼阳光启寡君群臣安矣其何赐如之若专赐臣是臣兴诸侯以自封也其何罪大焉敢以死请乃予宋公宋公享晋侯于楚丘请以桑林荀罃辞荀偃士□曰诸侯宋鲁于是观礼鲁有禘乐宾祭用之宋以桑林享君不亦可乎舞师题以旌夏晋侯惧而退入于房去旌卒享而还及着雍疾卜桑林见荀偃士□欲奔请禱焉荀罃不可曰我辞礼矣彼则以之犹有鬼神于彼加之晋侯有间以逼阳子归献于武宫谓之夷俘逼阳妘姓也使周内史选其族嗣纳诸霍人礼也师归孟献子以秦堇父为右生秦丕兹事仲尼六月楚子囊郑子耳伐宋师于訾毋庚午围宋门于桐门卫侯救宋师于襄牛郑子展曰必伐卫不然是不与楚也得罪于晋又得罪于楚国将若之何子驷曰国病矣子展曰得罪于二大国必亡病不犹愈于亡乎诸大夫皆以为然故郑皇耳率师侵卫楚令也孙文子卜追之献兆于定姜姜氏问繇曰兆如山陵有夫出征而丧其雄姜氏曰征者丧雄御寇之利也大夫图之卫人追之孙蒯获郑皇耳于犬丘秋九月郑子耳侵宋北鄙孟献子曰郑其有灾乎师竟已甚周犹不堪况郑乎有灾其执政之三士乎

灵王十年夏四月郑公孙舍之帅师侵宋晋侯宋公鲁侯卫侯曹伯齐世子光莒子邾子滕子薛伯杞伯小邾子伐郑秋七月楚子郑伯伐宋晋侯宋公鲁侯卫侯曹伯齐世子光莒子邾子滕子薛伯杞伯小邾



子伐郑会于萧鱼

按春秋襄公十一年 按左传十一年春郑人患晋楚之故诸大夫曰不从晋国几亡楚弱于晋晋不吾疾也晋疾楚将辟之何为而使晋师致死于我楚弗敢敌而后可固与也子展曰与宋为恶诸侯必至吾从之盟楚师至吾又从之则晋怒甚矣晋能骤来楚将不能吾乃固与晋大夫说之使疆场之司恶于宋宋向戌侵郑大获子展曰师而伐宋可矣若我伐宋诸侯之伐我必疾吾乃听命焉且告于楚楚师至吾又与之盟而重赂晋师乃免矣夏郑子展侵宋四月诸侯伐郑己亥齐太子光宋向戌先至于郑门于东门其莫晋荀罃至于西郊东侵旧许卫孙林父侵其北鄙六月诸侯会于北林师于向右还次于琐围郑观兵于南门西济于济隧郑人惧乃行成秋七月同盟于亳范宣子曰不慎必失诸侯诸侯道敝而无成能无贰乎乃盟载书曰凡我同盟毋蕴年毋壅利毋保奸毋留慝救灾患恤祸乱同好恶奖王室或间兹命司慎司盟名山名川群神群祀先王先公七姓十二国之祖明神殛之俾失其民队命亡氏踏其国家楚子囊乞旅于秦秦右大夫詹帅师从楚子将以伐郑郑伯逆之丙子伐宋

灵王十一年冬楚公子贞帅师侵宋

按春秋襄公十二年 按左传十二年冬楚子囊秦庶长无地伐宋师于杨梁以报晋之取郑也

灵王十三年春正月晋士匄鲁季孙宿叔老齐人宋人卫人郑公孙蚤曹人莒人邾人滕人薛人杞人小邾人会吴于向夏四月晋荀偃鲁叔孙豹齐人宋人卫北宫括郑公孙蚤曹人莒人邾人滕人薛人杞人小邾人伐秦冬晋士匄宋华阅鲁季孙宿卫孙林父郑公孙蚤莒人邾人会于戚

按春秋襄公十四年 按左传十四年春吴告败于晋会于向为吴谋楚故也夏诸侯之大夫从晋侯伐秦以报栎之役也晋侯待于竟使六卿帅诸侯之师以进及泾不济叔向见叔孙穆子穆子赋匏有苦叶



叔向退而具舟鲁人莒人先济郑子蟠见卫北宫懿子曰与人而不固取恶莫甚焉若社稷何懿子说二子见诸侯之师而劝之济济泾而次秦人毒泾上流师人多死郑司马子蟠帅郑师以进师皆从之至于械林不获成焉荀偃令曰鸡鸣而驾塞井夷唯余马首是瞻栾黶曰晋国之命未是有也余马首欲东乃归下军从之左史谓魏庄子曰不待中行伯乎庄子曰夫子命从帅栾伯吾帅也吾将从之从帅所以待夫子也伯游曰吾今实过悔之何及多遗秦禽乃命大还晋人谓之迁延之役栾针曰此役也报栢之败也役又无功晋之耻也吾有二位于戎路敢不耻乎与士鞅驰秦师死焉士鞅反栾黶谓士鞅曰余弟不欲往而子召之余弟死而子来是而子杀余之弟也弗逐余将杀之士鞅奔秦于是齐崔杼宋华阅仲江会伐秦不书惰也向之会亦如之卫北宫括不书于向书于伐秦摄也冬会于戚谋定卫也

灵王十四年春宋公使向戌聘于鲁二月及向戌盟于刘

按春秋襄公十五年 按左传十五年春宋向戌来聘且寻盟见孟献子尤其室曰子有令闻而美其室非所望也对曰我在晋吾兄为之毁之重劳且不敢间郑尉氏司氏之乱其余盗在宋郑人以子西伯有子产之故纳赂于宋以马四十乘与师莅师慧三月公孙黑为质焉司城子罕以堵女父尉翩司齐与之良司臣而逸之托诸季武子武子置诸卞郑人醢之三人也师慧过宋朝将私焉其相曰朝也慧曰无人焉相曰朝也何故无人慧曰必无人焉若犹有人岂其以千乘之相易淫乐之蒙必无人焉故也子罕闻之固请而归之秋宋人或得玉献诸子罕子罕弗受献玉者曰以示玉人玉人以为宝也故敢献之子罕曰我以不贪为宝尔以玉为宝若以与我皆丧宝也不若人有其宝稽首而告曰小人怀璧不可以越乡纳此以请死也子罕置诸其里使玉人为之攻之□而后使复其所

灵王十五年春三月晋侯宋公鲁侯卫侯郑伯曹伯莒子邾子薛伯杞伯小邾子会于溴梁夏五月晋荀偃郑伯鲁叔老卫□殖宋人伐许

按春秋襄公十六年 按左传十六年春葬晋悼公平公即位羊舌肸为傅张君臣为中军司马祁奚韩襄栾盈士鞅为公族大夫虞丘书为乘马御改服修官烝于曲沃警守而下会于溴梁命归侵田以我故执邾宣公莒犁比公且曰通齐楚之使晋侯与诸侯宴于温使诸大夫舞曰歌诗必类齐高厚之诗不类荀偃怒且曰诸侯有异志矣使诸大夫盟高厚高厚逃归于是叔孙豹晋荀偃宋向戌卫□殖郑公孙蚤小邾之大夫盟曰同讨不庭

灵王十六年春二月宋人伐陈秋九月宋华臣出奔陈

按春秋襄公十七年 按左传十七年春宋庄朝伐陈获司徒□卑宋也冬宋华阅卒华臣弱皋比之室使贼杀其宰华吴贼六人以铍杀诸卢门合左师之后左师惧曰老夫无罪贼曰皋比私有讨于吴遂幽其妻曰畀余而大璧宋公闻之曰臣也不唯其宗室是暴大乱宋国之政必逐之左师曰臣也亦卿也大臣不顺国之耻也不如盖之乃舍之左师为己短策苟过华臣之门必骋十一月甲午国人逐瘦狗瘦狗入于华臣氏国人从之华臣惧遂奔陈宋皇国父为太宰为平公筑台妨于农功子罕请俟农功之毕公弗许筑者讴曰泽门之□实兴我役邑中之黔实慰我心子罕闻之亲执扑以行筑者而扶其不勉者曰吾侪小人皆有阖庐以辟燥湿寒暑今君为一台而不速成何以为役讴者乃止或问其故子罕曰宋国区区而有诅有祝祸之本也

灵王十七年冬十月晋侯宋公鲁侯卫侯郑伯曹伯莒子邾子滕子薛伯杞伯小邾子同围齐

按春秋襄公十八年 按左传十八年冬十月会于鲁济寻溴梁之言同伐齐

灵王十九年夏六月晋侯齐侯宋公鲁侯卫侯郑伯

曹伯莒子邾子滕子薛伯杞伯小邾子盟于澶渊冬十月鲁季孙宿如宋

按春秋襄公二十年 按左传二十年夏盟于澶渊齐成故也冬季武子如宋报向戌之聘也褚师段逆之以受享赋常棣之七章以卒宋人重贿之归复命公享之赋鱼丽之卒章公赋南山有台武子去所曰臣不堪也

灵王二十年冬十月晋侯齐侯宋公鲁侯卫侯郑伯曹伯莒子邾子会于商任

按春秋襄公二十一年 按左传二十一年冬会于商任鞶栾氏也

灵王二十一年冬晋侯齐侯宋公鲁侯卫侯郑伯曹伯莒子邾子薛伯杞伯小邾子会于沙随

按春秋襄公二十二年 按左传二十二年冬会于沙随复鞶栾氏也

灵王二十三年秋八月晋侯宋公鲁侯卫侯郑伯曹伯莒子邾子滕子薛伯杞伯小邾子会于夷仪

按春秋襄公二十四年 按左传二十四年秋会于夷仪将以伐齐水不克

灵王二十四年夏五月晋侯宋公鲁侯卫侯郑伯曹伯莒子邾子滕子薛伯杞伯小邾子会于夷仪秋八月己巳同盟于重丘

按春秋襄公二十五年 按左传二十五年夏五月会于夷仪伐齐以报朝歌之役秋七月己巳同盟于重丘齐成故也

灵王二十五年夏鲁侯晋赵武郑良霄宋向戌曹人会于澶渊秋宋公杀其世子痤

按春秋襄公二十六年 按左传二十六年夏六月公会晋赵武宋向戌郑良霄曹人于澶渊以讨卫疆戚田取卫西鄙懿氏六十以与孙氏初宋芮司徒生女子赤而毛弃诸堤下共姬之妾取以入名之曰弃长而美平公入夕共姬与之食公见弃也而视之尤姬纳诸御嬖生佐恶而婉太子痤美而狠合左师畏而恶之寺人惠墙伊戾为太子内师而无宠秋楚客

聘于晋过宋太子知之请野享之公使往伊戾请从之公曰夫不恶女乎对曰小人之事君子也恶之不敢远好之不敢近敬以待命敢有贰心乎纵有共其外莫共其内臣请往也遣之至则欲用牲加书征之而聘告公曰太子将为乱既与楚客盟矣公曰为我子又何求对曰欲速公使视之则信有焉问诸夫人与左师则皆曰固闻之公囚太子太子曰唯佐也能免我召而使请曰日中不来吾知死矣左师闻之聒而与之语过期乃缢而死佐为太子公徐闻其无罪也乃亨伊戾左师见夫人之步马者问之对曰尹夫人氏也左师曰谁为君夫人余胡弗知圉人归以告夫人夫人使馈之锦与马先之以玉曰君之妾弃使某献左师改命曰君夫人而后再拜稽首受之

灵王二十六年夏晋赵武楚屈建鲁叔孙豹蔡公孙归生卫石恶陈孔奂郑良霄许人曹人会于宋秋七月辛巳诸侯之大夫盟于宋

按春秋襄公二十七年 按左传二十七年夏宋向戌善于赵文子又善于令尹子木欲弭诸侯之兵以为名如晋告赵孟赵孟谋于诸大夫韩宣子曰兵民之残也财用之蠹小国之灾也将或弭之虽曰不可必将许之弗许楚将许之以召诸侯则我失为盟主矣晋人许之如楚楚亦许之如齐齐人难之陈文子曰晋楚许之我焉得已且人曰弭兵而我弗许则固携吾民矣将焉用之齐人许之告于秦秦亦许之皆告于小国为会于宋五月甲辰晋赵武至于宋丙午郑良霄至六月丁未朔宋人享赵文子叔向为介司马置折俎礼也仲尼使举是礼也以为多文辞戊申叔孙豹齐庆封陈须无卫石恶至甲寅晋荀盈从赵武至丙辰邾悼公至壬戌楚公子黑肱先至成言于晋丁卯宋向戌如陈从子木成言于楚戊辰滕成公至子木谓向戌请晋楚之从交相见也庚午向戌复于赵孟赵孟曰晋楚齐秦匹也晋之不能于齐犹楚之不能于秦也楚君若能使秦君辱于敝邑寡君敢不固请于齐壬申左师复言于子木子木使驿谒

诸王王曰释齐秦他国请相见也秋七月戊寅左师至是夜也赵孟及子木盟以齐言庚辰子木至自陈陈孔奭蔡公孙归生至曹许之大夫皆至以藩为军晋楚各处其偏伯夙谓赵孟曰楚氛甚恶惧难赵孟曰吾左还入于宋若我何辛巳将盟于宋西门之外楚人衷甲伯州犁曰合诸侯之师以为不信无乃不可乎夫诸侯望信于楚是以来服若不信是弃其所以服诸侯也固请释甲子木曰晋楚无信久矣事利而已苟得志焉焉用有信大宰退告人曰令尹将死矣不及三年求逞志而弃信志将逞乎志以发言言以出信信以立志参以定之信亡何以及三赵孟患楚衷甲以告叔向叔向曰何害也匹夫一为不信犹不可单毙其死若合诸侯之卿以为不信必不捷矣食言者不病非子之患也夫以信召人而以僭济之必莫之与也安能害我且吾因宋以守病则夫能致死与宋致死虽倍楚可也子何惧焉又不及是曰弭兵以召诸侯而称兵以害我吾庸多矣非所患也季武子使谓叔孙以公命曰视邾滕既而齐人请邾宋人请滕皆不与盟叔孙曰邾滕人之私也我列国也何故视之宋卫吾匹也乃盟晋楚争先晋人曰晋固为诸侯盟主未有先晋者也楚人曰子言晋楚匹也若晋常先是楚弱也且晋楚狎主诸侯之盟也久矣岂专在晋叔向谓赵孟曰诸侯归晋之德只非归其尸盟也子务德无争先且诸侯盟小国固必有尸盟者楚谓晋细不亦可乎乃先楚人壬午宋公兼享晋楚之大夫赵孟为客子木与之言弗能对使叔向侍言焉子木亦不能对也乙酉宋公及诸侯之大夫盟于蒙门之外子木问于赵孟曰范武子之德何如对曰夫子之家事治言于晋国无隐情其祝史陈信于鬼神无愧辞子木归以语王王曰尚矣哉能歆神人宜其光辅五君以为盟主也子木又语王曰宜晋之伯也有叔向以佐其卿楚无以当之不可与争晋荀盈遂如楚口盟宋左师请赏曰请免死之邑公与之邑六十以示子罕子罕曰凡诸侯小国晋楚所以兵



威之畏而后上下慈和慈和而后能安靖其国家以事大国所以存也无威则骄骄则乱乱生必灭所以亡也天生五材民并用之废一不可谁能去兵兵之设久矣所以威不轨而昭文德也圣人以兴乱人以废废兴存亡昏明之术皆兵之由也而子求去之不亦诬乎以诬道蔽诸侯罪莫大焉纵无大讨而又求赏无厌之甚也削而投之左师辞邑向氏欲攻司城左师曰我将亡夫子存我德莫大焉又可攻乎灵王二十七年冬十二月宋公陈侯鲁侯郑伯许男如楚

按春秋不书 按左传襄公二十八年冬十二月为宋之盟故公及宋公陈侯郑伯许男如楚公过郑郑伯不在伯有迂劳于黄崖不敬穆叔曰伯有无戾于郑郑必有大咎敬民之主也而弃之何以承守郑人不讨必受其辜济泽之阿行潦之苹藻置诸宗室季兰尸之敬也敬可弃乎及汉楚康王卒公欲反叔仲昭伯曰我楚国之为岂为一人行也子服惠伯曰君子有远虑小人从迩饥寒之不恤谁遑其后不如姑归也叔孙穆子曰叔仲子专之矣子服子始学者也荣成伯曰远图者忠也公遂行宋向戌曰我一人之为非为楚也饥寒之不恤谁能恤楚姑归而息民待其立君而为之备宋公遂反

景王元年夏五月晋荀盈齐高止宋华定鲁仲孙羯卫世叔仪郑公孙段曹人莒人滕人薛人小邾人城杞宋饥贷粟于晋

按春秋襄公二十九年贷粟不书 按左传二十九年郑子展卒子皮即位于是郑饥而未及麦民病子皮以子展之命饷国人粟户一钟是以得郑国之民故罕氏常掌国政以为上卿宋司城子罕闻之曰邻于善民之望也宋亦饥请于平公出公粟以贷使大夫皆贷司城氏贷而不书为大夫之无者贷宋无饥人叔向闻之曰郑之罕宋之乐其后亡者也二者其皆得国乎民之归也施而不德乐氏加焉其以宋升降乎晋平公杞出也故治杞六月知悼子合诸侯之



大夫以城杞

景王二年夏五月甲午宋灾宋伯姬卒秋七月鲁叔弓如宋葬宋共姬冬十月晋赵武齐公孙蚤宋向戌卫北宫佗郑罕虎曹人莒人邾人滕人薛人杞人小邾人会于澶渊宋灾故

按春秋襄公三十年 按左传三十年夏五月或叫于宋太庙曰嘻嘻出出鸟鸣于亳社如曰嘻嘻甲午宋大灾宋伯姬卒待姆也君子谓宋共姬女而不妇女待人妇义事也秋七月叔弓如宋葬共姬也为宋灾故诸侯之大夫会以谋归宋财冬十月叔孙豹会晋赵武齐公孙蚤宋向戌卫北宫佗郑罕虎及小邾之大夫会于澶渊既而无归于宋 按公羊传外夫人不书葬此何以书隐之也何隐尔宋灾伯姬卒焉其称谥何贤也何贤尔宋灾伯姬存焉有司复曰火至矣请出伯姬曰不可吾闻之也妇人夜出不见传母不下堂傅至矣母未至也逮乎火而死宋灾故者何诸侯会于澶渊凡为宋灾故也会未有言其所为者此言所为何录伯姬也诸侯相聚而更宋之所丧曰死者不可复生尔财复矣此大事也曷为使微者卿也卿则其称人何贬曷为贬卿不得忧诸侯也

景王四年春正月晋赵武楚公子围齐国弱宋向戌鲁叔孙豹卫齐恶陈公子招蔡公孙归生郑罕虎许人曹人会于虢

按春秋昭公元年 按左传元年春正月乙未会于虢寻宋之盟也祁午谓赵文子曰宋之盟楚人得志于晋今令尹之不信诸侯之所闻也子弗戒惧又如宋子木之信称于诸侯犹诈晋而驾焉况不信之尤者乎楚重得志于晋晋之耻也子相晋国以为盟主于今七年矣再合诸侯三合大夫服齐狄宁东夏平秦乱城淳于师徒不顿国家不罢民无谤讟诸侯无怨天无大灾子之力也有令名矣而终之以耻午也是惧吾子其不可以不戒文子曰武受赐矣然宋之盟子木有祸人之心武有仁人之心是楚所以驾于晋也今武犹是心也楚又行僭非所害也我将信以

为本循而行之譬如农夫是穠是蓂虽有饥馑必有丰年且吾闻之能信不为人下吾未能也诗曰不僭不贼鲜不为则信也能为人则者不为人下矣吾不能是难楚不为患楚令尹围请用牲读旧书加于牲上而已晋人许之三月甲辰盟楚公子围设服离卫叔孙穆子曰楚公子美矣君哉郑子皮曰二执戈者前矣蔡子家曰蒲宫有前不亦可乎楚伯州犁曰此行也辞而假之寡君郑行人挥曰假不反矣伯州犁曰子姑忧子口之欲背诞也子羽曰当璧犹在假而不反子其无忧乎齐国子曰吾代二子愍矣陈公子招曰不忧何成二子乐矣卫齐子曰苟或知之虽忧何害宋合左师曰大国令小国共吾知共而已晋乐王鲋曰小旻之卒章善矣吾从之退会子羽谓子皮曰叔孙绞而婉宋左师简而礼乐王鲋字而敬子与子家持之皆保世之主也齐卫陈大夫其不免乎国子代人忧子招乐忧齐子虽忧弗害夫弗及而忧与可忧而乐与忧而弗害皆取忧之道也忧必及之太誓曰民之所欲天必从之三大夫兆忧忧能无至乎言以知物其是之谓矣

景王七年夏楚子蔡侯陈侯郑伯许男徐子滕子顿子胡子沈子小邾子宋世子佐淮夷会于申秋七月楚子蔡侯陈侯许男顿子胡子沈子淮夷伐吴执齐庆封杀之遂灭赖

按春秋昭公四年 按左传四年夏六月丙午楚子合诸侯于申宋太子佐后至王田于武城久而弗见椒举请辞焉王使往曰属有宗祧之事于武城寡君将墮币焉敢谢后见秋七月楚子以诸侯代吴宋太子郑伯先归宋华费遂郑大夫从使屈申围朱方八月甲申克之执齐庆封而尽灭其族

景王九年夏宋华合比出奔卫

按春秋昭公六年 按左传六年夏宋寺人柳有宠太子佐恶之华合比曰我杀之柳闻之乃坎用牲埋书而告公曰合比将纳亡人之族既盟于北郭矣公使视之有焉遂逐华合比合比奔卫于是华亥欲代

右师乃与寺人柳比从为之征曰闻之久矣公使代之见于左师左师曰女夫也必亡女丧而宗室于人何有人亦于女何有诗曰宗子维城毋俾城坏毋独斯畏女其畏哉

景王十一年秋九月楚围陈宋戴恶会之

按春秋不书 按左传昭公八年秋九月楚公子弃疾帅师奉孙吴围陈宋戴恶会之冬十一月壬午灭陈

景王十二年春宋华亥会楚子于陈

按春秋昭公九年 按左传九年春叔弓宋华亥郑游吉卫赵廛会楚子于陈

景王十三年冬十二月甲子宋公成薨子佐立

按春秋昭公十年 按左传十年冬十二月宋平公卒初元公恶寺人柳欲杀之及丧柳炽炭于位将至则去之比葬又有宠

景王十四年春二月鲁叔弓如宋葬宋平公秋晋韩起齐国弱宋华亥鲁季孙意如卫北宫佗郑罕虎曹人杞人会于厥憇

按春秋昭公十一年 按左传十一年春王二月叔弓如宋葬平公也秋会于厥憇谋救蔡也

景王十五年夏宋公使华定聘于鲁

按春秋昭公十二年 按左传十二年夏宋华定来聘通嗣君也享之为赋蓼萧弗知又不答赋昭子曰必亡宴语之不怀宠光之不宣令德之不知同福之不受将何以在

景王十六年秋刘子晋侯齐侯宋公鲁侯卫侯郑伯曹伯莒子邾子滕子薛伯杞伯小邾子同盟于平丘  
按春秋昭公十三年 按左传十三年晋成虬祁诸侯朝而归者皆有贰心为取郟故叔向曰诸侯不可以不示威秋七月丙寅治兵于邾南遂合诸侯于平丘甲戌同盟于平丘齐服也

景王二十年冬有星孛于大辰

按春秋昭公十七年 按左传十七年冬有星孛于大辰西及汉申须曰彗所以除旧布新也天事恒象

今除于火火出必布焉诸侯其有火灾乎梓慎曰往年吾见之是其征也火出而见今兹火出而章必火入而伏其居火也久矣其与不然乎火出于夏为三月于商为四月于周为五月夏数得天若火作其四国当之在宋卫陈郑乎宋大辰之虚也陈大□之虚也郑祝融之虚也皆火房也星孛天汉汉水祥也卫顛頊之虚也故为帝丘其星为大水水火之牡也其以丙子若壬午作乎水火所以合也若火入而伏必以壬午不过其见之月郑裨言于子产曰宋卫陈郑将同日火若我用瓊罍玉瓚郑必不火子产弗与景王二十一年夏五月壬午宋卫陈郑灾

按春秋昭公十八年 按左传十八年夏五月火始昏见丙子风梓慎曰是谓融风火之始也七日其火作乎戊寅风甚壬午大甚宋卫陈郑皆火梓慎登大庭氏之库以望之曰宋卫陈郑也数日皆来告火裨曰不用吾言郑又将火郑人请用之子产不可子大叔曰宝以保民也若有火国几亡可以救亡子何爱焉子产曰天道远人道迩非所及也何以知之焉知天道是亦多言矣岂不或信遂不与亦不复火郑之未灾也里析告子产曰将有大祥民震动国几亡吾身泯焉弗良及也国迁其可乎子产曰虽可吾不足以定迁矣及火里析死矣未葬子产使輿三十人迁其柩火作子产辞晋公子公孙于东门使司寇出新客禁旧客勿出于宫使子宽子上巡群屏摄至于太宫使公孙登徙大龟使祝史徙主祐于周庙告于先君使府人库人各做其事商成公做司宫出旧宫人置诸火所不及司马司寇列居火道行火所焮城下之人伍列登城明日使野司寇各保其征郊人助祝史除于国北禳火于元冥回祿祈于四墉书焚室而宽其征与之材三日哭国不市使行人告于诸侯宋卫皆如是陈不救火许不吊灾君子是以知陈许之先亡也

景王二十二年春宋公伐邾

按春秋昭公十九年 按左传十九年邾夫人宋向

戌之女也故向宁请师春二月宋公伐邾围虫三月取之乃尽归郟俘夏邾人邠人徐人会宋公乙亥盟于虫

景王二十三年夏曹公孙会自鄆出奔宋冬十月宋华亥向宁华定出奔陈

按春秋昭公二十年 按左传二十年春王二月己丑日南至梓慎望氛曰今兹宋有乱国几亡三年而后弭蔡有大丧叔孙昭子曰然则戴桓也汰侈无礼已甚乱所在也三月太子建奔宋宋元公无信多私而恶华向华定华亥与向宁谋曰亡愈于死先诸华亥伪有疾以诱群公子公子问之则执之夏六月丙申杀公子寅公子御戎公子朱公子固公孙援公孙丁拘向胜向行于其廩公如华氏请焉弗许遂劫之癸卯取太子栾与母弟辰公子地以为质公亦取华亥之子无戚向宁之子罗华定之子启与华氏盟以为质宋华向之乱公子城公孙忌乐舍司马强向宜向郑楚建邠申出奔郑其徒与华氏战于鬼阎败子城子城适晋华亥与其妻必盥而食所质公子者而后食公与夫人每日必适华氏食公子而后归华亥患之欲归公子向宁曰唯不信故质其子若又归之死无日矣公请于华费遂将攻华氏对曰臣不敢爱死无乃求去忧而滋长乎臣是以惧敢不听命公曰子死亡有命余不忍其口冬十月公杀华向之质而攻之戊辰华向奔陈华登奔吴向宁欲杀太子华亥曰干君而出又杀其子其谁纳我且归之有庸使少司寇輕以归曰子之齿长矣不能事人以三公子为质必免公子既入华輕将自门行公遽见之执其手曰余知而无罪也入复而所

景王二十四年夏宋华亥向宁华定自陈入于宋南里以叛

按春秋昭公二十一年 按左传二十一年夏宋华费遂生华緇华多僚华登緇为少司马多僚为御士与緇相恶乃潜诸公曰緇将纳亡人亟言之公曰司马以吾故亡其良子死亡有命吾不可以再亡之对



曰公若爱司马则如亡死如可逃何远之有公惧使侍人召司马之侍人宜僚饮之酒而使告司马司马叹曰必多僚也吾有谗子而弗能杀吾又不死抑君有命可若何乃与公谋逐华疆将使田孟诸而遣之公饮之酒厚酬之赐及从者司马亦如之张□尤之曰必有故使子皮承宜僚以剑而讯之宜僚尽以告张□欲杀多僚子皮曰司马老矣登之谓甚吾又重之不如亡也五月丙申子皮将见司马而行则遇多僚御司马而朝张□不胜其怒遂与子皮白任郑翩杀多僚劫司马以叛而召亡人壬寅华向入乐大心丰愆华轻御诸横华氏居卢门以南里叛六月庚午宋城旧墉及桑林之门而守之冬十月华登以吴师救华氏齐乌枝鸣戍宋厨人濮曰军志有之先人有夺人之心后人有待其衰盍及其劳且未定也伐诸若入而固则华氏众矣悔无及也从之丙寅齐师宋师败吴师于鸿口获其二帅公子苦偃州员华登帅其余以败宋师公欲出厨人濮曰吾小人可藉死而不能送亡君请待之乃徇曰扬徽者公徒也众从之公自杨门见之下而巡之曰国亡君死二三子之耻也岂专孤之罪也齐乌枝鸣曰用少莫如齐致死齐致死莫如去备彼多兵矣请皆用剑从之华氏北复即之厨人濮以裳裹首而荷以走曰得华登矣遂败华氏于新里翟倭新居于新里既战说甲于公而归华姓居于公里亦如之十一月癸未公子城以晋师至曹翰胡会晋荀吴齐苑何忌卫公子朝救宋丙戌与华氏战于赭丘郑翩愿为鸛其御愿为鹅子禄御公子城庄堇为右干犇御吕封人华豹张□为右相遇城还华豹曰城也城怒而反之将注豹则关矣曰平公之灵尚辅相余豹射出其间将注则又关矣曰不狎鄙抽矢城射之殪张□抽笈而下射之折股扶伏而击之折軫又射之死干犇请一矢城曰余言女于君对曰不死伍乘军之大刑也干刑而从子君焉用之子速诸乃射之殪大败华氏围诸南里华亥搏膺而呼见华疆曰吾为栾氏矣疆曰子无我迂不



幸而后亡使华登如楚乞师华鬻以车十五乘徒七十人犯师而出食于睢上哭而送之乃复入楚蘧越帅师将逆华氏太宰犯谏曰诸侯唯宋事其君今又争国释君而臣是助无乃不可乎王曰而告我也后既许之矣

景王二十五年春宋华亥向宁华定自宋南里出奔楚

按春秋昭公二十二年 按左传二十二年春楚蘧越使告于宋曰寡君闻君有不令之臣为君忧无宁以为宗羞寡君请受而戮之对曰孤不能媚于父兄以为君忧拜命之辱抑君臣日战君曰余必臣是助亦唯命人有言曰唯乱门之无过君若惠保敝邑无亢不衷以奖乱人孤之望也唯君图之楚人患之诸侯之戍谋曰若华氏知困而致死楚耻无功而疾战非吾利也不如出之以为楚功其亦无能为也已救宋而除其害又何求乃固请出之宋人从之己巳宋华亥向宁华定华鬻华登皇奄伤省臧士平出奔楚宋公使公孙忌为大司马边圉为大司徒乐祁为司城仲几为左师乐大心为右师乐挽为大司寇以靖国人

敬王三年春鲁叔孙婁如宋夏晋赵鞅宋乐大心鲁叔诣卫北宫喜郑游吉曹人邾人滕人薛人小邾人会于黄父冬十一月宋公佐薨于曲棘子头曼立

按春秋昭公二十五年 按左传二十五年春叔孙婁聘于宋桐门右师见之语卑宋大夫而贱司城氏昭子告其人曰右师其亡乎君子贵其身而后能及人是以有礼今夫子卑其大夫而贱其宗是贱其身也能有礼乎无礼必亡宋公享昭子赋新宫昭子赋车辖明日宴饮酒乐宋公使昭子右坐语相泣也乐祁佐退而告人曰今兹君与叔孙其皆死乎吾闻之哀乐而乐哀皆丧心也心之精爽是谓魂魄魂魄去之何以能久季公若之姊为小邾夫人生宋元夫人生子以妻季平子昭子如宋聘且逆之公若从谓曹氏勿与鲁将逐之曹氏告公公告乐祁乐祁曰与之

如是鲁君必出政在季氏三世矣鲁君丧政四公矣无民而能逞其志者未之有也国君是以镇抚其民诗曰人之云亡心之忧矣鲁君失民矣焉得逞其志靖以待命犹可动必忧夏会于黄父谋王室也赵简子令诸侯之大夫输王粟宋乐大心曰我不输粟我于周为客若之何使客晋士伯曰自践土以来宋何役之不会而何盟之不同曰同恤王室子焉得辟之子奉君命以会大事而宋背盟无乃不可乎右师不敢对受牒而退士伯告简子曰宋右师必亡奉君命以使而欲背盟以干盟主无不祥大焉冬十一月宋元公将为公故如晋梦太子栾即位于庙己与平公服而相之且召六卿公曰寡人不不能事父兄以为二三子忧寡人之罪也若以群子之灵获保首领以歿唯是楸柎所以藉干者请无及先君仲几对曰君若以社稷之故私降昵宴群臣弗敢知若夫宋国之法死生之度先君有命矣群臣以死守之弗敢失队臣之失职常刑不赦臣不忍其死君命祇辱宋公遂行己亥卒于曲棘

敬王四年春正月葬宋元公

按春秋昭公二十六年 按左传二十六年春王正月葬宋元公如先君礼也

敬王五年秋晋士鞅宋乐祁犁卫北宫喜曹人邾人滕人会于扈

按春秋昭公二十七年 按左传二十七年秋会于扈令戍周且谋纳公也宋卫皆利纳公固请之

敬王十年冬晋韩不信齐高张宋仲几鲁仲孙何忌卫世叔申郑国参曹人莒人薛人杞人小邾人城成周

按春秋昭公三十二年 按左传三十二年冬十一月晋魏舒韩不信如京师合诸侯之大夫于狄泉寻盟且令城成周

三恪部汇考六

周五

宋三

敬王十一年春三月晋人执宋仲几于京师

按春秋定公元年 按左传元年春正月孟懿子会城成周庚寅裁宋仲几不受功曰滕薛邠吾役也薛宰曰宋为无道绝我小国于周以我适楚故我常从宋晋文公为践土之盟曰凡我同盟各复旧职若从践土若从宋亦唯命仲几曰践土固然薛宰曰薛之皇祖奚仲居薛以为夏车正奚仲迁于邳仲虺居薛以为汤左相若复旧职将承王官何故以役诸侯仲几曰三代各异物薛焉得有旧为宋役亦其职也士弥牟曰晋之从政者新子姑受功归吾视诸故府仲几曰纵子忘之山川鬼神其忘诸乎士伯怒谓韩简子曰薛征于人宋征于鬼宋罪大矣且己无辞而抑我以神诬我也启宠纳侮其此之谓矣必以仲几为戮乃执仲几以归三月归诸京师城三旬而毕乃归诸侯之戍齐高张后不从诸侯晋女叔宽曰周苾弘齐高张皆将不免苾弘违天高子违人天之所坏不可支也众之所为不可奸也

敬王十四年春三月刘子晋侯宋公鲁侯蔡侯卫侯陈子郑伯许男曹伯莒子邾子顿子胡子滕子薛伯杞伯小邾子齐国夏会于召陵侵楚夏五月盟于皋鼬

按春秋定公四年 按左传四年春三月刘文公合诸侯于召陵谋伐楚也

敬王十六年秋晋人执宋行人乐祁

按春秋定公六年 按左传六年秋八月宋乐祁言于景公曰诸侯唯我事晋今使不往晋其憾矣乐祁告其宰陈寅陈寅曰必使子往他日公谓乐祁曰唯寡人说子之言子必往陈寅曰子立后而行吾室亦不亡唯君亦以我为知难而行也见混而行赵简子逆而饮之酒于口上献杨楯六十于简子陈寅曰昔吾主范氏今子主赵氏又有纳焉以杨楯贾祸弗可为也已然子死晋国子孙必得志于宋范献子言于晋侯曰以君命越疆而使未致使而私饮酒不敬二君不可不讨也乃执乐祁

敬王十八年春宋乐祁卒于晋

按春秋不书 按左传定公八年春二月赵鞅言于晋侯曰诸侯唯宋事晋好逆其使犹惧不至今又执之是绝诸侯也将归乐祁士鞅曰三年止之无故而归之宋必叛晋献子私谓子梁曰寡君惧不得事宋君是以止子子姑使混代子子梁以告陈寅陈寅曰宋将叛晋是弃混也不如待之乐祁归卒于大行士鞅曰宋必叛不如止其尸以求成焉乃止诸州

敬王十九年春宋使乐大心盟于晋鲁阳货奔宋

按春秋不书 按左传定公九年春宋公使乐大心盟于晋且逆乐祁之尸辞伪有疾乃使向巢如晋盟且逆子梁之尸子明谓桐门右师出曰吾犹衰经而子击钟何也右师曰丧不在此故也既而告人曰已衰经而生子余何故舍钟子明闻之怒言于公曰右师将不利戴氏不肯适晋将作乱也不然无疾乃逐桐门右师

按史记宋世家景公十六年鲁阳货来奔已复去

敬王二十年秋宋乐大心出奔曹宋公子地出奔陈冬宋公之弟辰暨仲佗石彊出奔陈

按春秋定公十年 按左传十年宋公子地嬖蘧富获十一分其室而以其五与之公子地有白马四公嬖向魍魍欲之公取而朱其尾鬣以与之地怒使其徒扶魍而夺之魍惧将走公闭门而泣之目尽肿母弟辰曰子分室以与猎也而独卑魍亦有颇焉子为君礼不过出竟君必止子公子地出奔陈公弗止辰为之请弗听辰曰是我迂吾兄也吾以国人出君谁与处冬母弟辰暨仲佗石彊出奔陈

敬王二十一年春宋公之弟辰及仲佗石彊公子地自陈入于萧以叛秋宋乐大心自曹入于萧

按春秋定公十一年 按左传十一年春宋公母弟辰暨仲佗石彊公子地入于萧以叛秋乐大心从之大为宋患宠向魍故也

敬王二十四年春卫赵阳出奔宋秋齐侯宋公会于洮卫蒯聩出奔宋宋公之弟辰自萧奔鲁

按春秋定公十四年 按左传十四年春卫侯逐公叔戍与其党故赵阳奔宋戍来奔秋齐侯宋公会于洮范氏故也卫侯为夫人南子召宋朝会于洮太子蒯聩献孟于齐过宋野野人歌之曰既定尔娄猪盍归我艾豕太子羞之谓戏阳速曰从我而朝少君少君见我我顾乃杀之速曰诺乃朝夫人夫人见太子太子三顾速不进夫人见其色啼而走曰蒯聩将杀余公执其手以登台太子奔宋尽逐其党故公孟彊出奔郑自郑奔齐太子告人曰戏阳速祸余戏阳速告人曰太子则祸余太子无道使余杀其母余不许将戕于余若杀夫人将以余说余是故许而弗为以纾余死谚曰民保于信吾以信义也

敬王二十五年夏郑罕达帅师伐宋齐侯卫侯次于渠蔭

按春秋定公十五年 按左传十五年夏郑罕达败宋师于老丘齐侯卫侯次于蘧拿谋救宋也

敬王二十八年孔子过宋夏宋乐髡帅师伐曹

按春秋哀公三年

按史记宋世家景公二十五年孔子过宋宋司马桓魋恶之欲杀孔子孔子微服去

敬王二十九年春宋人执小邾子

按春秋哀公四年

敬王三十年夏齐侯伐宋

按春秋哀公五年

敬王三十一年冬宋向巢帅师伐曹

按春秋哀公六年

敬王三十二年春宋皇瑗帅师伐郑秋宋人围曹冬郑驷弘帅师救曹

按春秋哀公七年 按左传七年春宋师侵郑郑叛晋故也秋宋人围曹郑桓子思曰宋人有曹郑之患也不可以不救冬郑师救曹侵宋初曹人或梦众君子立于社宫而谋亡曹曹叔振铎请待公孙强许之旦而求之曹无之戒其子曰我死尔闻公孙强为政必去之及曹伯阳即位好田弋曹鄙人公孙强好弋

获白雁献之且言田弋之说之因访政事大说之有宠使为司城以听政梦者之子乃行强言霸说于曹伯曹伯从之乃背晋而奸宋宋人伐之晋人不救筑五邑于其郊曰黍丘揖丘大城锺邗

敬王三十三年春正月宋公入曹以曹伯阳归

按春秋哀公八年 按左传八年春宋公伐曹将还褚师子肥殿曹人诟之不行师待之公闻之怒命反之遂灭曹执曹伯及司城强以归杀之

按史记宋世家景公三十年曹倍宋又倍晋宋伐曹晋不救遂灭曹有之

敬王三十四年春宋皇瑗帅师取郑师于雍丘秋宋公伐郑

按春秋哀公九年 按左传九年春郑武子剩之嬖许瑕求邑无以与之请外取许之故围宋雍丘宋皇瑗围郑师每日迁舍垒合郑师哭子姚救之大败二月甲戌宋取郑师于雍丘使有能者无死以郑张与郑罗归夏宋公伐郑晋赵鞅卜救郑遇水适火占诸史赵史墨史龟史龟曰是谓沈阳可以兴兵利以伐姜不利子商伐齐则可敌宋不吉史墨曰盈水名也子水位也名位敌不可干也炎帝为火师姜姓其后也水胜火伐姜则可史赵曰是谓如川之满不可游也郑方有罪不可救也救郑则不吉不知其他阳虎以周易筮之遇泰之需曰宋方吉不可与也微子启帝乙之元子也宋郑甥舅也祉禄也若帝乙之元子归妹而有吉禄我安得吉焉乃止

敬王三十五年夏宋人伐郑

按春秋哀公十年

敬王三十六年冬卫世叔齐出奔宋

按春秋哀公十一年 按左传十一年冬卫太叔疾出奔宋初疾娶于宋子朝其娣嬖子朝出孔文子使疾出其妻而妻之疾使侍人诱其初妻之娣置于犁而为一宫如二妻文子怒欲攻之仲尼止之遂夺其妻或淫于外州外州人夺之轩以献耻是二者故出卫人立遗使室孔姑疾臣向魑纳口珠焉与之城



鉏宋公求珠魑不与由是得罪及桓氏出城鉏人攻太叔疾卫庄公复之使处巢死焉殡于郟葬于少禘敬王三十七年秋鲁侯卫侯宋皇瑗会于郟宋向巢帅师伐郑

按春秋哀公十二年 按左传十二年夏吴征会于卫初卫人杀吴行人且姚而惧谋于行人子羽子羽曰吴方无道无乃辱吾君不如止也子木曰吴方无道国无道必弃疾于人吴虽无道犹足以患卫往也长木之毙无不漂也国狗之瘦无不噬也而况大国乎秋卫侯会吴于郟公及卫侯宋皇瑗盟而卒辞吴盟吴人藩卫侯之舍子服景伯谓子贡曰夫诸侯之会事既毕矣侯伯致礼地主归饩以相辞也今吴不行礼于卫而藩其君舍以难之子盍见太宰乃请束锦以行语及卫故大宰嚭曰寡君愿事卫君卫君之来也缓寡君惧故将止之子贡曰卫君之来必谋于其众其众或欲或否是以缓来其欲来者子之党也其不欲来者子之讎也若执卫君是堕党而崇讎也夫堕子者得其志矣且合诸侯而执卫君谁敢不惧堕党崇讎而惧诸侯或者难以霸乎太宰嚭说乃舍卫侯卫侯归效夷言子之尚幼曰君必不免其死于夷乎执焉而又说其言从之固矣宋郑之间有隙地焉曰弥作顷丘玉畅岳戈钐子产与宋人为成曰勿有是及宋平元之族自萧奔郑郑人为之城岳戈钐九月宋向巢伐郑取钐杀元公之孙遂围岳十二月郑罕达救岳丙申围宋师

敬王三十八年春郑罕达帅师取宋师于岳

按春秋哀公十三年 按左传十三年春宋向魑救其师郑子剩使徇曰得桓魑者有赏魑也逃归遂取宋师于岳获成欢郟延以六邑为虚

敬王三十九年夏五月宋向魑入于曹以叛六月宋向魑自曹出奔卫宋向巢奔鲁

按春秋哀公十四年 按左传十四年夏宋桓魑之宠害于公公使夫人骤请享焉而将讨之未及魑先谋公请以□易薄公曰不可薄宗邑也乃益□七邑

而请享公焉以日中为期家备尽往公知之告皇野曰余长魑也今将祸余请即救司马子仲曰有臣不顺神之所恶也而况人乎敢不承命不得左师不可请以君命召之左师每食击钟闻钟声公曰夫子将食既食又奏公曰可矣以乘车往曰迹人来告曰逢泽有介麋焉公曰虽魑未来得左师吾与之田若何君悼告子野曰尝私焉君欲速故以乘车逆子与之乘至公告之故拜不能起司马曰君与之言公曰所难子者上有天下有先君对曰魑之不共宋之祸也敢不唯命是听司马请瑞焉以命其徒攻桓氏其父兄故臣曰不可其新臣曰从吾君之命遂攻之子颀骋而告桓司马司马欲入子车止之曰不能事君而又伐国民不与也祇取死焉向魑遂入于曹以叛六月使左师巢伐之欲质大夫以入焉不能亦入于曹取质魑曰不可既不能事君又得罪于民将若之何乃舍之民遂叛之向魑奔卫向巢来奔宋公使止之曰寡人与子有言矣不可以绝向氏之祀辞曰臣之罪大尽灭桓氏可也若以先臣之故而使有后君之惠也若臣则不可以入矣司马牛致其邑与珪焉而适齐向魑出于卫地公文氏攻之求夏后氏之璜焉与之他玉而奔齐陈成子使为次卿司马牛又致其邑焉而适吴吴人恶之而反赵简子召之陈成子亦召之卒于鲁郭门之外坑氏葬诸丘舆

敬王四十年夏五月郑伯伐宋荧惑守心

按春秋哀公十五年荧惑守心不书

按史记宋世家景公三十七年荧惑守心心宋之分野也景公忧之司星子韦曰可移于相景公曰相吾之股肱曰可移于民景公曰君者待民曰可移于岁景公曰岁饥民困吾谁为君子韦曰天高听卑君有君人之言三荧惑宜有动于是候之果徙三度

敬王四十一年春二月卫子还成出奔宋

按春秋哀公十六年

敬王四十二年冬宋皇瑗奔晋

按左传哀公十七年冬十月宋皇瑗之子麋有友曰

田丙而夺其兄劓般邑以与之劓般愠而行告桓司马之臣子仪克子仪克适宋告夫人曰麋将纳桓氏公问诸子仲初子仲将以杞姒之子非我为子麋曰必立伯也是良材子仲怒弗从故对曰右师则老矣不识麋也公执之皇瑗奔晋召之

敬王四十三年春宋人杀皇瑗

按左传哀公十八年春宋杀皇瑗公闻其情复皇氏之族使皇瑗为右师

元王三年冬十一月越子归吴所侵宋地

按通鉴前编元王三年冬十一月越子灭吴归吴所侵宋地

元王四年春宋夫人景曹薨

按左传哀公二十三年春宋景曹卒季康子使冉有吊且送葬曰敝邑有社稷之事使肥与有职竞焉是以不得助执紼使求从与人曰以肥之得备弥甥也有不腆先人之产马使求荐诸夫人之宰其可以称旌繁乎

元王六年夏五月卫侯奔宋

按左传哀公二十五年夏五月庚辰卫侯出奔宋

按战国策公输般为楚设机将以攻宋墨子闻之百舍重藿往见公输般谓之曰吾自宋闻子吾欲藉子杀王公输般曰吾义固不杀王墨子曰闻公为云梯将以攻宋宋何罪之有义不杀王而攻国是不杀少而杀众敢问攻宋何义也公输般服焉请见之王墨子见楚王曰今有人于此舍其文轩邻有敝舆而欲窃之舍其锦绣邻有短褐而欲窃之舍其粱肉邻有糟糠而欲窃之此为何若人也王曰必为有窃疾矣墨子曰荆之地方五千里宋方五百里此犹文轩之与敝舆也荆有云梦犀兕麋鹿盈之江汉鱼鼃鼃为天下饶宋所谓无雉兔鲋鱼者也此犹粱肉之与糟糠也荆有长松文梓楸楠豫章宋无长木此犹锦绣之与短褐也臣以王吏之攻宋为与此同类也王曰善哉请无攻宋

梁襄王伐邯郸而征师于宋宋君使使者请于赵王

曰夫梁兵劲而权重今征师于敝邑敝邑不从则恐危社稷若扶梁伐赵以害赵国则寡人不忍也愿王之有以命敝邑赵王曰然夫宋之不如梁也寡人知之矣弱赵以强梁宋必不利也则吾何以告子而可乎使者曰臣请受边城徐其攻而留其日以待下吏之有城而已赵王曰善宋人因遂举兵入赵境而围一城焉梁王甚说曰宋人助我攻矣赵王亦曰宋人止于此矣故兵退难解德施于梁而无怨于赵故名有所加而实有所归

谓大尹曰君日长矣自知政则公无事公不如令楚贺君之孝则君不夺太后之事矣则公常用宋矣宋与楚为兄弟齐攻宋楚王言救宋宋因卖楚重以求讲于齐齐不听苏秦为宋谓齐相曰不如与之以明宋之卖楚重于齐也楚怒必绝于宋而事齐齐楚合则攻宋易矣

按以上俱宋景公时事距梁赵二国

及苏秦事尚远舛讹甚明姑附于此

元王七年夏五月鲁叔孙舒帅师会越宋纳卫辄冬十月宋公栾薨国人立启启奔楚复立得

按左传哀公二十六年夏五月叔孙舒帅师会越皋如后庸宋乐蔑纳卫侯宋景公无子取公孙周之子得与启畜诸公宫未有立焉于是皇缓为右师皇非我为大司马皇怀为司徒灵不缓为左师乐蔑为司城乐朱鉏为大司寇六卿三族降听政因大尹以达大尹常不告而以其欲称君命以令国人恶之司城欲去大尹左师曰纵之使盈其罪重而无基能无敝乎冬十月公游于空泽辛巳卒于连中大尹兴空泽之士千甲奉公自空桐入如沃宫使召六子曰闻下有师君请六子画六子至以甲劫之曰君有疾病请二三子盟乃盟于少寝之庭曰无为公室不利大尹立启奉丧殡于大宫三日而后国人知之司城蔑使宣言于国曰大尹惑蛊其君而专其利今君无疾而死死又匿之是无他矣大尹之罪也得梦启北首而寝于卢门之外己为舄而集于其上味加于南门尾

加于桐门曰余梦美必立大尹谋曰我不在盟无乃逐我复盟之乎使祝为载书六子在唐孟将盟之祝襄以载书告皇非我皇非我因子潞门尹得左师谋曰民与我逐之乎皆归授甲使徇于国曰大尹惑盍其君以陵虐公室与我者救君者也众曰与之大尹徇曰戴氏皇氏将不利公室与我者无忧不富众曰无别戴氏皇氏欲伐公乐得曰不可彼以陵公有罪我伐公则甚焉使国人施于大尹大尹奉启以奔楚乃立得司城为上卿盟曰三族共政无相害也按史记宋世家景公六十四年宋公子特攻杀太子而自立是为昭公

特一

作得

昭公者元公之曾庶孙也昭

公父公孙纠父公子秦秦即元公少子也景

公杀昭公父纠故昭公怨杀太子而自立

按前编周元王七年冬十月宋景公卒大尹立启六卿逐启及大尹而立得

威烈王四年宋公得薨子购由立

按史记宋世家昭公四十七年卒子悼公购由立（年表

云昭公在位四十九年）

按通鉴前编威烈王二十二年宋昭公卒

在位六

十五年

子

购由嗣是为悼公（

按朱世家昭公四十七年应是周威烈王四年按前编威烈王二十二年宋昭公卒相去十八年之远无从稽考存疑）

威烈王十二年宋公购由薨子田立

按史记宋世家悼公八年卒子休公田立（

索隐曰纪年为十八年）

威烈王十八年晋击宋

按通鉴前编威烈王十八年晋魏斯击宋

安王十一年宋公田薨子辟兵立

按史记宋世家休公二十三年卒子辟公辟兵立（

按注

一云辟公兵索隐曰纪年作桓侯璧兵则璧兵溢桓也辟公误）

安王十四年宋公辟兵薨子剔成立

按史记宋世家辟公三年卒子剔成立

注

索隐曰王邵按纪年云宋剔成肝废其君璧而

自立

按战国策注剔成嗣辟公烈王七年立

安王十七年韩伐宋齐攻宋

按通鉴纲目安王十七年韩伐郑遂伐宋

按战国策齐攻宋宋使臧子索救于荆荆王成大说

许救甚劝臧子忧而反其御曰索救而得有忧色何

也臧子曰宋小而齐大夫救于小宋而恶于大齐此

王之所忧也而荆王悦甚必以坚我我坚而齐敝荆

之利也臧子乃归齐王果拔宋五城而荆王不至

显王四年魏伐宋

按通鉴纲目云云

显王二十二年宋公剔成弟偃逐剔成而自立

按史记宋世家剔成四十一年剔成弟偃攻袭剔成

剔成败奔齐偃自立为宋君

按通鉴纲目显王四十年宋君弟偃逐其君剔成而

自立

世家纲目自弟偃篡位及齐

灭宋年分总不侔并存以待考

显王三十三年宋大丘社亡

按通鉴纲目云云

显王三十三年宋君偃自立为王败齐楚魏而取其地

地

按史记宋世家君偃十一年自立为王东败齐取五

城南败楚取地三百里西败魏军乃与齐魏为敌国

盛血以革囊县而射之命曰射天淫于酒妇人群臣



谏者辄射之于是诸侯皆曰桀宋宋其复为桀所为不可不诛告齐伐宋

按通鉴纲目慎靓王三年宋称王

赧王十五年齐与楚魏灭宋

按战国策宋康王之时

偃谥

康王

有雀生于城之陬使

史占之曰小而生巨必霸天下康王大喜于是灭滕代薛取淮北之地乃愈自信欲霸之速成故射天笞地斩社稷而焚灭之曰威服天下鬼神骂国老谏臣为无颜之冠以示勇剖伛之背楔朝涉之胫而国人大骇齐闻而伐之民散城不守王乃逃倪侯之馆遂得而死见祥而不为祥反为祸

注

无颜之冠冠不覆额

按史记世家王偃四十七年齐愍王与魏楚伐宋杀王偃遂灭宋而三分其地

按通鉴纲目赧王二十九年齐灭宋

三恪部总论

礼记

郊特牲

天子存二代之后犹尊贤也尊贤不过二代

疏

古春秋左氏说周家封夏殷二王之后以为上

公封黄帝尧舜之后谓之三恪恪者敬也敬其先圣而封其后

大

全

眉山孙氏曰立前代之后以统承

先王者自古有此法也有虞氏之时弃为高辛之后故得祭天诗所谓后稷肇祀是也丹朱为唐尧后作宾于虞书所谓虞宾在位是也至夏后时则丹朱商均之子孙皆为二王后汤为夏氏立后经

传虽不载然有商之兴固当以禹之裔为二王后无疑矣仲虺之诰称汤之德有曰兹率厥典言其能率循旧典不易故常也岂其于崇德象贤之事独不稽古乎至周则封微子于宋至封舜后于陈封东楼公于杞亦必因成汤封舜禹之后于陈杞可以推知也

杜佑通典

### 三恪议

三恪二王之义有三说焉一云二王之前更立三代之后为三恪此则据乐记武王克商未及下车封黄帝尧舜之后及下车封夏殷之后通用六代之乐一云二王之前但立一代通二王为三恪此据左传但云封胡公以备三恪明王者所敬先王有二更封一代以备三恪存三恪者所敬之道不过于三以通三正三云二王之后为一恪妻之父母为二恪外国之君为三恪此据王有不臣者三而言之按梁崔灵恩云三义之说以初为长何者礼记郊特牲云存二王之后尊贤不过二代又诗云二王之后来助祭又春秋公羊说曰存二王之后所以通三正以上皆无谓二王之后为三恪之文若更立一代通备三恪者则非不过二代之意左传云封胡公以备三恪者谓上同黄帝尧舜下同殷夏为三恪也又按二王三恪经无正文崔灵恩据礼记陈武王之封遂以为通存五代窃恐未安今据二代之后即谓之二王三代之后即谓之三恪且武王所封盖以尧有则天之大德人莫能名黄帝列序星辰正名百物自以功齐万代师范百王故特封其后偶契三二之数实非历代通法故记云尊贤不过二代示敬必由旧因取通己为三正也其二代之前第三代者虽远难师法岂得不录其后故亦存之示敬其道而已因谓之三恪故左传云封胡公以备三恪足知无五代也况历代至今皆以三代为三恪焉

注

不臣二王后者尊敬先王通三正之义故书有

虞宾在位诗云有客有客亦白其马明天下非一家所有敬让之至故封建之使得服其正色用其礼乐以事先祖故孔子云夏礼吾能言之杞不足征也殷礼吾能言之宋不足征也不臣妻父母者妻之言齐与己齐体共承先祖故尊其父母春秋左氏传云纪季姜归于京师称宗者子尊不加父母妻与己齐体故夫不得臣之四夷之君不臣者尚书大传曰越裳氏献白雉周公辞不受曰正朔不施则君子不臣也

三恪部艺文一

守视晋宋齐诸陵诏

梁武帝

命世兴王嗣贤传业声称不朽人代徂迁二宾以位三恪义在时事浸远草榛芜望古兴怀言念怆然晋宋齐三代诸陵有职司者勤加守护勿令细民妄相侵毁作兵有少补使充足前无守视并可量给

微子庙碑记

唐贾至

昔高宗既歿殷始错命政有斲伦败纪事有梗神虐天迄于独夫稔恶不悛武庚不靖茅土再血元鸟之祀宜其忽诸噫汤德未衰故微子复兴于宋矣微子讳启实帝乙元子帝乙懵立贤之故而神器不集于君君肃恭神人恪慎克孝才兼八元之伟德首三仁之列始在择嗣箕子赞焉尹兹东夏周公嘉焉歿而不朽仲尼称焉睹其进思尽忠则忤主以竭谏退将保祀则全身以逃难去就生死之涂沈吟出处之域有以见圣达之情也若乃受为不道暴殄天物剖谏辅之心解忠良之骨亿兆坠于涂炭宗祧困于艱阨而君崎岖险阻避迹藏时免身龙战之郊解缚鹰扬之帅率能收复旧物统承先祀七百余年歆我神祇非明德至仁其孰能与于此于戏国之兴亡不独天命向使帝乙舍受而立启前箕子而后少师则文王未可专征于诸侯武王未可誓师于牧野虽周公之圣不过子产之相矣太公之贤不过穰苴之法矣太王立季历而昌帝乙舍微子而亡其成败所系不甚昭彰乎皇帝三十有一载予作吏于宋思其先圣遗

事求于故老與人則得君之祠廟存焉盛衰紛綸年祀超忽乔木老矣靈儀俨然檀栾□茨者月繼莘繁牲帛者日接何百代之久而仁風獨揚乎留連廟庭乃作頌曰天革元命皇符在木元天降災上慘下黷人怨神怒川崩鬼哭赫赫周邦如臨深谷□矣微子逢時顛沛居亡念存處否求泰諫以明節仁而遠害作誥父師全身而退龍戰于野鳥焚其巢桓桓周王奄有商郊面縛就執牽羊投庖祀商修器啟宋分茅嗟爾宋人來蘇是仰穆如雨潤霑若春養以戴以翼是宗是長茫茫舊封千載余響我來祠廟永挹遺芳荒階蔓草古木垂雲惆悵懷賢徘徊日曛鑿石紀德用流斯文

三恪部藝文二

詩

周頌振鷺一章

詩經

朱

注

此二王之後來助祭之詩

振鷺于飛于彼西雍我客戾止亦有斯容

賦

也

在彼無

惡在此無斲庶几夙夜以永終譽

有客一章

朱

注

此微子來見祖廟之詩

有客有客亦白其馬有萋有且敦琢其旅

賦

也

有客宿

宿有客信信言授之繫以繫其馬 薄言追之左右

綏之既有淫威降福孔夷

三恪部紀事

孔丛子陈王问太师曰寡人不得为贤所推而得南面称孤其幸多矣今既赖二三君子且又欲规长久之图何施而可答曰信王之言万世之福也敢称古以对昔周代殷乃兴灭继绝以为政首今诚法之则六国定不携抑久长之本王曰周存二代别有三恪其事云何答曰封夏殷之后以为二代绍虞帝裔备为三恪恪敬也礼之如宾客也非谓特有二代别有三恪也凡所以立二代者备王道通三统也王曰三统者何答曰各自用其正朔二代与周是谓三统王曰六国之后君吾不能封也远世之王于我何有吾自举不及于周又安能纯法之乎

汉书王莽传建国元年春正月朔莽帅公侯卿士奉皇太后玺绶上太皇太后顺符命去汉号焉大赦天下莽乃策命孺子曰咨尔婴昔皇天右乃太祖历世十二享国二百一十载历数在于予躬诗不云乎侯服于周天命靡常封尔为定安公永为新室宾于戏敬天之休往践乃位毋废予命又曰其以平原安德漯阴鬲重丘凡户万地方百里为定安公国立汉祖宗之庙于其国与周后并行其正朔服色世世以事其祖宗永以命德茂功享历代之祀焉又曰帝王之道相因而通盛德之祚百世享祀予惟黄帝帝少昊帝颛顼帝啻帝尧帝舜帝夏禹皋陶伊尹咸有圣德假于皇天功烈巍巍光施于远予甚嘉之营求其后将祚厥祀惟王氏虞帝之后也出自帝啻刘氏尧之后也出自颛顼于是封姚恂为初睦侯奉黄帝后梁护为修远伯奉少昊后皇孙功隆公千奉帝啻后刘歆为祁烈伯奉颛顼后国师刘歆子迭为伊休侯奉尧后妫昌为始睦侯奉虞帝后山遵为褒谋子奉皋陶后伊元为褒衡子奉伊尹后汉后定安公刘婴位为宾周后卫公姬党更封为章平公亦为宾殷后宋公孔弘运转次移更封为章昭侯位为恪夏后辽西妣丰封为章功侯亦为恪四代古宗宗祀于明堂以配皇始祖考虞帝周公后褒鲁子姬就宣尼公后褒成子孔钧已前定焉莽又以汉高庙为文祖庙曰予

之皇始祖考虞帝受嬪于唐汉氏初祖唐帝世有传国之象予复亲受金策于汉高皇帝之灵惟思褒厚前代何有忘时汉氏宗祖有七以礼立庙于定安国其园寝庙在京师者勿罢祠荐如故予以秋九月亲入汉氏高元成平之庙诸刘更属籍京兆大尹勿解其复各终厥身州牧数存问勿令有侵□

晋书荀奕传奕补散骑常侍侍中时将缮宫城尚书符下陈留王使出城夫奕驳曰昔虞宾在位书称其美诗咏有客载在雅颂今陈留王位在三公之上坐在太子之右故答表曰书赐物曰与此古今之所崇体国之高义也谓宜除夫役时尚书张闳仆射孔愉难奕以为昔宋不城周春秋所讥特蠲非体宜应减夫奕重驳以为春秋之末文武之道将坠于地新有子朝之乱于时诸侯逋替莫肯率职宋之于周实有列国之权且同己勤王而主之者晋客而辞役责之可也今之陈留无列国之势此之作否何益有无臣以为宜除于国职为全诏从之

北齐书魏收传收转中书监诏议二王三恪收执王肃杜预义以元司马氏为二王通曹备三恪诏诸礼学之官皆执郑元五代之议孝昭后姓元议恪不欲广及故议从收

### 三恪部杂录

闻见后录尧舜禅让之事尚有幽囚野死之骇言赖孔子得无完书耳况其假尧舜以为禅让者欲其臣主俱全难矣独汉献帝自初平元年庚午即位至延康元年庚子逊位于魏王曹丕实在位三十年丕奉帝为山阳公邑万户位在诸侯王上奏事不称臣受诏不拜以天子车服郊祀天地宗庙祖腊皆如汉制黄初七年丙午曹丕死曹睿立青龙二年甲寅山阳公薨距逊位后十四年矣睿变服率群臣哭尽哀遣使吊祭监护丧事谥孝献皇帝册曰曹睿云用汉天子礼仪葬禅陵后五年曹睿死齐王芳立四年废高贵乡公髦立五年死陈留王奂立景元元年庚辰山阳公夫人节薨王临于华林园使使持节追谥献穆



皇后及葬车服制度皆如汉氏故事后四年陈留王  
禅位于晋是魏之尊奉汉帝后与其国相始终也视  
晋以降曰禅让者岂不为盛德事乎史臣不知此义  
尚贬曹丕无旷大之度予故表而出之